

D. J. A. Miller
Cap Gracias a Dios.
Republica de Nicaragua
Centro America

Recuerdo del Amigo mio
Señor don P. Pedro Lopez
Jefe Politico
1885

Presented by the under
signed to the Reverend
J. C. Caries c.f.c.
Curator of the Museum
St. Laurent,
College,
Montreal.
P. 2^{me}.

Respectfully, &c.

Samuel

October 6th 1890

150.5 - Mesquite

871

7714

13409

1863


(18)

GUACANAGARÍ	PONTIAC	BLACK HAWK
MONTEZUMA	CAPTAIN PIPE	KEOKUK
GUATIMOTZIN	LOGAN	SACAGAWEA
POWHATAN	CORNPLANTER	BENITO JUAREZ
POCAHONTAS	JOSEPH BRANT	MANGUS
SAMOSET	RED JACKET	COLORADAS
MASSASOIT	LITTLE TURTLE	LITTLE CROW
KING PHILIP	TECUMSEH	SITTING BULL
UNCAS	OSCEOLA	CHIEF JOSEPH
TEDYUSKUNG	SEQUOYA	GERONIMO
	SHABONEE	



TO PERPETUATE THE HISTORY
AND DEVELOPMENT OF THE
PEOPLE REPRESENTED BY THE
ABOVE CHIEFS AND WISE MEN
THIS COLLECTION HAS BEEN
GATHERED BY THEIR FRIEND
EDWARD EVERETT AYER

AND PRESENTED BY HIM
TO
THE NEWBERRY LIBRARY
1911



Bible Stories

in the Mosquito-Language,
Old and New Testaments.

Biblia Historia.

Testament almuk, raya sin.

Moskito bila.

Stuttgart, 1863.

J. F. Steinkopf, Printer.



Bible Studies

For the Young People

Old and New Testaments


By the Author

Published by the

Chicago

Chicago

Chicago



Testament almuk.

1. God diara puk daukan.

God kasbrika tasba sin daukan, ai bila man aisin. Baha kanra diara apu kan, God yakan ban kan. Witin dawan diara puk daukaia.

Nanara wals, naki God yu matlalkabira diara puk daukan.

God bila: „Yu ingni takbia.“ Bara yu ingni takan. God ban yu timia aika ulakan, ban kakna kumi, timia kumi takan. — Ba ninkara kasbrika tasba purara daukan. Baha yu woala. — Yu yumpara God tasba kabo sin aika ulakan, ba yuara inma, duss nanni ai, ma brissa tasbara pawaia daukan. — Yu woal woalra God lapta kati sin daukan, ba wina yawan piua kaikaia; lapta kakna dukia, kati timia dukia, slillma nanni sin daukan.

Yu matasipra God inska tara daukan, daiwan nanni liura puk daukan, piawira puk ban aisi: „Man nanni uya sakma na tasbara.“ — Yu matlalkabira God daiwan minira daukan tasbara iwaia. Bara wisatta: „Yawan upla daukpi, wan lilcara, ba nanni tasbara dawan kaia, daiwan nannira sin.“ — Ban

God upla daukan, waikna kumi mairin kumi, ban wisatta, „Man nanni lupia uya sauma, tasba bangwi takbia, man nanni dawan kama.“ Bara God diara puk kaikan, dia witin daukan, kais puk yamni polli takan.

Nanara tukta nanni, wals dia God yu woalara daukan. Witin ba yua Sabbath daukan, wan winka pubaia. God bui diara puk sut daukan, ba yuara ai winka puban, bamna ba yua yamni daukan, yang nanni sin ba yua yamni bri kaia, wan winka pubaia.

2. Upla saurara dimman.



Ba insla pain polli kan, ba bilara God waikna mairin woal mankan. Ba inslara duss uya polli pawikan, duss ma yamni piaiaikan. Lilapassra duss kumi kan, ai nina diara yamni, diara saura puk tanka kaikaia. God ban win: „Man duss ma bangwi puk pima, sakunna ba duss ma lilapassra man pipara, ba yua man pima kaka, man pruma.“

Sakunna piuta ba saura polli, mairinra balan

ban aisi: Ao, God manra ban wisatta, man ba duss ma wina pipara? Bara mairin piutara: „Yang nanni duss ma puk pisni, sakunna ba duss ma lilapassra God wisatta: „Man pipara, kangpara, man pima kaka, man pruma!“ Bara piuta mairinra bila: „Man prum' apia, sakunna God kaikissa, ba yua man pima kaka, man namkra langbia, man God baku kama, diara yamni puk, diara saura puk man tanka kaikma.“ Bara mairin kaiki duss ma yamni piaia, duss ma dakbi brin, bara pin, bara ai mayara yan, ba sin pi kan. Bara ai nakra langwan, ai musa koalla lua kaikan. Bara qua woaya bri ai musa bikan.

Tutnira ba nanni God bila baikra walan, witin inslara impaki kan. Adam ai maya woal duss tilara yukuan. Sukunna God winnan: „Adam man anserasma?“ Adam wisatta: „Yang bilam baikra inslara walri, yang sibrin ai daukan, yang nanni koalla lua kan, bamna yukuri.“ Bara God bila: „Ya mai win, man koalla luasma, man duss ma ba piam, yang mai wisattna pipara.“ Adam bila: „Ba mairin, man aikram, ba duss ma dakbi brin, bamna yang pisattna.“ Bara God mairinra: „Man diakan ban daukram?“ Mairin bila: „Piuta bui yang kupi ulakan, bamna piri.“ Bara God piutara: „Man saura daukram, bamna man biamrara quassma, tasba man pi kama! Nanara man mairinra waila takma, ai lupia nannira sin. Mairin lupia kumi man lallra taibia, sakunna man witin plakura samma.“ Bara mairinra: „Man lupiam sakma kaka, latwan uya brima, mayam man dawan kabia.“ Bara Adamra bila: „Man mayam bila walram ba, man duss ma

piram ba, yang pipara mai wisattna, na tasba saura takbia man mata, man mawan laptika wina plun saki pima. Tasba wina yang mai paskri, yang tasbara kli mai bikamna.“ Ba ninkara God ai napan kumi, ankila, pura wina blikan.

Adam Ewa woal ba insla wina kangbi takan, kli dimmaia apia.



3. Kain ai diura ikan.

Adam lupia woal sakan, kumi nina Kain, woala nina Abel. Kain insla dadaukra, Abel daiwan papakra. Yu kumi ba nanni diara bri Godra yaia balan. Kain duss ma yamni ai insla wina, Abel daiwan lupia kumi bribalan. Sakunna God Kainra yamni kaikras, witin kupia saura bamna, Abel mapara yamni polli kaikan, ai kupia, Godra luki bamna. Bara Kain kupia baiwan, ai mawan saura takan. God makabi: „Dia dukiara man lauisma? diakan man mawan ban takan? Ban apia sika, man yamni munnisma kaka, yang yamni mai kaimni, sakunna man saura daukisma kaka, diara

saura man wamtlara dimbia.“ Ba ninkara Kain bui ai diura woal aisin, witin nanni inslara wan, bara Kain bui ai diura mapara palan, assa ni ikan. Bara God bila Kainra: „Man diura annira sa?“ Kain bila: „Yang kaikras, yangna diura kakaikra?“ Bara God bila: „Man dia yaram? Man diura tala tasba wina yangra winnan! Nanara yang mai latubamni, tasba bui ai bila quakan, man diura tala mitam wina sakaia.



Man insla salkma kaka, sip ai ma bribi' apia. Man tanis impaki tauki kama.“ — Bàra Kain Godra: „Yang diara saura polli munri, ya ai kaikbia, ban ai ikbia.“ God bila: „Ban kabi' apia;“ bara diara ai lallra ulban. Ban Kain God mawan wina makka wan, ai maya ai lupia aikuki, bara tauan kumi makan. Ba ninkara Ewa kau kumi lupia waikna sakan, ai nina Set makan.

4. Li samra tara.

Adam almuk polli takan, ai mula, ai snawika nanni puk kaiki pruan. Metusala waikna woala almuk polli takan. Adam lupia nanni uya polli kan, tasbara bangwan, sakunna ba nanni puk kupia saura polli kan. God bila: „Upla buk yang bili walaia want apia, ai kupia saura bamna, nanara piua kau mankamni, 120 mani kau lubia, bara kaikamni, naki daukbia saba.“

Ba piua luan, upla puk kanra saura takan, bamna God bila: „Yang nanara upla puk, waikna, mairin, tukta nanni sin iki tikamni.“ —



Waikna kumi man, nina Noa God latwan brikan, witin kupia yamni bamna. — Bara God Noara wisatta: „Man slaup kumi paskram, purara uttla baku, maiara slaup baku, 300 klakla yerri, 50 klakla bila tara, 30 klakla purara (uttla tara).“

Kais yang li samra tara tasbara blikamni, sa-

kunna man, mayam, lupiam nanni aikuki slaup bilara aimakma, daiwan minira, piawira maïra maïra.“ —

Noa pot almuk kan, bara slaupra aimakan, ba ninkara li samra tara tasbara bal iwan. Li uya pura wina auan, li unta puk quawan, yu yawanaiska woal, timia sin baku takan. Noa slaupka li purara awan. Li samra ba ill nanni purara ulli wan. Kati mata-sip li samra ban kan, waikna, mairin, tukta nanni puk liura quappi pruan. Bara Noa kuskuspiram kumi slaup wina blikan, witin pali wan, kli balras, ba ninkara butku kumi blikan, sakunna baha pot kli balan.

Yu matlalkabi pura kumi luan, bara kli butku woala blikan, kais tutnira kli balan, yassu woaya ai bilara sammi bribalan. Ba ninkara butku woala



blikan, baha kli balras.

Bara Noa ai slaupka unta sakan, tasba lawan kaikan. Kati woal kau luan, bara Noa ai taya nanni kuki slaup wina taki wan.

Ba yuara Noa Godra ai pura sunnan. God wintinra bila: „Li samra tara yang kli blikamn' apia, tasba ban saukaia apia, sakunna upla kupia saura takan uria wina. Tasba ban kabia, duss ma uya pawu kabia, passa, li, diwas laya, mani, kakna, timia ban kabia.“ — Bara God kumadora kasbrikara mankan, tukin baku, ban aisi: „Naha kumadora t. kinka manra kabia, yang li samra tara kli blikamn' apia!“

5. Tauar Babelra.

Li samra tara pot luan, Noa ba waikna kau mani 350 iwi kan. Noa almuk polli takan, ai lupia nanni sin, sakunna ba wina upla woala almuk takras.

Ba piuara wita nanni upla woala saura polli munan, alba baku.

Wita kumi, nina Nimrod, Noa snawika tauan Babel paskan. Ba taim upla puk ai bila kumi aisi kan. Ba upla nanni luki kan, tauan tara paskaia, twira aoalla unra nina Euprates, ba lilapassra tauar,



uttla, tara, yerri polli walpa wina, kasbrika tilak paski ullaia, witin nanni turui takaia apia. Sakunna dia ba nanni luki kan, God misbara kaikan, ai kupia baiwan. „Kaissa,“ God wisatta, „yawan pura wina bal iupi, ba tauar slingbi saukaia, bila tanis ulakaia, bara ba nanni pana pana ai bila walbi' apia.“ Ba upla nanni makka takaskan, uttla ba paskaia, tasba banira puk turui wan.

6. Abraham winnan.

Ba ninkara waikna kumi, Abram aisuban. Ba taim upla uya tasba banira, sakunna puk saura, tanis dauki kan. Bara God Abramra wisatta: „Man tasbaiam wina taki was, man tamya nanni makka swis, tasba woalara was, ba yang mamrikamni! Man lupiam nanni upla uya kabia, yang mai tamsapamni, yang diara yamni polli maikamni, Yang diara yamni ba nannira yamni ba nanni sin yamni mai daukbia, yang ba nannira latubamni, ba nanni sin manra la-



tubi. Man wina upla puk diara yamni bribia.“ Bara Abram ai tasba wina makka wan, Lot ai tubani sin.

Ba ninkara Abram alba nanni Lot albika nanni woal unsaban, twi mata, ba bip uya brin bamna. Bara Abram Lotra: „Dia muna yawan unsabaia? Yawan ban daukbiara, yawan taya kumi. Upliki, man na mapara wama kaka, yang bukra wamni. Dia tasba man pliki brima?“ Bara Lot twi yamni pliki sakan, nina Siddim, Sodom, Gomorra bara kan, upla kupia saura iwi kan, sakunna Abram tasbara nina Kanaan bal iwan.

7. Abraham ai kupiara luki.

God Abramra bila: „Sibripara, Yang man karnikam, yang man woal kamna.“ Abram ai kupiara sari luki kan, witin lupia apu bamna.

Ba tutnira God winnan: „Abram, man wamtla wina taki bal, kais purara, slillma nannira kais, man sip kulkma saba? Man lupiam nanui ailall baku kabia.“ Abram ai kupiara ban luki, God bila kasak polli sika, witin ai kasakkira kulkan. Abram pot almuk takan, wan Dawan witinra balan, ban wisatta: „Yang God karna polli, yang maiwanra bui yamni bas. Yang kasak mai wimni, yang lupia uya maikamni. Man ninam Abram kli makbi' apia, sakunna na wina Abraham makbia. Yang lupa aissa mai daukamni.“

Ba ninkara wan Dawan Abrahamra balan, witin ai doorkara iwi, yu lapta polli. Witin ai nakra buki, waikna yumpa kaikan, ba nannira plappi wi

aisin: „Dawan, man kupiam pini yangra kaka, yang waitla ban lupara, bal dims! Yang li bribalamni, minam sikbaia, na duss mununtara iuram!“

Bara Abraham ai watlara dimman, ai maya Sara winnan: „Aini, tani uria dauks.“ Bara witin bip wina, bip tialka kaban, ba waikna nanni bri pin. Bara Dawan bila: „Mani woalara yang kli balamni, bara Sara man mayam lupia kuni bri kabia.“ Sara baha wali kikan. Dawan bila: „Dia Sara kikissa? Dia yang mai wiri, baha yang kasak daukamna.“ Bara Sara win: „Yang kikras polli.“ Sakunna God bila: „Ban apia, man kikattma!“

Bara waikna nanni bui, Sodomra wattaui impaki wan, Abraham woal wan. Dawan bila: „Naki ba diara man wina yukui kamni, dia daukamna? Yang mai kaikisni, man, lupiam sin God bila yamni wali ban dauki kama!“ Bara Dawan ai dara puk sakan: „Yang upla puk Sodomra iki tikamni, uttla puk pauta lakni ni ankamni, upla puk saura polli!“ Abraham ai pura sunni: „Allaï, ban daukpara, waikna 50 kupia yamni tilara kra sa.“ Dawan bila: „Waikna yamni 50 bara kaka, yang upla puk ikamn' apia, ba nanni dukiara.“ Abraham wisatta: „Sakunna yawanaiska woal yamni bara kra sa? ban kaka man upla puk saukma?“ Dawan bila: „Ban apia.“ Abraham kli makabi aisin: „Sakunna 30?“ „ban apia,“ bara „20? matawoalsip?“ Dawan bila: „Yang upla puk saukamn' apia, waikna matawoalsip yamni tilara bara kra sa.“ Bara wan Dawan purara wan, Abraham kli ai watlara dimman.

8. Sodom, Gomorra.

Tutni pot aimakan, bara ankila woal Sodomra dimman. Lot ba nanni kaiki, lamara wan, ban aisi: „Upli, bal yang waitlara dims, bara iwaia.“ Ba nanni ai bila wali, ai watlara dimman. Sakunna upla puk Sodom wina ba timiara diara saura munnan, Lot watlara dimmaia want, bamna ba ankila witin nakra prakan, bara ba nanni Lot watla sip sakras. Ankila Lotra: „Man lupiam, man tamya yauka titan na tauan wina bri was, yang nanni uttla puk anki saukamni.“

Lot ban wisatta, sakunna ai dapnika woal lawaskara kikan, sip waras. Titan kabi ankila bila: „Lot, aini bal!“ Bara ba nanni Lot, ai maya, ai lupia mita ni alki bri wan, ban winnan: „Aini bal, suak takaia, yang ninira bal, man ninamra wattauikaikprama, na tasbara kli takaskaia apia.“ Bara lapta baiwi ulli balan, Lot Sodom wina taki wan, Zoarra dimman. Sakunna Dawan pauta lakni pura wina blikan, Sodom Gomorra uttla puk ankan, tasba puk saukan, upla puk ammi pruan.



Ba tasba yamni katta, nanara kabo pruan wat-tauan. Sakunna Lot maya wattaui kaikan, bara walpa sal baku takan.

9. Ismael.

Abraham lupia kumi bri kan, nina Ismael, Hagar biarra wina. Ba ninkara Sara lupia tawakia sakan, nina Isaak. Ismael ba tukta saura kan, ai moinira diara saura smalkan, bamna Sara bila ai mayara: „Naha mairin ai lupia woal uttla wina kangbrika taki wap.“ Abraham ba mita sari lukan, sakunna wan Dawan bila: „Kupiam lukpara ban dauks, dia Sara mai win. Isaak wina man lupiam nanni diara yamni bribia, sakunna ba mairin lupia sin lupa aissa daukamni.“

Yu woalara Abraham ba mairin Hagar ai watla wina blikan, patta tani, li sin yan, bara Hagar ai lupia woal impaki wan. Bara twira tanis tauki kan, li sut din, li unta apu kan. Hagar ai lupia umpira duss mununtara tniki swin, tnaya woalara iwi, ban



luki kan: „Yang lupiki pot prubia, yang ba kaikaia apia.“ Bara God ba lupia bila baikra wali, ankila kumi blikan, witin pura wina winnan: „Dia innisma, Hagar? kupiam lukpara, bara kais!“

Bara Hagar ai nakra buki, li unta kaikan, li panki ai lupiara dakakan. — Ba tukta yamni paw, waikna karna takan, witin panta manka dauki, trisbaia lulki kan.

10. Isaak.

Ba ninkara God Abraham trai kaiki ban wisatta: „Isaak ba bris, man lupiam kumi latwankira, bukra was ba tasbara Moria, ba ill purara yang mamrikamni, man lupiam ikaia, yangra puram sunnaia.“ — Ba titan polli buan, ai beriko purara ullan, alba woal bri wan, ai lupia Isaak sin. Yu yumpa impakan, bara ba illka lai wina kaiki kan, bara ai albara win: „Man nanni beriko woal nara bas, yang, lupiki woal bukra wamna, yang puri sunnaia.“ Witin skiro



tara, til sin briwan, ai lupia pauta twilkan, ban ba woal impaki wan. Bara Isaak bila: „Aissiki, pauta narasa, til sin, sakunna annira daiwanka ikaia, yawan pura sunnaia?“ Abraham bila: „Yang lupiki, God daiwan ba mairikbia, ba yang ikamni.“ Ban ba nanni ai kupiara luki ill purara ulli wan. Bara Abraham walpa wina altar paskan, ba purara pauta mukaia, ai lupia mita priskan pauta purara, bara skiro bri, ai mita bukan, ai lupia sabaia. Ban issa, ankila pura wina winnan: „Abraham, man lupiam mitam ni kangpara, ikpara! Nanara yang mai kaisni, man God bila kasak walisma, man kupiam param, lupiam kumi ban yaia.“ Bara Abrakam ai nakra buki ram, daiwan kumi kaikan, arinkara unta twaknira alki bri kan, bara ba ramka bri, skiro ni ikan, Godra ai pura sunni ankan.

Ba ninkara ankila kli pura wina winnan: „Abraham, God bila, kasak polli, man ban daukram, man lupiam kumi yaia, bamna yang mai tasapi diara yamni maikamni; man lupia uya brima, sillma nanni baku, ailall kabia, man musam wina upla puk na tasbara diara yamni bribia, man yang bili walram bamna.

11. Sara pruan, bikan.

Abraham almuk takan, witin mani 137 kulkan, bara Sara ai maya Hebronra pruan. Mani 60 ba tasbara Kanaan iwi kan, sakunna witin tasba apu. Witin bip, arrass uya bri kan, sakunna witin twi apu. Nanara witin tasba uria atkaia want, ba tasbara ai maya pruan bikaia. Bamna Abraham wita

nanni makabi walan, tasba atkaia. Ba wita nanni bila: „Tasba ba baki ban brima;“ sakunna Abraham mana aibapaia want, bamna 400 sekal lalla pini aibapan; ba tasba Makpela atkan.

Bara witin Sara ai maya walpa untara bikan, tasba nina Makpela, Hebron lamara.



12. Isaak ai maya brin.

Abraham almuk polli pot takan, bara ai napa-kan almuk tasbara ba nina Mesopotamia blikan, ai lupiara Isaak mairin kumi bribalaia. Ba waikna kamel 10, briwan, diara yamni puk ba purara auban, baha mairinra yaia.

Ban impaki ba tauanra balan, li untara takaski, Godra ai pura sunnan: „God, yawan aissa wan Masterka! yamni dawankira muns. Ya mairin balbia, yang bili: li panki uri' aik, yang dimna. Ban wibia kaka: ao, dis, yang man kamel nanni sin li daka-kamni, baha mairin Isaak maya kabia.“

Bissiura ai pura sunnan, bara Rebekka Betuel lupia balan li pankaia. Waikna ba bila: „Li panki

uri' aik, dimna!" Ba mairin win: „Ao, dawanki, dis, yang man kamel nanni sin li dakakamni.“ Bara li untara wan, li pankai. Ba waikna ba bila wali, kupia laptiwan, matdinka lalla pauni bri, witinra yan. Witin makabi: „Kiki, man ya lupia?“



Bara win: „Yang Betuel lupia, Nahor mulika.“ Bara ba waikna kli ai pura sunnan: „Yang God mayunnaia, witin yamni dawankira daukan, witin na tasbara yamni ai bribalan.“ Titan woala win: „Kaissa, yang kli dawanra wamni, nara takaskaia apia.“ Ba nanni Rebekara makabi: „Man wama ba waikna woal?“ Mairin ba bila: „Ao, yang wamni.“ Ba nanni win: „Kiki, God yamni mai daukbia!“ Ban Rebekka wan, Isaak maya takan.

13. Jakob Esau woal.

Isaak mani 60 luan, bara Rebekka sutki sakan, tawakia ba musa tamaira, woala musa lalalni. Al-

mukka nina Esau, insla dadaukra, woala nina Jakob, ai aissa baku, kamel, bip daiwan papakra. Isaak lika Esau kanra, sakanna Rebekka ai plasni kanra latwan brin.

Yu kumira Jakob plun pain, snik piakan, bara Esau unta wina balan, plun polli dauki kan. „Plun uri' aik, snik ba wina, yang plun ai daukissa.“ Jakobra win, sakunna witin bila: „Ban kaka, yang na wina wita kamna.“ Esau ban luki kan: „Kais, yang pot pruamna, dia dukia brimna?“ Ban aisi, plun ba bri pin.

Isaak almuk takan, ai nakra pukni takan, ban luki: „Yang pot' pruamni.“ Bara ai lupia Esau winnan: „Kais yang almuk takri, yang kaikras, akia pruamna! Was untara, sula kumi iki bribal, yang ba pimni, bara yang mai tamsapamni.“

Esau baha wali, untara wan, sakunna Rebekka, baha sin wali, daiwan ankan, bara ai plasni Jakob aissikara blikan; witin dimmi ban wisatta: „Aissiki.“ Isaak bila: „Man yamna lupiki?“ Jakob bila: „Yang Esau man tawakiam, ba wina auni bri pis, bara bal, ai tasapaia.“ Aissika ai mita ni witin alki kaikan, Esau tamaira, Jakob lalalni. Sakunna Rebekka daiwan taya brin, ai mitara dinkan. Isaak wisatta: „Bila baikra ba lika Jakob, sakunna mita lika Esau mita.“ Kli makaban: „Man polli yang lupiki?“ Witin aisin: „Ao, yang Esau!“ Bara wina bri pin, li din: „Nara bal, ban wisatta, lupiki, ai kia walaia.“ Bara witinra tasapi ban win: „Wan aissa pura wina diwas laya maikbia, diara yamni puk. Upla puk manra balbia, man napakan takbia, man



moinikam sin. Saura ba, ya manra saura mai munni, pana sin yamni ba, ya yamni mai mun-nissa.“

Jakob ai aissa watla wina taki wan, Esau unta wina balan, wina anki ai aissara bri wan: „Bus, aissiki, wina auni bri pis, man lupiam mita wina.“ Bara Isaak kupia laptiwan, ban aisi: „Dia? annira ba waiknika, ya wina bri sal aikan? Yang pot piri, yang witin tasapattni; ao dia munri, ban kabia.“ Bara Esau karna inni aisin: „Yang aissiki yangra sin tasapaia.“ Witin wisatta: „Man diurikam kun-nin ai munni balan, diara yamni man wina saki brin.“ Bara Esau kanra inni kan. Isaak bila: „Kais, kupiam lukpara, man sin tasba yamni bata-nira brima, diwas laya man namslara iubia, sakunna man alba takma moinikamra.“

Esau kupia baiwan, ai moinira laui polli, bila saura aisin: „Yang aissiki pot sari polli kabia, yang

moiniki Jakob ikamni.“ — Yapti baha walan, plas-nira win: „Lupiki, aini na wina was, laikrara Labanra, ba tasbara Haran iwaia.“

Jakob ai aissa watla swi wan, impaki tauki kan, sakunna witin nanara kaiki kan, ai aissara diara saura daukan, kunnin aisin.

Tukta nanni! amman kais, kunnin aisapara. Jakob ai aissara kunnin aisi, ban daukpara, sakunna man kupiamra luki bas, dia God maikaia want, ban maikbia.

14. Jakob impaki.

Jakob ai aissa watla wina makka wan, witin kau aisin: „Lupiki, na tasba wina mairin bripara, sakunna laiura was, Laban lupia mairin kumi bris.“ Ban impaki timiara untara dimmi, ai lall walpara kaban, bara yapri saukan kaikan: Yamanmanka kaikan na tasba wina lai kasbrika purara, God ankila nanni impaki bal iwi kli ullan. Kais bana purara God bui katta, ban bila: „Yang Abraham Godka, Isaak Godka, man aissikam, naha tasba yang maikamni. Kais, yang man woal kamna, yang mai swimn' apia.“

Ba titanra Jakob buan, ai kupiara lukan: „Naha tasba yamni polli sika. Kasak, God watla narasa, doorka ba sin.“ Bara walpa tara buki bapan, ba tasba nina „Bethel“ „God watla“ makan.

Ba ninkara ainwa impaki Labanra balan. Bara Jakob li untara mairin kumi, mawan yamni, Laban lupia, nina Rahel prawan ba mairin latwan brin, ba dukiara ai dapnara mana work daukan.



Sakunna Laban lupia mairin woal brin, bamna witin Lea almukka Jakobra yan, Rahel kau yaras.

Laban bila: Man kau mani matlalkabi pura kumi Rahel mata work daukma.

Ba mairin nanni lupia waikna 12 sakan nina Ruben, Simeon, Levi, Juda, Dan, Naphtali, Gad, Asser, Isakar, Sebulon, Joseph, Benjamin.

Ba piua suttakan (mani 14) kau mani matlalkabi Laban woal iwi kan; witin kamel, bip, daiwan uya brin, baha ai mana sika. Laban baha kaikan, tummi kan. Bara Jakob ai maya woal inslara winnan, ai dukia puk quaki, ai daiura puk bri wan, Labanra maisa pakras. Laban yumpa yapan, baha wali ai nina bliki wan, yu matlalkabi pura kumi karna impaki Jakob kli alkan. Sakunna God Labanra pot win: „Amman kais, man Jakobra diara saura munpara, witin woal yamni aisas!“ Bara Laban witin woal unsabras, ai uplika baku kli brin; bara ba

nanni ai watlara aika kli wan. — Jakob upla nanni aikanra blikan ai moinira, witin maisapakaia, moinikam Jakob aula. Esau baha wali, wan witin woal prawaia, sulliar 400 brin. Jakob sibrin polli, ai taya nanni, ai upla nanni, daiwan nanni nampara ulakan ban aisi: „Esau balbia, woala ikbia kaka, upla woala suaktakbia.“ Bara Jakob ai pura sunnan: „Yawan aissa, Godki, Dawan, yangra wisattma: man tasbara kli taui was, yang yamni mai daukamni; yang balri, naha dussa man bri kattni, ba aoallka luattni, nanara yang taya, lupia uya, daiwan uya brissni. Nanara yang moini mita wina ai saks; man ban wisattma bara: Yang yamni mai daukamni.“ Bara kamel, bip yamni pliki kan, ai moinira yaia, ban wisatta: „Naha daiwan nanni Jakob albi-kam ai Masterkara blikan.“ Bara Jakob ai upla nanni puk tingni Jabok bailara bri wan, sakunna witin yakan polli kan.

Ba timiara waikna kumi witin woal aiklabi kan, ban lalauan. Lallma kabi kan, bara ba waikna bila: „Kaissa, makka ai swis. Yu pot ingni takan.“ Jakob bila: „Yang mai swimn' apia, man diara yamni ai munras kaka.“ Bara waikna makaban: „Man ninam dia?“ „Yang nini Jakob.“ „Yang mai swirka wamn' apia man yangra taisapras kaka.“ Bara ba waikna bila: „man ninam kli Jakob makbi' apia, sakunna Israel man ninam kabia. Man God, waikna woal aiklabattma, man dawan takan.“

Bara Jakob ai moinika aula kaikan, ai mawan tasbara bauan. Esau mapara plappi wan, ai nana alki inni kan. Jakob maya, lupia nanni sin Esaura



lakula win. Bara Esau ai watlara makka wan, Jakob ai aissara kli balan, ba tasbara Kanaan iwaia.

15. Joseph atkan.

Israel lupia 12 bri kan, kumi nina Joseph, Rahel lupia; plasnika Benjamin kan. Israel ai lupia Joseph kanra latwan kaiki kan; Josephra prak pain, mapla uya bri, yan. Moinika nanni bamna witinra misbara kaikan, witin woal yamni aisaras. Bara Joseph yapri saukan kaikan: witin ai moini nanni aikuki inslara kan, ba nanni plato wita nanni, witin plato ra wita lakula wi bauan. Moinika nanni baha walan, kanra misbara kaikan. Ba ninkara Joseph win: „Yang yapri saukan kaikri: Lapta, kati, slillma nanni puk yangra lakula wi bauan.“ Ai aissa ba wali wisatta: „Polli, yang, man yaptikam, man moinikam sut manra bal lakula wi luli krikamna ki?“ Sakunna aissaka baha tanka ai kupiara luki kan.

Yu woala Israel ai lupia blikan, ai moinika nanni kaikaia, dia daukissa ba. Ba nanni laiura wan, bip kamel nanni twira dakakaia. Ai moini nanni Joseph lai wina kaikan, pana pana aisi kan: „Kais, yapri saukan kakaira aula bika, kaissa ikpi, bara



kaikamni, dia yapri saukan kaikan.“ Sakunna Ruben tawakia bila: „Ban apia, wan moini talia sip sakbi’ apia, kaissa na unta paknira lullkpi.“ Witin ai kupiara luki, moini ba unta wina kli yukui sakaia.

Bara ba nanni Josph umpira li untara lullkan, ba yua Ismael nanni balan, tasba woalara waia. Juda ai moini nannira: „Kaissa, witin atkpi lalla mana. Bara ba nanni Joseph li unta wina saki, Ismael nannira atkan. Bara Joseph praka bri, dai-

wan kum' ikan, bara tala ni yukan, ai aissikara bribalan, makabi: „Naha praka man kaikisma, yang nanni sakri, man lupiam dukia saba?“ Israel al-muk inni ban win: „Yang lupiki praka, daiwan saura witin kalki pin, limi saura Joseph umpira kalkan.“ Bara ai lupia woala balan, ai aissa maisanikaia, sakunna sip apia. Israel ban win: „Yang lupiki pruan. Yang sin pot raitira baui wamni.“

16. Joseph Aegyptenra.

Ba Ismael nanni Joseph alba atkan, Potiphar, king wita witin brin. Ba waikna kaikan, Joseph woama yamni, auyama, ai watlara wita mankan. Sakunna Potiphar maya, mairin saura, ai kupia ula-kaia want, sakunna Joseph witinra bila: „Naki yang diara saura ban daukamna, God mawanra?“ Ba mairin baha kaikan, ai kupia baiwan, ai mayara win: „Joseph ai saura munni.“ Potiphar baha wali, witin silakra mankan, sakunna Dawan Joseph woalkan.

Bara king waikna woal silak watlara mankan, kumi tani aiankra, woala wain lalaikra. Ba nanni Joseph woal silak watlara iwi kan. Titan kumira ba nanni sari polli kan, witin nanni yapri saukan, diara kaikan, sakunna dia tanka sakaia, sip kaikras.

Joseph bila: „Tanka sakaia, God yakan Dawan, sakunna ban ai wis.“ Wain lalaikra ba bila: „Yang wain dussa, tnawa yumpa, tilwi kan kaikattni, ba dussa paw, tangni baiwi ban kaikattni. Bara yang woaham ba bri. king kopkara taibi laikattni, bara king wain disatta.“

Joseph bila: „tnawa yumpa, ba yu yumpa. Yu yumpa yapka king na watla wina mai sakbia, bara man kingra wain laiki kama. Sakunna yangra luki bas, man yamnisma kaka, kingra maisapaki, na watla wina ai sakaia.“

Ba waikna woala, tani aiankra baha wali, tanka yamni katta witin aisi kan: „Yang yapri saukan kaikri, bara yang tani yumpa lallra twillkattni, bara piawira balan ba wina pin.“ Joseph bila: „Tani yumpa ba yu yumpa. Bara king na watla wina mai saki, dussra mai ulankbia, bara piawira man winam pibia.“

Yu yumpa yapan bara king ai yua aisuban yamni daukan, ba wain lalaikra kli ai watlara winnan, kopra kli wain laikaia, sakunna ba tani aiankra dussra pamman. Ba lalaikra Josephra lukras polli, witin kau mani woal silak watlara yakan ban iwi kan. — God ba piua kaikissa, ai uplika sakaia.

Mani woal kau luan, bara king Pharao yapri saukan kaikan, sakunna upla nanni ba tanka sip sakras. Bara lalaikra kingra win: „Yang waikna woama kumi ba silak watlara kaikattni, witin dawan tanka sakaia.“ King ai sulliar blikan, Joseph ba silak watla wina winnaia. Bara king bila: „Yang yapri saukan, sakunna ba upla puk tanka sip ai wiras. Yang pot walri, man dawan, baha tanka sakaia.“ Joseph bila: „Yang lika apia, sakunna God bui tanka kupira mankbia.“ King ban win: „Yang yapri saukan kaikri, yang ba aoalla, nina Nil unra bui kattni, bara yang kaikri: bip batanira matlalkabi pura kumi aolla wina taki balan. Ba

nanni inma pi kan. Ba ninkara yang kaikri bip woala biawan, saura aoalla wina taki balan. Bara ba bip saura ba bui bip woala batanira puk pin, sakunna ba biawan kau ban kan. Bara yang kupi tankrawan.

Bara kli yapri saukan kaikri, matlalkabi pura kumi aya wita yamni, kluban, tara sin, ba ninkara aya wita woala saura laura, ba nanni laura bui woala yamni puk pin.“

Joseph kingra bila: „Baha woal tanka kumi sika, God kingra wibia, dia daukbia. Ba bip nanni yamni batanira, ba aya wita matlalkabi pura kumi kluban, ba mani matlalkabi pura kumi yamni plun uya polli kabia, ba bip nanni biawan, aya laura saura ba mani matlalkabi pura kumi plun apu, pattas kabia.

Kais, nanara mani matlalkabi pura kumi na tasbara balbia, yamni pattira, ba ninkara mani matlalkabi pura kumi pattas polli kabia. Baha king aima woal yapri saukan kaikan, God nanara kasak polli ban daukbia. King bamna yarka waikna kumi sins kira plikaia, ba na tasbara wita mankaia.“

King ba tanka yamni walan. „Yang annira waikna woala sakamna Joseph baku, witin winara God lilka dimman.“ Ban luki, witin Joseph wita ai tasbara mankan. Bara Pharao ai matdinka ai mita wina saki, Joseph mitara dinkan; koalla pini pain polli Josephra yan, lillura, lalla pauni wina ai nanara mankan. Ai upla nannira winnan: „Man nanni puk Joseph mawanra lulam kriks. Witin wita polli takan, dia mai wibia, baha dauks.“

Ban yang kaikisni, naki God Josephra daukan,

naki ai aissa watla wina li untara dimman, li unta wina silak watlara, silak watla wina wita king baku takan.

17. Joseph moini nanni Aegyptenra.

Dia God aisi katta, ban takan. Ba mani matlal-kabi pura kumi plun uya pattira balan, Joseph aya, rais duss ma uya asla kukan, ai uttla nanni puk bangkan. Sakunna ba mani luan, mani saura sin aimakan, upla uya tasba bani wina Josephra wan, patta, aya atkaia. Bamna ba upla nanni Kanaan wina sin balan patta atkaia. Israel almuk ai lupia nannira win: „Man nanni dia lukisma? yang walri, Aegyptenra aya patta uya sa atkaia, bara was plun atkaia, apia kaka, yawan puk prubia.“ Bara moinika nanni matawoalsip wan, Benjamin yakan ai aissa woal uttlara kan. Ba nanni Joseph watlara dimman, ai lula krikan witin mawanra, lakula wiaia. Joseph ba nanni lattan kaikan, sakunna witin karna aisin, kupia pini apia, ban: „Man nanni anni wina balram?“ Ba nanni: „Tasba Kanaan wina balri, patta atkai mata.“ Joseph bila: „Man nanni tasba kaikaia balram, man nanni upla saura atia.“ Ba nanni: „Ban apia, dawanki. Yang nanni puk moini atia, waikna kumi lupia nanni, plasni ai aissa woal sa, kumi laptiwan.“ Joseph bila: „Yang mai trai kaikamni, man kasak aisisma saba. Kumi blikram, plasni ba bribalaia, man nanni woal silak watlara nara kama.“ Bara witin ai moini nanni puk silak watlara mankan.

Yu yumpa luka ba nanni kli winnan, ban aisin:



„Yang diara saura mai munnamn' apia, kumi yang nara takaskamni, man nanni woala kli was aissikamra patta aya atkram, ba puk briwaia, sakunna plasni ba man kli balma kaka, bribal; ban apia kaka man pruma!“ — Bara ba moini nanni aikuki aisin: „Yang nanni wan moinira diara saura daukri, yawan witin kaikri, makabi inni: ban ai daukpara, sakunna yawan walras, bamna God bui ai tala mana yawan wina sakissa.“

Ba moini nanni kaikras, Joseph ai bila wali kan, sakunna witin ba bila wali ai mawan ulakan, bara nakra laya uya takan.

Ba ninkara Simeon priski, silak watlara mankan, ba moini woala kli ai tasbara Kanaan wan.

Sakunna Israel almuk baha wali, sari polli ku-

piara dimman ban aisin: „Man nanni lupiki puk yang wina tikram, Joseph laptiwan Simeon sin apu, Benjamin sin bri tikaia wansma. Diara puk saura yangra wattauan. Yang plaisni ban blikamn' apia.“

18. Joseph moini nanni kli Aegyptenra impaki.

Ba tasbara Kanaan plun apu polli kan, bamna aissika bila: „Kli was patta atkaia.“ Lupia nanni bila: „Man Benjamin blikma kaka, yang wamni.“ Jakob bila: „Ban kaka, plaisniki bri was. God yawan aissa witin dawan polli, ba waikna kupia manra ulakbia, Simeon kli blikiaia, plasnika sin, sakunna yang umpirasni, lupiki puk tikri baku.“

Bara Joseph walan, ba moini nanni kli balan, ban witin nannira aisin: „Man aissikam almuk ba nakissa? Baha ai plasnika? God yamni mai daukbia, lupiki.“ Ban aisi, bara ai kupia swapni takan, ai watlara wan, ai nakra laya dikan. Bara ai mawan sikbi kli balan, ai kupia priski bal takan, ai moini nanni witin woal plun piaia paiwan. Bara puk aikuki pin. Ba nanni auyapa kan, pana pana aisin: „naha dia tanka?“

Ba ninkara Joseph aya, patta ai kuara dinkaia win, lalla sin purara, Benjamin kuara ai kopka dinkan. Ba nanni tisku wan, bara Joseph ai sulliar ninara blikan, ban bila: „Man nanni diakan saura daukram, yang yamni mai munri?“ Ba moini nanni wattau ai pana kaikan: „Yang nanni kaikras, dia aisisma.“ Witin bila: „Ba tanka man walras, dia aisisni? Ya dawanki kopka implikan?“ Ba nanni aisin: „Yang nanni implikras, ya ba kopka brin,

witin makka prubia, yang nanni puk nampakan tak-bia.“ Bara witin kua puk saki plikan, Benjamin kuara kopka sakan. Bara ba moini ai praka kalki, kupia laptiwan, puk tauanra kli wan.

Joseph ai moini nanni kli kaiki, ban aisin: „Man nanni diakan ban saura yaram?“ Juda bila: „Dia Masterkara wimni? naki aisaia? God puk sakan, yawan patitara diara saura daukri. Kais yawan puk man nampakan kabia.“ Joseph bila: „Ban kabi’ apia; ba uplika man kopki brin, yang naipakan kabia, man nanni kli man aissikamra drubi wama!“

Bara Juda yamni aisin: „Yang ban kli wamn’ apia; Benjamin apu kaka, yang aissiki makka prubia. Yang nara kamna, man nampakan, yang aissikira aisattni, ba tukta kli bribalaia; bamna plasni kli blikram.“

Joseph baha walan, ai kupia latwan, ai nakra laya dikan, ban winnan: „Yang bui Joseph, man



moinikam, yang aissiki kau raya sika?“ Ai moini nanni baha bila walan, sip aisaras, taiwan, walpa

baku takan. Joseph bila: „Laimara bal; yang man moinikam, Joseph bui, ya man nanni atkram Aegyptenra, sakunna nanara kupiam lukpara, God bui ai nara blikan, upla uya raya sakaia.“ „Aini was, aissikira, naha tanka wis, diara puk, man kaikram; aini was, man aissikam bri, pot kli bal!“

Bara Benjamin nanara alki innan, ba sin innan, ai moini nanni puk kia walan, witin woal aisin.

Bara Joseph win: „Yabakra unsabaia apia, aini was.“ Ba nanni auyapa kli Kanaanra wan.

19. Jakob Aegyptenra wan.

„Joseph kau raya sika, witin wita ba tasbara takan!“ ban Inpia nanni ai aissara win. Sakunna Jakob almuk ban ai kupiara lukras. Sakunna Joseph bila walan, ba kariot kaikan, dia ai lupia blikan, ban wisatta: „Sipsa, Joseph, yang lupiki, kau raya sika, yang wannu, witin kaikaia, bara yang pruanmi.“

Bara Jakob ai lupia nanni woal, mula nanni sin,



ai daiura puk kuki brin, Aegyptenra wan. Joseph taki wan, ai aissa woal prawaia, witin kaiki, ai aissa nanara alki, uya innan. Bara Israel Josephra bila: „Yang makka pruumni, man mawan yang kaikri, man kau rayasma.“ Bara Joseph ai aissa kingra briwan. „Mani an brisma?“ King bila. Jakob win: „Mani 130 pot luan, wika apia, sakunna saura polli kan, yang damika nanni kanra almuk takan.“

Kau mani 17 Jakob ban Aegyptenra iwan. Ba piua baila kan, Joseph ai lupia woal bribalan, ai aissa almuk kaikaia. Israel Josephra bila: „Yang ban lukras polli, man mawan kli kaikaia, kais naiwa yang man lupiam sin kaikuni.“ Bara Israel ai mita buki, Joseph lupia nannira tasapaia, ai mita aikika Ephraim plasnira kaban, ai mita smika Manasse tawakiara kaban, ban aisin: „Baha Godka, yang aissiki ai mawanra yamni wappi kan, ba God yu bani ai dakaki kan, ba tukta nannira yamni dauk-bia.“ — Ba ninkara Israel ai lupia nanni puk winnan, bara lupiara bani tasapi yamni aisi daukan. Baha sut aisin, ai lall tnikan, bara pruan.

Ai lupia nanni aissa pruan Kanaanra briwan, bara bikan. Ba wina kli balan, moini nanni sibrin kan Joseph mata, witinra makabi walan, sakunna Joseph bila: „Kupiam lukpara; man nanni saura ai munnaia lukattma, sakunna God bui puk yamni daukan, upla uya raya sakaia.“ Nanara man kaikisma, dia dukiara Joseph ai moini nanni traikaiki ban daukan. Witin saura daukaia want apia, sakunna kaikaia, naki ai moini nanni ai aissara, ai plasnira daukan kaia.

Ban Joseph ai moini nanni woal yamni iwi kan, ai mula, ai snawika nanni sin kaikan.

20. Moses.

Israel lupia nanni uya polli takan, sakunna Joseph pruan, ba ninkara king woala takan, witin Israel nannira misbara kaikan. Witin bila: „Ba tukta lupia waikna Israel wina puk ikpi“ ban daukan, alki brin aoallara lullkan.

Ba piuara tukta waikna aisuban, yaptika witin yukuan kati yumpa; ba ninkara pataki pitbi daukan, ai lupia bilara mankan, aoallara iki swin. Yu woala king lupia mairin aitibaia balan, pataki kaiki, bukutki sakan: kais, tukta lupia yamni inni katta.

„Israel lupia kumi sika“ wisatta. Bara lakrika lamara bui kaiki kan makabi: „Yang mairin kumi winnamna ki, tukta tiala dakakaia.“ „Ao, ban dauks, was“ — king lupia win. Lakrika ai yapti winnan. Ban yaptika ai lupia paki kan, king watlara, ai nina Moses makan, ba wirara „li wina sakan“.

Moses ban king watlara waikna pawan, upla bani luki: king mulika sa. Sakunna Moses ai kupiara sari kan, ai uplika nanni alba baku takan. Yu kumi witin impaki wan ai moini nanni kaikaia, bara Aegypten waikna Israel waiknara prukan, Moses kupia baiwan, ai ispara saki Aegypten waikna sabi ikan. Moses ai kupiara luki: „Dawan ai blikan sakunna upla woala ban lukras. King baha wali, Moses tasba woalara makka plappi wan. Kabo pauni lamara iwi kan.“ Ba wina Jetrora wan, ai daiura plun dakakaia.

21. Moses, Pharao.

Moses mani 40 pot luan, Aegypten winā wan, mani 40 ba twira iwi kan, daiura dakakissa.

Bara yu kumira unta ammi kaikan, sakunna unta sip amras. Lamara wan, dia saba kaikaia. Bila baikra walan unta winā: „Moses, Moses.“ Witin bila: „Yang narasni.“ Bila baikra: „Lamara balpara! man suskam minam winā daiki saks. Ba tasba man buisma, tasba yamni sika.“ Ba ninkara God bila: „Yang man aissikam Godka, Abraham Godka, Isaak Godka, Jakob Godka.“ Bara Moses ai mawan bikan, witin sibrin kan, Godra kaikaia. God kli bila: „Yang Israel nanni umpira, alba baku kaikri, yang Aegypten winā mai sakamni, tasba yamnira bribalamni, baha tasba tara, pain sika, nasma bip uya brissa. Nanara bal, yang mai blikamni kingra, Israel nanni Aegypten winā sakaia.“ Moses kli bila: „Yang yasna, yang kingra waia?“ „Yang Israel nanni Aegypten winā sakaia?“ Bara Dawan bila: „Kasak, yang man woal kamni.“ Sakunna Moses bila: „ba nanni ban lukbi' apia; yang bili walbi' apia. Ban wibia: Dawan manra balras, mai blikras.“ — God bila: „Dia mitamra alkisma?“ Witin aisi: „duss.“ Dawan bila: „Baha tasbara lulkram.“ Bara Moses tasbara lulkan, piuta takan, witin sibri plappan. Dawan bila: „Kli waikara alki bris,“ bara alki, piuta kli duss takan. God kli bila: „Mitam lamara dinks,“ ban dauki ai mita bulpis takan. Dawan bila: „Mitam kli dinks.“ Ban dauki, ai mita kli ainwa takan.

Ba nanni bili walras kaka, aoalla wina li panki bris, tasbara laiks, bara li tala takbia. Bara Moses bila: „Allai, Dawanki, yang umpirasni, yang twissi twakni sa.“ God kli bila: „Ya twissam maikan? Ya waikna daukan? Yang bui daukras kattna? Yang Dawan apia? Bamna was, kupiam lukpara, yang mai smalkamni, dia aisama ba. Kais man moinikam Aaron manra balbia. Yang bili moinikamra smalks, witin baha king mawanra ban aisi kabia.“ — Ban katta. Moses Aaron woal Israel almuk nanni aikuki winnan, ban aisi: „Israel God-ka, wan Dawan ai blikan, man nanni na tasba wina briwaia!“ Ba wina kingra wan, ban aisin: „God Dawan ban bila: yang upla nanni swirka wabia, yu yamni twira daukaia.“ Sakunna Pharao wisatta: „Ya ba Dawan, yang ai bila walaia sa? Yang Dawan ba kaikras, yang Israel sip blikamn' apia.“

Bara ba yua wina Pharao bila: „Israel nanni kanra work takaia.“ Moses ai dussa lulkan, bara piuta takan, sakunna sukia nanni baku munnan, king baha ai kupiara lukras. Pharao God bila walaia want apia, bamna Dawan Moses blikan, mirakula saura daukaia. Moses ai dussa aoalla purara buki, aoalla aiska tala daukan.

Aaron ai mita kabo purara bukan, bara sukling uya polli balan, tasba aiska bangwan, uttla, diqua kami sin. Bara Pharao Mosesra win: „Allai, Dawanra puram suns, sukling ba puk tasba wina sakaia, bara yang Israel nanni blikamni.“ Moses ai pura sunni, ba yuara sukling puk pruan, tasba ba



bisbaia takan. Sakunna Pharao ai kupia kanra saura daukan; Israel nanni sip blikras.

Bara Aaron ai dussa kli bukan, bara uya puk kua takan, uplara sammaia, daiwan nanni sin. Bara Sukia bila: „naha God mita sika.“ Sakunna Pharao kupia saura takan.

Kua luan, bara ulu uya balan, daiwan uya pruan, kamel, bip, beriko, arras uya polli pruan, sakunna king kupia saura ban kan. Bara Moses yampus ai mita ni bri, king mawanra tasbara kriwi yakauan.

Bara yukri siksa waiknara mairinra takan, sakunna Pharao kupia kanra saura takan. Moses ai dussa bukan, bara alwanni, umyula karna takan, prari tara sin, bara duss uya kriwi kauan, upla, daiwan uya pruan. Ba ninkara Pharao Mosesra winnan. „Aini bal, yang saura daukri, man Godra puram suns, umyula alwanni takaskaia.“ Moses la-tara wan, ai pura sunnan, ai mita bukan bara alwanni takaskan, sakunna Pharao saura polli takan.

Bara lallma passa kraui kan, krukru uya briwan, tasba aiska bangwan, duss nanni puk pin. Pharao Mosesra kli winnan: „Yang saura daukri, kau kumi ban swis.“ Bara Dawan diwas karna blikan, krukru puk buki, kabo paunira lulkan. Sakunna Pharao kupia saura takan.

Moses ai mita kli bukan, bara Aegyptenra yu yumpa timia tara takan, upla nanni sip buras, sip daukras. Sakunna Gosenra ba tasbara Israel nanni iwi kan, yu ingni katta.

Pharao kupia kau swapni takras, sakunna Mosesra ban wisatta: „Tak was, amman kais, kli nara balpara, man kli maiwanra buma kaka, man makka pruma.“

22. Aegypten wina impaki wan.

Nanara Pharao kupia praud polli takan. Bara Dawan Mosesra bila: „Yang kau saura kumi na tasbara blikamni, sara Pharao mai kangbi sakbia na tasba wina.“

Ankila aikra blikamni, tawakia lupia puk ikbia Aegyptenra.“ Bara Israel nanni ai dukia puk quaki, daiwan kum' iki pin. Dawan bila: „Man pima kaka, man koalla puk dimmi, sus minara dinki, duss mitamra bris; man piram kaka, bara man aini na tasba wina impaki wama. Ba tala man tukinkam kabia wamtlara, bara ankila mai ikpi' apia.“

Piua aimakan Israel nanni sut ai musa takan, ban impaki waia. Timia lilapassra ba ankila aikra pura wina balan, Aegypten tawakia nanni puk pruki' ikan, Pharao lupia wina upla umpira lupia sin, dai-

wan lupia sin. Ba timiara upla puk Aegyptenra inni, ai lama prukan, sibrin polli takan. Ba timiara Mosesra blikan, ban aisi: „Tak was, man nanni puk, lupiam nanni, daiuram nanni!“ Bara Aegypten nanni upla puk tasba wina kangbi sakan, ban aisi: „Yang nanni puk pruamni.“ Ban Israel nanni ba tasba



saura wina impaki wan, lalla pini, pauni, koalla yamni puk bri wan.

Pharao baha wali, Israel nanni puk wan, yu kumi pot twira impakan, bara witin kupiara luki: „Yang ba upla nanni kli bribalamni.“ Witin ai sulliar nanni puk winnan, ai nina bliku wan. Kabo paunira ill lilapassra alki brin. Israel, nanni sibrin polli Aegypten wina upla nanni aula kaikan, sakunna Moses bila: „Sibripara, wan Dawan man woal kabia, witin dawan aiklabaia, man nanni sap iwi puk kaikma.“ Sakunna ba nanni umpira, ban luki kan: lallmara kabo pauni, tnaya woal ill yerri, yabal apu, ninara Aegypten sulliar nanni. Bara Da-

wan Mosesra bila: „Dia yangra innisma? Israel nannira wis, man makka wama.“ Annira? Kabora? Ao, „nanara Aegypten nanni kaikbia, yang yakan Dawan, yang Pharao ai sulliar nanni puk iki saukamni.“



Bara Dawan passa tara blikan, ba timiara kraui kan, yabal lawan kabora tilak takan. Aegypten Israel nanni lilapassra kasbrika mankan, Israel mapara ingni polli kan, sakunna nampara timia takan. Ban Israel nanni ba timiara kabora bak dimman, kabo laya aikikara smikara walpa baku takan.

Pharao nina bliku wan, titanra kat, bara Israel nanni kabo pot luan, Aegypten nanni lilapassra kan. Bara Dawan pura wina pauta mukan, ba Aegypten nanni baha kaiki, sibrin polli takan, ban inni kan: „Kaissa yawan aini wapi, ba Dawan wan lamika, Israel uplika polli!“ Sakunna Dawan Mosesra win: „Man mitam kabora buki saks.“ Bara kabo siapia Aegypten nanni puk bikan. Ba nanni plappi, puk kabora pruan, upla kumi sin suakkuras. — Bara Moses Israel nanni woal aiwoni, Godra mayuni kan.

Miriam, Moses lakra, mairin nanni woal ban aiwoni kan :

Dawanra yawan aiwonaia,
witin arras ai waikna sin
kabora lullki ikan.

23. Israel twira impaki.

Yabal Aegypten wina tasbara Kanaan twi tara polli bak lui kan. Allai, imma apu, aya apu, li unta apu, aoalla apu, auya man kan. Yu yumpa kabo pauni wina pot impaki kan, bara li unta sakan, sakunna baha laya tapla polli, sip diras. Bara upla nanni Mosesra laui bila saura aisin. Moses ai pura sunni Godra, bara Dawan duss kumi witinra mariki, ba duss li untara lulkaia, bara li damni takan. God ban bila: „Yang man Godkam, Dawan, ya mai ra-



kan.“ Bara Israel nanni urangbi aisi kan, wina apu, plun apu bamna. Bara God daiwan tnawira, wanksur uya blikan, titan woala diara krukma lupia, ma baku tasbara kaiki sakan. „Na dia ma?“ Israel

nanni makabi: „dia ma,“ ai bila „mana“; ba nanni kaikras, dia ma katta. Bara Moses wisatta: „Ba tani, dia Dawan pura wina blikan, yawan ba piaia. Baha ma krukma, damni, yamni piaia. Ba ninkara li apu, ba nanni kli urangbi aisi kan. Moses ai pura sunni, God bila: „Man dussam bris, ba walpara pruks.“ Moses walpara prukan, bara li uya takan.

Ba ninara Amalek nanni balan, upla saura, Israel mapara aiklabaia. Moses ai wita Josua blikan, war aiklabaia, witin bui ill purara wan, ai mita buki Godra ai pura sunni. Ban Moses ai mita buki, Israel dawan takan, sakunna ai mita ikan, Amalek dawan takan; bara Aaron Hur woal ai mita alki bukan. Ban Israel ba Amalek nanni puk kangbi sakan.

Sakunna nanara wali bas: Naki Moses ba yabal sakan, twi tara polli. Ba kasbrika, ba pauta lakni kabo paunira yabal marikan, kau bara katta, yu bani, timia bani ban God wan aissa ai upla nannira yabal marikan, kaknara kasbrika baku, timiara pauta lakni baku taura wan.

24. God ai laka yan.

Israel impaki kan, kati yumpa luan, ill Sinaïra balan. Bara twi tara pain polli, mani kumi bara takaskan. God nanara ai laka ai uplika nannira yan. Moses upla nanni puk nara kulkan, wita nanni mankan. Israel nanni nara God lupia takan.

Moses ill purara ulli wan, God witinra bila: „Upla nannira wis, yu yumpa luan kli pura wina

balamni; ya illra ulli wabia, baha prubia.“ Ba yua aimakan, kasbrika siksa ill kir bal iwan, umyula lippan, alwanni kira. Ill puk kiasma takan, kiptaya bin tara daukan ill wina. Moses God mawanra buan,



upla puk mununtara buan, musa tatatwan, sibrikan. Bara God ban aisi kan:

„Yang Dawan man Godkam; yang Aegypten, ba tasba saura wina mai bribalri. Man God wola bripara.

2. Man lilka diara God baku daukpara, diara purara, tasbara, mununtara, kabora baku daukpara. Ba diara mayunpara man lulam krikpara, yang Dawan, man Godkam.
3. Man God nina tanis makpara, Dawan ba upla ban swibi' apia, ai nina tanis maki.
4. Sabbath yua amiara bribas, ba yua yamni bri kais. Yu matlalkabi man diara puk daukma, sakunna ba yua Dawan yua, man diara work daukpara.

5. Man aissikam bila, yaptikam bila wals, bara God
yamni mai munbia, man piua kau yerri kabia.
6. Man upla ikpara.
7. Man upla woala maya bripara.
8. Man diara implikpara.
9. Man uplikam mapara kunnin aisapara.
10. Man uplikam watla, maya napakan bip beriko
diara puk tumpara.“

Upla puk umyula lippi kaikan, alwanni tara tututban, ba wali plappi yukuan, Mosesra win: „Man yang nannira smalks, God yarka yang nannira aisa-biara, yang puk pruaia. Dia bila God wan Dawan manra aisin, yang nanni wali daukamni.“ Bara Dawan Mosesra bila: „Allai, ai kupia saura, kupia yamni kaka, yang laka daukaia, bara yang diara yamni ba nannira yaia. Bara Moses kasbrika tilara dimmi wan, kati kumi bara takaskan. Ba ninkara God walpa tanta tara woal Mosesra yan, witin ai mita ni laka puk ulban.“

Ban Moses ill pura wina bal iwan, ba walpa tanta woal ai mita ni twilki kan. Sakunna, allai-dia Moses kaikan, lamara balan? Upla nanni kupia saura bip lupia lilka kumi daukan, ba lamara dans kaubi aiwoni kan.

Bara Moses kupia baiwan, walpa ba tasbara lulkan, ba puk kriwan. Bara Aaronra win: „Dia upla manra daukan, man diara saura polli daukram?“ Aaron bila: „Allai man kaikisma, naha upla nanni saura polli; ba nanni yangra wisatta: God lilka kumi dauks, yang nanni bri waia, yang kaikras, annira ba Moses wan; witin yang nanni Aegypten

wina bri wan, sakunna nanara tiwan. Bara yang bili: Lalla pauni puk pliki bribal. Bara mairin, tukta nanni sin lalla pauni bribalan, yang baha puk pautara lulkri, bara bip lupia ba wina takan.“

Moses ba bip lupia, kriki ankan, liura yakaban, Israel nanni ba puk din. Bara Moses Godra bila: „Allai, ba upla nanni saura polli daukan. Ba saura yawan wina makka swis, ba apia kaka, yang nini sin man wonktayam wina saks.“ God kli bila: „Ban was, na upla nannira yabal mariks. Kais yang ankila kumi kainamra blikamni. Sakunna ba upla nannira saura yang munnamni.“ Bara Dawan bila: „Walpa tanta woal kli paski dauks, woala kriwan baku, yauka ba walpa yangra bribal, yang ba laka mita ni kli ulbamni.“ Bara Moses kli kati kumi ill purara God woal takaskan, plun piras, li diras. Dawan kli ai laka matawoalsip walpara ulban.

25. Laka woala.

God ai upla nannira laka yan, ai watla dukia, dia munnaia, dia piaia. Patta tila saura sika, banna God bila: „baha patta pipara.“ God bila: „Diara implikpara“ sakunna ba upla impliki, yang saura witinra munnamni. Aissa, yapti ai lupia nanni yamni smalkaia, piarka, urauka, upla umpira, upla nakra baiwan, bilas, kiama prawan, alba nanni yamni bri kaia; diara saura ba nannira rau sakaia apia. Daiura prukaia apia, baha sin smalkan; ba daiwan work dauki, yamni dakakaia; ba duss ai ma yamni bri, saukaia apia.

Man piawira watla sakram kaka, yapti ban swis,

ai lupia sin, bara yang sin yamni mai daukamni. Uplara kiama prawan, bila saura aisapara, uplara nakra baiwan, yabal mariks; God ban aisin.

Levi taya nanni priesta takan. Moses moini, Aaron priesta tara takan, ai lupia, ai mula sin. God bui witinra smalkan, koalla yamni daukaia, uttla pain polli makaia, Godra ai pura sunnaia. Siss lalla pauni wina paskan, bilara walpa ba tanta woal, laka purara ulban, God watlara bui kan.

Priesta tara yu bani Godra ai pura sunni pauta anki kan. Tasba tara uttla kir kan, bara altar



walpa ni paskan, annira priesta nanni yu bani daiwan iki anki kan. Upla nanni patitara wina ban

dauki kan, yu bani daiwan kum' ikaia, Godra anki yaia, ai pura sunnaia. Nanara God uplara smalkan, naki ba daiwan iki ankaia, naki Godra pura sunnaia. Tasba ba sin smalkan, duss bani mununtara ill bani purara apia, daiwan ba ankan piaia apia.

Ba upla saura daukan kaka, daiwan kum' iki, must Godra anki yaia. Nanara Juda nanni daiwan ban Godra anki yaras.

Aima yumpa mani banira yu yamni takan, waik-na puk aikuki balan, ba yua Aegypten wina impaki wan, ba yua ankila lui wan, ba yua God ai laka Sinaira ulbi yan, yu yamni woala, ba uttla woaha wina daukan, ba bilara iwaia. Ba yua nanni Juda nanni kau nanara ban brissa, Moses smalkan baku.

26. Upla uya twira pruan.

Mani kumi pot luan, Israel nanni kau illra Sinai lamara iwi kan. Bara yu kumira kasbrika kiasma God watla wina bukan, bara upla puk ai dukia quaki impaki wan.

Nanara upla puk lillia dauki, tasba yamnira mak-ka dimmaia want, ba tasba pain, nasma uya, bip uya brissa. Sakunna ban takras.

Yu yumpa twira impaki, bara pot kli takaskan. Upla puk bip wina piaia want, bamna inni ban aisi pana pana: „Ya wina wankbia, baha piaia? Yang nanni kau lukisni, ba inska, iwa, pitu, raya pissa, ba patta Aegyptenra pisattni. Nanara ba lika yang pi kaikras, ba mana ba man yang kaikisni.“

Bara Dawan bila: „Amman kais, yauka man wina pima. Wina ni yang mai dakakamni, yu kumi

apia, yu woal apia, kati aiska, bara man sipi pima, ba wina bisbaia takbia, man diakan Godra wisattma: „Diakan man Aegypten wina ai sakram?“ Moses bila: „Upla uya polli sika, 600000 kulkri, man wisma, yang upla puk wina ni dakakamni, bara kati aiska man pima.“

Sakunna Dawan bila: „Yang miti swapni takan?“ Bara Dawan passa blikan, bara kais wanksur uya polli balan, nara bukra tasba puk bangwan. Upla puk buan, yu aiska, yu woala wanksur alki brin, sakunna baha wina pin, upla uya pruan, ba upla bara bikan. Bamna ba tasba nina: raiti nanni makan.



27. Upla tasba kaiki.

Israel nanni twira Paron bal dimman, bara Moses waikna nanni blikan, ba tasba Kanaan biki kaikaia. Baha nanni impaki, yabra wina munara lallmara tasba aiska pliki kaikan. Bara piua kan, waham ma sakaia; ba nanni waham kumi tara polli klakan, upla woal duss purara ba briwan, sikia, sikra, kuri ma puk dakbi briwan. Kati kumi pot luan, ba

waikna nanni kli balan, ban aisi: „Yang nanni ba tasbara, man ai blikram ba, balri, ba tasba yam-nissa, plun uya, nasma uya, duss ma uya bara sa; sakunna ba upla nanni tara, karna polli sika, ai watla karna takan. Yang ba waikna tara kaikri, Anak lupia nanni; yawan nakrara krukru baku, umpira kattni.“

Israel nanni baha wali, sibrin polli takan, pana pana aisi kan: „Kaissa yawan wita kuni sakpi, bara kli Aegyptenra wapi.“ Sakunna Josua Kaleb woal upla ai koalla kalki ban winnan: „Baha daukpara,



Godra wan pura sunpi! Baha tasba, yang kaikri, ba yamni katta.“ Sakunna upla puk ba waikna woal walpa ni sabaia want.

Bara pauta kiasma tara takan gloria tara, God ban aisin: „Naha upla kupia saura, bila saura man aisi kan, ai kupiara baha lukras, dia yang daukri. Yang baha daukamni, dia man wisattma. Man lu-

piam nanni ba tasbara Kanaan dimbia, sakunna man nanni twira pruma.“ — Ba wina upla ahnuk puk twira pruan, Josua Kaleb woal man pruras, sakunna Israel lupia nanni kau mani 39 twira impaki tauki iwi kan.

28. Israel urangbi aisi.

Wita kumi Levi wina, nina Kora Moses lamika takan, Datan Abiram sin upla uya woal Mosesra bila saura aisi, rau saukan.

Ba nanni bila: „Man kupiam saura, man yakan wita takaia wansma, yawan alba daukaia?“ Moses aisi: „Yauka kli bal, Dawan mawanra buaia, bara pauta ankamni, man kaikma, dia God daukbia, man bilam kasak saba?“ Bara Kora, upla uya ai drubi God watla lamara bui kan, sakunna Moses upla woalara win: „Man nanni Kora watla wina was, yang ba upla saura puk makka ikamni.“

Ban aisin, tasba ai bila quakan, ba upla puk ulangkan, upla uya 250 pauta ankan.

Bara upla puk kli Mosesra bila saura aisin: „man ba waikna yumpa ikram, man mata pruan.“ Ba wina Dawan laui, upla uya ba yuara 14700 ikan. — Kadesra upla li briras, li unta apu, bamna Mosesra unsabi kan. Dawan bila: „Man dussam bris, upla puk aikuki winma, walpara aisas, upla puk walbia, bara walpa wina li uya takbia.“ Moses Aaron woal upla puk winnan, ban aisin: „Nanara wals, man nanni kupiam saura, yang li uya na walpa wina mai sakamni.“

Sakunna Moses walpara aisaras, ai mita buki,

ai duss ni walpara prukan aima woal, bara li uya takan, upla puk din, daiwan nanni sin. Sakunna Dawan Mosesra bila: „Man saura yaram', man yang nini mayunras, yang bili walras, bamna man ba tasbara Kanaan sip dimbi' apia.“ — Ba tasba Meriba makan, li unta unsabaia.



Mani yawanaiska woal pot luan, Israel nanni kli urangbi aisin: „Plun apu, li apu, diara yamni apu; ba patta pura wina kli piaia apia, ba manna.“ Bara Dawan piuta saura uya blikan, uplara sammaia, Israel nanni uya ba yuara pruan. Nanara upla puk Mosesra balan, ban aisi: „Yang nanni saura daukri,

bila saura Dawanra aisari, Dawanra puram suns, ba piuta saura yang wina sakaia.“ — Moses ai pura suunan, bara Dawan Mosesra bila: „Piuta kumi brass wina dauks, duss purara pammaia! Ba upla samman, piutara kaikbia kaka, kli raya takbia.“



Moses piuta kumi brass wina daukan, ba upla samman, purara kaiki, kli raya takan.

29. Bileam.

Na wina Israel nanni ba tasba Kanaan briaia kan. Ba nanni wita kumi Sihon, woala Og kangbi ikan, bara upla puk twira Moab iwi kan. Sakunna Balak, Moab kingka, yumnu kumi Mesopotamia wina winnan, nina Bileam, ban aisi: „Narabal, ba upla nannira latubaia, karna polli bamna.“ Sakunna God Bileamra: „Bara wapara, ba upla nannira latubaia apia.“ Balak waikna woala kli blikan, witin paiwaia, bara Bileam balan.

Ban impaki, Dawan ankila ai yabalra balan, wi-

tin woal prawaia; ai beriko ba ankila kaikan, ispara tara ai mita ni alki bui kan. Bileam ba ankila kairas, ai beriko pruki kan. Ba beriko ai lulara kauan, sakunna Bileam kli prukan. Bara Dawan ba beriko bila sakan, waikna baku aisin: „Dia yang manra daukri? diakan ai prukisma?“ Bara Dawan Bileam nakra ilinkan, witin ankila bui kaikan.



Ankila bila: „Ban was, upla nanni woal, sakunna amman kais, ba bila man aisas, dia yang mai smalkamni.“ — Bara Bileam Balakra balan, ill purara daiwan iki ankan, ai bila ban aisin: „Naki yang latubaia kattni, God baha latubras. Kais yang balri, diara yamni aisaia yang ban daukamni.“ Bara aima yumpa bless munnan ba Israel nannira. Bara Balak witinra: „Dia yangra munnisma? Yang mai winri latubaia, kais man ban daukras. Yang lukattni, mai mayunaia, sakunna ban daukamn' apia.“ Ba wina

Bileam kli ai watlara wan. — Israel nanni ba Moab nanni atia puk kangbi sakan, waikna nanni puk ikan.

30. Moses pruan.

Ba waikna nanni Aegypten wina balan puk pruan, Josua Kaleb ba man kau raya kan. Moses ba sin twira pruan. God witinra bila: „Ill Nebora ulli was, ba wina yang tasba Kanaan manra mamrikamni, baha yang Israel nannira yamni. Man namkra ba tasba kaikbia, sakunna man bara wam' apia.“ — Bara Moses ai uplika nannira ai lakula win. Ba yuara witin kli smalkan, dia God bui walpara ulban, laka aiska, dia yawan aissa daukan, naki kupia pini diara yamni ai uplika nannira yan. Bara ban aisi: „Dawan Godkam propheta kumi blikbia manra, yang lika baku, witin bila man nanni walma!“ — Ba ninkara ill purara ulli wan, bara pruan; Dawan bui witin tasbara bikan, upla ai raiti sip kaikras. Moses mani 120 iwi kan, bara pruan. Ai nakra pukni takras, ai karnira sin swapni takras.

31. Josua.

God Moses woal kan, baku Josua woal sin kan. Moses Israel nanni Kabopauni bri luan, baku Josua ba nanni Jordan purara bri luan. Aoalla tnaya kum' ip takaskan, walpa baku, tnaya woala ban plappan, bara upla nanni tasba bak luan. Jericho tauan karna tara kan. „Kais,“ Dawan wisatta, „ba tauan, ai uplika nanni sin man mitamra mankri.“ Ba priesta nanni tauan kir impaki wan, yu matlatkabi; sulliarka nanni ninara wan.

Yu woalara Josua ban win: „Naiwa karna polli wins, Dawan na tauan mitamra mankan.“ Bara upla puk kiptaya puban, karna polli innan, ba wina uttla puk bak kauan; Israel nanni tauanra dimman, upla puk ikan, uttla nanni puk ankan.

Ban Josua lamika nanni kangbi sakan, woala ikan.

Ba ninkara Josua kli war aiklaban, ba yuara ban wisatta: „Yu ingni sap bas, kati sin sapbas.“ Bara yu sap buan, kati sin; God walpa pura wina lulkan, ba Amor nanni ikan. Ban Josua ba tasba Kanaan puk alki brin, Israel nannira aika saki yan. Ruben, Gad nanni ba Jordan nampara iwi kan, upla nanni woala Jordan kabo lilapassra. Levi nanni tasba briras, God napakan bamna.



Bara Josua pot mani 110 luan, ai diara sut daukan, Israel nanni puk aikuki winnan, ai lakula wiaia. Witin aisi kan, dia diara God yamni dau-

kan. „Man Godra puram suns, ai laka yamni bri kais. God woala bripara, yawan aissa yakan Dawan sika. Baha saura kaka, naiwa Dawan woala pliki saks, sakunna yang, yang taya kuki wan Dawan bila wali daukamni.“ — Bara upla puk winnan: „Ban kabi' apia; yawan Godka ban swimn' apia.“

32. Wita nanni.

Josua pruan luka, Israel nanni ban daukras, dia wisatta ba. God woala bri kan, bamna Dawan ba nanni ai lamika mitara mankan, sakunna Israel kli God bila wali, dauki kaka, Dawan bui wita nanni winni blikan.

Midian nanni ai tasba wina Kanaanra bak dimman, aya impliki, ai bip nanni puk kangbi sakan.

Ba muna mani uya dauki kan, diara puk saki implikan. Bara God waikna woama Manasse taya wina blikan. Ankila witinra bila: „Dawan man woal kaia, man waikna karna.“ Gideon witinra: „Dawan yang woal kaka, diakan naha saura yangra munan? annira ba mirakula, yang aissiki kaikan ba?“ Bara Dawan witinra kaiki aisin: „Ban was, kupiam lukpara, man Israel nanni Midian mita wina sakma. Kais yang mai blikri.“ Gideon kli bila: „Naki yang Israel sakamni? yang taya umpira sa, yang sin.“ — Dawan witinra bila: „Kasak polli, yang man woal kamni, man Midian nanni ikma, waikna kumi baku.“ Gideon aissa God lilka-baki brin, walpa wina pas-kan, nina Baal, baha Gideon ai mita ni saukan. Upla woala laui kan, aissara balan, ban aisi: „Man

lupiam aik, witin ikaia!“ Sakunna Joas bila: „Dia-
kan man Baal mata lauisma? Witin karna kaka,
ai karnira kaikpi.“

Gideon tukin kumi God wina makaban, maki
kaikbia, God bui witin winnan. Witin wisatta:
„Yang daiwan taya tasbara palkamni. Ba titanra
diwas laya tasba wina daiwan tayara dimbia kaka,
yang ban kaikamni, man Israel yang miti ni sak-
ma.“ Titanra buan, ba daiwan taya taibi brin,



plapta kumi diwas laya ni bangkan. Sakunna Gi-
deon kau kumi Godra makaban: „Yang kau kumi
na timia kaikamni, ba daiwan taya lawan takbia,
sakunna tasbara puk diwas laya.“ Bara God ba
timiara ban daukan, ba daiwan taya lawan takan,
tasbara diwas laya kan.

Bara Gideon buan, sulliar nanni puk aikuki win-
nan, 32000 tasba aiska wina balan. Sakunna witin
God bila ban smalkan: „Ba upla sibrin, taplu apia
kli ai watlara wabia!“ ba wina 22000 sulliar nanni

kli makka wan. Dawan kli Gideonra: „Upla kau uya polli, yang ba nanni traikaikamni.“ Bara Gideon upla woala kli ai watlara blikan, waikna 300 ba man brin, Israel nanni ban wibiara: „Yang miti wan sakan.“

Bara Gideon, ai sulliar nanni woal awas anki bri, sumi kriwan sin, arinka kiptaya alkan, ban tnaya yumpa wina Midian nanni ikaia; bara upla puk inni kan: „Dawan isparka narasa, Gideonka sin!“ awas anki lulkan, kiptaya puban, sumi tasbara krian, ban ai lamika nanni sibrin polli takan, makka plappi, pana pana ikan. Israel nanni puk ai nina blikan, ba Midian nanni alkaia, uya ikan, bip uya alki brin.

Gideon kli ai tasbara balan, bara upla puk winni kan: „Gideon king kabia“ sakunna witin bila: „ban apia, wan Dawan yakan wita kabia.“

33. Ruth.

Ba wita nanni iwi kan, ba piuara plun apu polli kan. Waikna kumi Bethlehem wina, ai maya, ai lupia woal Moab tasbara impaki wan. Ba waikna nanni Moab mairin ai maya brin, Arpa, woala Ruth. Ba aissika pruan; ai lupia woal sin pruan. Naemi, piarka umpira, kli ai tasbara wan. Ba mairin Ruth Arpa woal impaki kan, sakunna Naemi bila: „Man nanni nara bas“ — bara Arpa kli wattauan, sakunna Ruth wisatta: „Ban aisapara, mai swiaia; annira man wama, yang sin wamni, man taya, yang taya, man Godkam, yang Godki, annira man pruma, yang sin pruamni.“ Naemi kli Bethlehemra balan, sa-

kūnna upla woala ba mairin kaikras, ban makabi: „Naha piarka Naemi?“ Witin bila: „Ban kli ai makpara (Naemi lika auyapa) sakunna Mara ai makram (naha lika umpira); lalla kira yang na wina wattni, umpira yang kli balri.“

Ba piua aimakan rais krikaia, Ruth sin inslara wan, rais wabaia. Bara God ban daukan, ba mairin Boas inslara wan, witin ai taya dukia. Ba yuara Boas ai inslara wan, ai uplika nanni kaikaia, bara makaban: „Ba mairiu nina dia?“ Ba ninkara Ruth-



ra bila: „Yang puk kaikisni, dia man Naemira yamni daukram. Israel Dawanka, man witinra balram, baha mata yamni kli mai munbia.“ Bara ai uplika nannira win, ba mairin kangbaia apia.

Ruth baha puk ai skurara wisatta. Naemi bila: „Witin yang taya. God yamni witinra munbia, dia yang nannira daukan.“

Boas ba mairin yu bani ban kaiki, kupia yamni

katta, witin latwan brin. Boas ba mairin bri, Ruth ai maya takan, witin taya, bamna ba piarka brin. Ban ba mairin Moab wina kuka Davidra takan.

Ai lupia nina Obed, witin lupia Isai, witin David aissa katta; baha tanka yang naika mai wimni.

34. Eli, Samuel.

Ba ninkara Eli priesta tara ba sin Israel witka takan. Baha laka Moses Israelra pot smalkan.

God watla Silora kan, bara Israel nanni aikuki balan, yn yamni God mawanra daukaia.

Yu kumira Eli mairin kumi kaikan, God watlara latara iwan, ai kupiara baha ai pura sunnan, sakunna bila sip aisaras, bamna Eli lukan, ba mairin bla daukan. Witin tanis luki kan, ba mairin bla daukras; Dawanra makaban, lupia kumi yaia, witin lupia sakras bamna. Eli baha walan, witinra ban win: „Kupiam lukpara, Israel Dawanka lupia kumi maikbia.“ — Bara God ban daukan, Hanna lupia kumi sakan, ai nina Samuel makan, baha tanka „God wina makaban“.

Mani matasip luan, bara yapti ai lupia Silora briwan, Eli witin smalkaia. Mani banira ai yapti kli balan, yamni man wali Samuel dukia, ba ninkara God bui ba tukta smalki kan. Eli lupia nanni Hophni, Pinehas woal kupia saura, diara yamni daukras, God watla saukan.

Eli ai lupia nanni yamni smalkras, witin latwan bri bamna, sakunna ba nanni kanra saura takan.

Timia kumira Dawan winnan: „Samuel!“ Tukta buan, ban luki, „Eli ai winnan.“ Ban Dawan aima

yumpa winnan, bara Eli lattan kaiki kan : „Dawan bui witin winnan.“ Ban Samuelra win : „Ba bila



baikra kli walisma kaka, ban wiram : „Maisterka aisas, nampakan walisni.“ — Ba ninkara bila baikra kli winnan : „Samuel.“ Bara Samuel bila : „Maisterka aisas, nampakan walisni.“ Bara Dawan bila : „Kais yang diara karna daukamni, ba upla baha walbia kaka, witin kiama nikbi kabia. Yu kumira yang Eli ai lupia woal ikamni.“

Titan woala Eli Samuelra makaban : „Dia Dawan manra wisatta? Tanka puk ai wiram.“ Bara Samuel diara puk Elira win. Eli bila : „Witin Dawan, witin daukbia, dia yamnissa.“ — Dia God bila, witin ban daukbia. Ba ninkara war aiklabi takan. Philista nanni war aiklabi, bara Israel nanni God watla bri wan. Priesta woama ba watla twilkan. Eli almuk polli, 98 mani pot luan, latara iwi, bila kaiki kan. Bara waikna kum' aula, koalla kalkan, Ell witin makaban : „nakissa?“ Waikna ba bila :

„Israel nanni puk plappan. Man lupiam woal pruan. God watla tiwan.“

Eli baha wali, ai sulatti wina bak tasbara kauan, ai nana kriki, ban pruan. — Bara Philista nanni God watla Asdodra briwan; sakunna titan woala ba Dagon, walpa wina paskan tasbara kauan, ai mita,



ai mina puk kriwan. Ba wina God watla balan Ekronra, sakunna upla uya bara sin pruan. Kati matlalkabi luan, God watla kli blikan, sakunna Israel nanni alba takan, mani yawanaiska; ba taim saura katta.

Sakunna Israel nanni kli ai pura sunni, Godra ai kupia ulakan, ba wina kli ai tasba brin, dawan takan. Bara Samuel walpa tara tasba unra bapan, purara ulbi kan: „Ebenezer“: „Na yuara wan Dawan yamni wan sakan.“

Samuel wita kasak kira, kupia pini kan, upla puk witin yamni kaikan.

35. Samuel, Saul.

Samuel pot almuk takan, bara ai lupia nanni smalkan, wita kaia. Sakunna ba nanni kupia saura, lalla man pliki, ai aissa baku apia. Bara yu kumira almuk nanni Israel wina aikuki balan, Samuel watlara, Ramara ban aisi: „Yang nanni wita kli brin ai daukras, sakunna king kumi wansni!“ — amuel baha yamni walras, sakunna God witinra bila: „Upla bila baikra wali ban dauks, ba nanni mai lulkras, sakunna yang lulki swin, yang Dawan kaia apia.“

Bara waikna kumi, Benjamin taya wina, nina Kis, ai beriko woal tikan, ai lupia Saul blikan, ba nanni plikaia. Bara Rama lamara balan, napakan ba luki kan, propheta ba makabaia, annira sa? Sakunna God Samuelra bila: „Kais, naha ba waiknika, yang mai wisattni, witin king takbia.“ Samuel witinra win: „Ba beriko mata kupiam lukpara, pot sakan. Ya wita kabia?“ Saul ba wirara kaikras, sakunna titan woala Samuel witin woal wan, batana arinka saki, ai lall purara laikan, kia walan ban aisi: „Kais, Dawan bui king mai daukbia ai uplika nannira.“ — Ba wina Saul kli ai watlara wan, tanka ba upla woalara wiras.

Ba ninkara propheta upla puk paiwi winnan, ban bila: „Kais man kingkam narasa!“ Saul waikna yamni, kupia pini, karna polli, bamna puk witin mayuni kan.

Saul kingka Ammon nanni kangbi sakan, Gilead pri daukan; sakunna ba yua witin God bila daukras.

Dawan la daukan: „Amalek nanni puk, ai daiwan sin puk ikaia.“ Sakunna Saul ban daukras. Samuel witinra winnan: „Man naki lukisma, daiwan wina ankan wi ani kanra yamni, God bila walaia?“ Kais, God bila wali daukaia apia, baha saura polli



sika; man ban yaram! Ba yua wina Saul kupia saura takan, God lilka ai musa wina wan.

36. David.

Samuel Bethlehemra wan, Jesse kaikaja, Obed lupia. Dawan win: „Jesse lupia nanni wina kumi yang sakamni baha king daukaia.“ Witin Jesse, ai lupia puk paiwan, daiwan wina ankan piaia, bara lupia kumi plikaia. Jesse ai lupia nanni kuki balan. Samuel ba nanni puk yamni kaikan, sakunna aima bani witin pura wina walan: „Naha lupia Dawan sip sakras!“ Samuel makaban: „Naha lupiam

nanni atia?“ „Apia, plasni kau balras.“ Witin daiwan kaiki kan, ai aissa ba plasnika winnan.

Bara witin dimmi, tukta pauni kan, mawan yamni bri kan. Dawan bila: „Kaissa, witin ba sika, batana ai lallra laiks!“ Bara Samuel ai arinka bri, David lallra laikan, ba moini nanni puk kaikan. Ba yua wina Dawan lilka ai kupiara dimman, sakunna Saul kupia wina makka wan; witin tanis takan. David ai daiurika nanni kli paki, king kau



takras, sakunna yu bani ai harpa kangbi aiwoni kan. Saul wali, Jesse lupia woama, dawan aiwonaia, harpa kangbaia, witin ai watlara winnan, bara ulassa saura witin pruki kaka, David king mawanra aiwoni kan; witin pot sulliar wita takan.

Ba ninkara Philista nanni kli tasbara bal aiklaban, David Bethlehemra kli tau i wan, ai moini nanni almuk Saul woal war aiklaban. Bara aissika David blikan, ai moini nanni kaikaia. Witin impaki, sul-liar nanni puk bui kaikan, bara waikna tara Goliat taura bui kan, ai musa karna takan, ispara bri witin waikna karna kumi paiwi, witin woal aiklabaia. David walan, king ban aisi katta: „Ya ba waikna tara ikbia, witin king lupia maya bribia, tasba mana kli aibapaia apia.“ Witin mana ba lukras kan, sakunna witin ba Goliat, God lamika ikaia want. Bamna ai bila kingra blikan: „Yang wamni aiklabaia.“ Sakunna king ban wisatta: „Man kau tukta, witin uria wina dawan katta war aiklabaia.“ David kli bila: „Yang limi, kaswaki sin pot miti ni ikri, ba Dawan, ya limi wina ai sakan, ba sin Philista mita wina ai sakbia.“ Saul ai ispara witinra yan, silak kiap ai lallra bapan, silak praka ai musara dinkan. Sakunna David baha kli daiki sakan, ispara sin briras, sakunna walpa uria lalalni matasip pliki brin, ban ba waikna tara ikaia.

Ba waikna tukta ba aula kaikan, witinra latuban, ban aisi: „Yang yul baku? Man duss walpa ni brisma? Narabal, yang man winam brimni, ususs puk dakakaia.“ David bila: „Man aulma, ispara, lanksar silak brisma, sakunna yang balri, God nina bri, Israel Dawanka, man ai nina saukram.“ — Goliat ban impaki kan, bara David mapara plappan, walpa bri, lallkamkara lulki saban, witin ai mawanra kauan; bara David witin ispara bri, Goliat lall klaki sakan.



Ba wina Philista nanni sibrin polli makka plappan, Israel nanni ai nina blikan. — Saul Davidra makaban: „Annira man taya?“ Witin ban aisin: „Yang man albikam, Jesse lupia, Bethlehem wina.“ David kau aisi, bara Jonathan, Saul lupia David woal kupia kumi takan; witin latwan brin ai kupia baku. Ba wina David king watlara iwi wita takan.

37. Saul, David.

Israel nanni war suddakan, kli ai watlara wan, bara mairin nanni aiwoni: „Saul ai tausinka ikan, sakunna David kanra karna.“ King ban luki: „Witin naha tasba puk bribia.“

Upla puk David yamni kaikan, sakunna Saul baha wali, David nina lamika kan. Yu kumira David harpa kangbi, bara Saul lanksar bri, witinra lulkan, ai kupia sabaia. David attang tauan latara suak takan. Bara Saul sulliar nanni blikan, David ai watlara alki ikaia, sakunna Michal ai maya, Saul lupia witin windor wina plappaia swin; ban plappi

wan. Ba wina Samuelra, witin Ramara iwi kan, impaki wan. Saul bara sin ai sulliar blikan, David alkaia, witin Gibeara wan, Jonathan woal kau kumi aisaia.

Jonathan traikaikan, David ai aissa woal kupia kumi daukaia; Saul ai lupiara lattan mawanra win: „Witin prubia!“ Bara Jonathan Davidra win: „Yang lukisni, man tasba woalara makka waia.“ Bara Philista witara wan, witin ai uplika baku brin; sakunna Philista nanni witin misbara kaiki, witin kli tasba woalara plappi wan.

Ba wina David walpa untara iwi kan, upla uya, sulliar nanni sin ai drubi witinra balan, waikna al-muk, mairin sin uya, tukta uya, ai taya nanni puk witin woal kan.

Saul kupia baiwan, David uplika nanni puk ikan, ba tauan saukan, waikna, mairin, tukta nanni puk ikan. Jonathan kau nanara David uplika polli kan, David kau ai kupiara Saul yamni kaikan, Saul ai kingka, ai dapnika, ai uplika aissika kan. Saul ba ninkara ai sulliar nanni tausin yumpa blikan, David untara alkaia. Yu kumira Saul walpa untara dim-man, bara yapaia; David ai uplika nanni woal walpa unta ninara yukui kan; bara David uplika win: „Kais, na yuara God man lamikam mitamra man-kan.“ Sakunna David buan, Saul praka wina unka skiro ni sap klakan. Bara Saul bui kli wan, David ai ninara winnan: „Dawanki, kingka! kais, God naiwa man mitira mankan, sakunna yang mai ikras. Aissiki, kais man prak unka yang mitira.“ Bara Saul inni nakra laya takan, Davidra wisatta: „Man



kupiam pini, kanra kasak kira, yang ban apia!“ — Bara Saul ai swira, kli ai watlara wan. Sakunna ba ninkara witin kli balan, David alkaia. Bara David ai uplika woal timiara king kampkara dimman. David ba king lanksar saki brin, li kopka sin ai lall wina sakan. Bara walpa purara bui, David win: „Abner, Abner!“ Saul wita yapi buan, bara winni: „Man yamna, man ban kingra winnisma?“ Sakunna David Abnera: „Man waikna apia? wita tara apia? Man diakan man kingkam ai waki kaikras?. Upla kumi balan man Dawankam, kingkam ikaia. Kais nara, lanksar, li kopka barasa.“ Bara Saul wisatta: „Naha bila baikra man dukiam, David lupiki?“ David kli bila: „Ao, yang bili baikra, Dawan kingki! Diakan ai pliki alkma? Dia yang daukri? Israel kingka waikna baku daiwan lupia plikissa.“ Saul bila: „Yang saura daukri, kli nara bal, lupiki David. Yang kli saura mai mun-

namn' apia.“ Sakunna David witin kupia lattan kaiki, wisatta: „Sulliar kumi nara blikma, lanksar ba, li kopka sin briwaia.“ — Ba wina Saul David woal kli aisaras, ai piua baila kan.

38. Saul pruan. David king takan.

David ai sulliar nanni puk 600 waikna woal tasba woalara wan, witin siabri kan, Saul mitara dimmaia. Achis, Gat kingka, Davidra tauan kumi Ziklag isatta, witin bara iwi kan, ai taya nanni aikuki.

Bara Philista wita ai sulliar puk winnan, Achis Davidra bila: „Man sin wama, yang woal war aikla-baia.“ Sakunna wita woala Davidra misbara kaikan, bamna witin bui ai watlara kli wan. Sakunna dia kaikan? Tauan ba puk aisawan, uttla nanni puk ammi luan. Amalek nanni diara puk saukan, mairin, lupia nanni ai dukia puk saki brin. Witin yabal yerri wappan, swapni takan, sakunna ban timia aiska wan, ba aïmplikra nanni kli alkaia. Titanra witin ba upla saura woal prawan; bara ai dukia kli saki brin.

Sakunna dia ba yuara illra Gilboara takan? Philista nanni ba Israel nanni puk pruki kangban, Jonathan, Saul lupia ikan. Saul bui, ai ispara bri, ai musara sabi, tasbara kauan, ban pruan.

David bissaura Ziklagra balan, bara waikna kumi aula, ba tanka Saul dukiara witinra win. Ba waikna king ispara, matdinka brin, witin kraun lall wina sakan, baha atia Davidra bribalan. Sakunna witin kunnin wisatta: „Yang bui kingka, man lamikam ikri!“ David baha wali, ai koalla kalki, ban innan:

„Dia yaram, man sibrin apia, king mitam ni ikaia. Witin talia man lamla purara kabia. Kaissa ba waikna ikpi!“ Bara ai sulliar nanni ba Amalek waikna ikan.

Ba wina David Hebronra balan. Bara Juda nanni David ai kingka mankan, sakunna Israel nanni Abner mata woala Isboset, Saul lupia mankan. Bamna king woal kan, sakunna sulliar nanni bui Isboset sabi ikan; ba wina David yakan Israel kingka takan.

39. David, Uria.

David, ba tukta umpira, nanara king tara takan, sakunna ai harpa kau kangbi kan, kau nanara upla puk ai psalma yamni aiwonissa. — Witin ai kupiara luki kan, naki upla bani Jerusalemra ai pura sun-naia, naki God nina mayunaia. David ba tauan Jerusalem Jebus nanni wina saki brin, bara tara, karna sin daukan.

David war uya aiklabi kan, witin tasba kabo tara wina aoallara Euphrates, Damascus wina Aegypten-ra kan. Upla puk ba David kingka yamni kaikan, Syria, Edom, Moab, Philista nanni puk auyapa kan.

Ba taim king diara saurara dimman, ai kupiara saura lukan. King mairin kumi nina Bathseba kai-ki, upla woala maya kan, briaia want, bamna king ba waikna Uria war tilara blikan, bara lamika nanni witin ikan. Mani kumi ban luan, David ba diara ai kupiara lukras.

Bara Dawan bui Nathan propheta kingra blikan, ban wisatta: „Waikna woal tauanra iwi, kumi lalla kira, woala umpira. Kumi bip uya, daiwan uya

brin, woala umpira, daiwan kumi, lam lupia brin, witin woal pissa, li dissa, yapi kan, ai lupia baku. Bara yu kumira ba waiknara lalla kira ai uplika balan, witin ai daiwan nanni briras, sakunna ba daiwan kumi upla umpira wina saki implikan, ba plun mita ikan.“ — David ba storka wali, ban luki kan, la daukbia, ai kupia baiwan ban aisi: „Ao, God Dawan raya kaka, ba waiknika prubia.“

Bara Nathan Davidra bila: „Man bui ba waiknika.“ „Ban Dawan Israel Godka: yang king mai daukri, yang Saul mita wina mai sakri. Diakan man God bila lulki swiram, diakan man saura yaram? Man bui ba waikna Uria ikram, witin maya man briram!“ Ba wina David lukan, dia saura daukan, witin kupia tankrawan, sari polli ban aisin:



„Yang diara saura God mawanra daukri.“ Nathan bila: „Kais, man prum' apia, sakunna ba lupia, aisuban kli prubia.“ — Bara Nathan kli ai watlawa wan. Sakunna David yu matlalkabi pura kumi inni kan, nakra laya taki, ai pura sunni, plun piras ba

lupia mata; bara aiwoni kan: „Allai, Godki, umpira ai kaikram, man kupiam pini, yang saura daukri, puk ban swis, man kupiam pot baiuras. Yang musi sikram taliam ni, yang saura daukan, kupi wina saks. Yang baha kaikisni, dia yang saura daukri. Kupia raya yangra aik, God Dawanki; lilka kasak karna kli dauki aik.“

Ba ninkara ba lupia pruan, David buan, ai mawan sikbi, witin God watlara wan, God nina mayuni kan: „Yang lilki, Dawan nina mayunram, witin diara puk yamni daukan. Upla inma baku, tangni brissa, passa luan, pot prubia, sakunna man kupiam pini yang nannira ban kaia, ban kabia.“

40. Absalom.

David lupia ba pruan, diara kanra saura pot balan. Absalom, David lupia ai moini Amnon ikan. Bamna David witinra misbara kaiki, laiura blikan. Ba wina Absalom luki kan, aissika ai tronka wina kangbaia.

Yu kumira Jerusalemra upla puk winnan: „Absalom king takan Hebronra.“ Bara David baha wali, ban wisatta: „Kaissa, yawan aini wapi! witin wan alkbia, nara Jerusalemra!“ — Bara king umpira, Kidron tingnira lui wan, inni kan, ai lall bikan, ai uplika nanni sin impaki wan. — Waikna kumi, Saul taya wina, nina Simei, walpa bri, kingra lulkan, bila saura latubi: „Man yul baku tala disma.“ Bara Abisai kupia baiwan, ai lall klakala want, sakunna David win: „Ban apia, swirka latubaia, Da-

wan witin blikan.“ David Mahanaimra, tauan karna dimman.

Absalom tronka Jerusalemra alki brin, witin ban luki: „Yang yakan king pollisni, ba sulliar nanni yang aissiki pot alki ikbia.“ Sakunna upla uya kupia pini David woal wan. Joab, ai wita sulliar nanni briwan, Absalom woal aiklabaia. King almuk bui waras, sakunna ai sulliar nannira wisatta: „Yang lupiki Absalom kaiki bas, witin ikpara!“ — Absalom sulliar nanni puk pruan; witin plappi, ai tawa duss tnawara blakban, ussupam mununtara ai beriko



makka plappan. — Sulliar kumi, witin pammi kalkan, baha tanka witar win. „Diakan man witin makka ikras?“ Joab makaban. Witin wisatta: „Man lalla pini uya aikma kaka, yang miti ni king lupia ikamn' apia, yang walri king bila: Lupiki kaiki bas“ — „Yang ban takaskamn' apia,“ Joab kli aisin.

Bara lanksar yumpa brin, Absalom kupiara saban, witin kau raya dussra, pammi, bara pruan. — King David, baha wali, witin kupiara sari polli brin, ban inni-kan: „Allai, Absalom, lupiki, lupiki! man pruram, umpirasma!“ Sakunna Israel nanni puk auyapa, Absalom pruan ba mita, balan David ai kingka kli Jerusalemra briwaia.

41. Pestila Israelra.

Absalom pruan, sakunna upla saura kau war aiklabi kan. Upla kumi, nina Seba, ban makabi: „Diakan David kingka takan, wan taya apia, yang ai alba apia.“ Sakunna Joab ba upla ainwa smalkan. Ba ninkara Adonia, David lupia almuk king takaiā want, sakunna David ai plasni Salomo king dauki kan.

Ba taim David ai wita Joab blikan, ai sulliar nanni puk kulkaia, ai kupiara praud takan. Joab kati matlalkabi pura yumpa tasbara tauki kan, upla puk kulkaia, ai nina mankaia. King ba tanka wali ai kupia tankrawan, bara God ai propheta Gad Davidra blikan, witin bila: „Diara yumpa yang mai bribalri, kumi pliki saks, baha yang mai daukamni! Mani matlalkabi pura kumi plun apu, pattas polli brima? woala kati yumpa lamika sia mita plappi yukuaia? woala yu yumpa pestila, siknis saura tasbara brima?“ Bara David bila: „Yang kupi lapti-wissa, yang God mitara kupi mankamni, witin kupia pini polli!“

Ba wina Dawan pestila tasbara blikan, upla uya polli, 70000 yu yumpara pruan. Ba yua ankila ai

mita Jerusalemra ilinki auban, Dawan kupiara latwan brin, ba ankilara aikra bila: „Sipsa, mitam saks.“ David ba ankila kaikan, ill Zion purara buikan. Ba tasbara king altar walpa wina paskan, ai pura sunnaia, God nina mayunaia, ba wina pestila takaskan.

42. Salomo.

David pot almuk takan, bara ai lupia Salomo king daukan, witinra bila: „Man God watla yamni makaia!“ Witin ai lupiara lalla pini, lalla pauni, silak, diara woala puk yan, bara duss uya, yalam klakan, walpa uya sin ba mata. Salomo, king lalla kira, ai upla nanni auyapa daukan, war aiklabras, Israel nanni yamni iwi kan ai tasbara kupia kumi. Witin sins polli, kupia yamni katta. Bara timia kumira God witinra balan ban aisin: „Dia yang maikaia, makas!“ Salomo bila: „Yang kau woama, umpirasni, naha upla nanni smalkaia, bamna kupia yamni, sins polli yangra aik, bara yang dia yamni, dia saura tanka puk kaiki kamni, upla puk yamni smalkaia.“ Baha bila Dawan yamni walan, witinra ban win: „Man baha diara makabisma, sakunna piua yerri, lalla uya, man lamika ikaia, man makabras, kais yang ban daukamni, dia man makabattma. Kais yang kupia sins polli manra maikamni, upla woala baku bribi' apia, sakunna lalla, diara yamni puk yang maikamni.“ Dia Salomo yapri saukan kaikan, baha ban takan. Salomo king ainwa, lalla kira polli, king woala baku apia, upla puk witin mayuni kan. Witin slaup nanni kabo pau-

nira ulakan, woala Afrika mapara, ba wina diara yamni bribalan. Lai wina king uya balan, witin kaikaia, ai bila walaia. Witin bila sins polli, proverbial, kau nanara upla puk, tukta nanni sin smalkaia.

Bara Salomo God watla, tempel yamni makan. Sakunna ba ninkara ai kupia saura takan; witin mairin uya bri kan, Sidon wina, Tyrus wina, ba nanni God wan Dawan kaikras, bamna Salomo kupia God wina saurara ulakan. Ban man kaikma, naki king kupia sins polli saurara dimman, witin God laka kaiki aisi kan, sakunna ban daukras, saura takan.

43. Israel, Juda.

Salomo pruan, ba ninkara waikna puk aikuki balan, king woala pliki sakaia. Salomo lupia, Rehabeam luki kan, witin pot king takan; sakunna witin kupia pini apia, ai upla nanni misbara kaikan. Upla puk ban bila blikan: „Man aissikam yawan mana wirra daukan, man ba tasba mana karna munpara, bara yang nanni man bilam wali daukamni.“ Sakunna Rehabeam bila: „Yang aissiki ba tasba mana wirra daukan, yang kanra wirra daukamni. Yang miti siaia kanra mai taibia, yang aissiki mita baku apia. Yang aissa klala ni mai prukan, yang kiaya ni mai prukamni.“ Ban Salomo lupia tanis win, bara Israel nanni baha wali, ban lukan: „Dia-kan yawan Jesse taya brimni? Israel waikna woala kau brissa.“ — Bara upla taya mata woalsip makka wan, ai kingka woala pliki daukan; Israel king nina

Jerobeam. God bui witin king daukan. Rehabeam war aiklabaia want Israel mapara, bara God ai propheta blikan, kingra wisatta: „Ban God bila, man moini woal war aiklabaia apia, ban swis, upla bani kli ai watlara waia!“ Ba wina upla puk God bila wali, makka wan.

Sakunna Jerobeam Israel God mayunras, witin bip lupia lalla pauni wina daukan, ai pura sunnaia, kumi Bethelra, woala Danra bapan, upla kli Jerusalemra waia apia, God laka walaia, yu yamni daukaia. Bara God waikna kumi Juda wina blikan, witin ban winnan: „Allai, altar, altar! God Dawan ban bila: Kais, lupia waikna kumi David taya wina aisuban kabia, nina Josia, witin baha priesta saura altar purara ikbia, upla dussa ba purara ankbia.“ Jerobeam baha bila wali, ai mita buki, ban aisin: „Witin alki bris.“ Bara ai mita ba srauan, altar baiwan, yampus ba puk yakawan. Bara king God uplikara: „Dawanra, Godkam puram suns, yang dukiara.“ Witin ai pura sunnan, ba mita kli yamni takan. Ba wina God uplika ai watlara makka wan. Sakunna propheta almuk Bethel wina ai nina blikan, witinra makaban: „Balka yang woal plun, tani piaia.“ God witinra ban wiras, ban win: „Aini wamtlara was!“ Bara limi tara balan, witin sammi ikan, sakunna wina piras, limi bara bui kan, beriko sin lamara, propheta almuk balan, naha waikna, God bila walras bikaia.

Sakunna Jerobeam ai kupia saura wina ulakras, lall saura, ban God laka daukras. Ba wina Israel yamni apia, upla puk kupia saura takan. King kumi



woala pana ikan, puk lall saura, God laka daukras; witin nina mayunras, sakunna bip lupia lilka, God baku mayuni kan, upla puk ai kupia God wina ulakan, diara saura man daukan.


44. Elias propheta.

King Ahab kupia saura polli, ai maya Isabel Sidon wina sin; baha uttla tara makan, Godra sunaia apia, sakunna tanis lapta, kati, slilma mayunaia; baha priesta saura 450 bri kan, ba nanni uplara diara yamni smalkras.

Naha king upla Godra sasunra, propheta nanni sin ikan, kumi man swaktakan, witin God uplika nanni yukui dakakan. Bara Elias propheta king mawanra buan, ban aisi: „Dawan raya sika, Israel Godka, ai mawanra yang buisni, mani yumpa li aubi' apia, diwas laya apu kabia.“ Ba wina li apu, patta puk tiwan, sakunna Elias tingnira Kerit yukui iwan, bara kuskuspiram yu bani plun dakakan, wina tani sin, tingni wina li disatta.



Sakunna ba tingni pot lawan, bara Dawan bila:
 „Bukrá was Sareptara, piarka kumi bara, witin plun
 mai dakaki kabia.“ Ban impaki, tauan lamara ba-
 lan, kais piarka pauta wabi kan. Propheta bila:
 „Li uri' aik“ — ba ninkara: „Aya, tani sin uri'
 aik!“ Mairin umpira kli aisin: „God raya kasak
 polli, yang aya uria man brisni, batana sin uria,



baha yang, lupiki woal pimni, bara pruaia.“ — „Sibripara“ Elias wisatta, „ban wi dauks.“ God wan Dawan ban bila: „man yu bani plun sipsi bri-ma, batana sin baku, ba yuara li aubia katki.“

Bara Elias piarka woal pi kan, mani aiska ban luan. Plun yu bani sipsi brin, batana sin baku. Mani yumpa pura bakriki ban luan, bara Dawan Eliasra bila: „Man kli Ahabra was, yang li tasbara blikamni.“

Ahab witin aula kaikan, ban witinra winnan: „Man ba uplika, Israelra trobbil munnisma?“ — „Yang baha apia,“ Elias bila, „sakunna man, tamya sin, man God bila walras saura yaram, ba dukiara sika.“

Bara Elias kingra win, wita nanni, priesta nanni aikuki winnaia, bamna 450 priesta Baal dukia puk balan, ill Karmelra. „Man nanni diakan saura swim' apia?“ propheta makaban. „Yawan Dawan God ka-ka, witin bila wali dauks, Baal Dawan kaka, witin bila wals.“ Sakunna upla puk bila kumi sip aisaras. Bara Elias uplara: „Yang yakan polli Dawan propheta, sakunna Baal propheta 450 brissa. Bip wainatka woal yarka blikiaia, kumi man nanni sabi ikma, woala yang ikamni, bara pauta purara kabaia, sakunna pauta ba mokaia apia. Man nanni Godkamra winma, yang Godkira Dawanra winnamni; ba wina kaikamni, ya yakan God kabia, ya pauta maira pura wina blikbia.“ — Upla puk wisatta: „Baha yamni aisin.“

Baal priesta nanni ai bipka ikan, ba altar purara kaban, dans kaubi lamara bak titan wina tut-

nira winnan: „Baal, yangra walram!“ Sakunna witin walras, bila kumi sip aisaras. Elias lawas-kara kikan, ban aisi: „Karna wins, witin yapissa, witin luki, diara daukissa.“ Ba wina upla nanni karna polli innan, skiro ni ai wina klakan, tala uya tawan; sakunna Baal sip aisaras. Bara tutnira pua aimakan, Godra purara sunnaia, Elias altar walpa ni paskan. Altar kir unta pakni salkan, baha li ni bangkan, li uya sin purara laikan. Bara witin ai pura sunni, ban aisin: „Dawan! Abraham, Isaak, Jakob Godka, naiwa mariks, man Israel Godka kaia, yang man napakan; naha yang daukri, man bilam walri!“ Bara pauta maira pura wina kauan, bip wina puk amman, li untara puk lawan. Bara upla puk ai mawanra kauan, ban inni kan: „Yawan Dawan God yakan sika, wan Dawan God sika.“

Bara Elias bila: „Baha Baal priesta nanni alki bris, suak takbi' apia.“ Ba nanni puk alki brin, bara Elias puk skiro ni sabi ikan.

Ba ninkara Elias ill Karmelra ulli wan, witin Godra ai pura sun nan, li mata aima matlalkabi pura kumi, ai albika blikan kasbrikara kaikaia. Witin kli balan ban aisi: „Kasbrika uria siksa kabo wina ull' aula, waikna mita baku.“ Bara Elias kingra ban aisin: „Kaissa wapi, li pot aula!“ Ba wina kasbrika siksa takan, li uya polli auan.

Ahasya, Ahab lupia, siknis bri kan, bara king ai uplika blikan, Baalzebubra makabaia: ai lupia kli ainwa takbia saba? Bara Elias king uplika woal prawan, ban aisi: „Nara Israelra God apu sika? Diakan man bukra Ekronra wama, ba God maka-

baia? God ban bila: Man makka pruma!“ Ba upla kli balan, ban aisi: „Ba waikna, taya tamaia bri, ban wisatta: Kingra wiram, man makka pruma!“ Bara witin win: „Baha Elias sika, Tisbe wina.“ Bara wita kumi blikan, sulliar 50 woal, witin alki briwaia. Elias ill taura bui kan, wita witinra bila: „Man God uplika, king manra bila, nara bal iws!“ Elias bila: „Yang God uplika kaka, pauta maïra pura wina kaubia, man nanni puk ank-bia.“ Ban katta. Bara king wita woala blikan, pauta pura wina witin ai upla puk kuki ankan. Bara waikna woala balan, ba wita ai lula kriki, ban aisin: „God uplika, wan kupia ban ikpara, yangra luki bas!“ Bara Elias witin woal kingra wan; ban



aisi kan: „Dawan ban bila: man upla blikram, Baal-zebub makabaia, bamna man krikrikam wina kli bum' apia, sakunna makka pruma!“ Ban Ahasya pruan, lupia apu kan.

45. Elisa.

God bui Eliasra win, Elisa smalkaia, ai ninkara propheta takaia. Bara Elisa kaikan, naki God ai sasmalkra, propheta purara briwan; arras nanni blikan, passa tara sin, ban Elias purara ulli wan, ai lilka, ai karnira Elisara bal iwan. Witin Bethelra wan, bara tukta nanni saura, witin kaiki ban winnan: „Waikna almuk, umpira, nara bal!“ Elisa baha wali, latuban ban aisi: „Tukta nanni, Dawan saura mai munbia, man pruma!“ Bara kaswaki woal unta wina balan, tukta saura puk kalki pin.



Tasba kumira skul takan, piarka kumi Elisara winnan: „Yang maya pruan, yang umpirasni, ba waikna pot aula, yang, lupia nanni sin alba dau-

kaia, yang aibapras kaka.“ Elisa makaban: „Dia man wantlara brisma?“ Bara mairin: „Yang umpirasni, batana uria man brisni.“ — „Ban was,“ witin bila, „batil uya man uplikam wina makabram, uya polli. Bara man batana bris, batil puk bangkaia.“ Ba mairin ban laiki, puk bangkan. Bara ai lupiara aisin: „Batil kau kum' aik!“ Tukta bila: „Batil apu.“ Batana ban takaskan. Bara propheta bila: „Naha batana atkram, lalla ba waiknara aibapaia, woala man brima, plun atkaia manra, lupiam nannira sin.“

Naeman, wita tara, Syria king uplika bulpis brikan, sakunna ai maya alba mairin kumi brin ba tukta Israel wina balan. Ba tukta ban aisin: „Al-lai, Dawanki Samariara kaka, ba propheta bulpis saura ai musa wina sakbia.“ — Bara Naeman arras purara ulli, lalla pauni, diara pain uya bri, ba tasbara wan, propheta watlara kat balan. Sakunna Elisa ai napakan blikan, ban aisi: „Bukra was, man musam aima matlalkabi pura kumi aoallara Jordan dimmi aitas! bara man wina kli yamni takbia.“ Naeman baha wali, ai kupia baiwan, aisi katta: „Kais, yang lukri, ba waikna laimara balbia, ai mita bri, yang musira kangbaia, Dawan ai Godka nina bri, ba bulpis sakaia. Aoalla Abana, Pharpar yang tasbara yamni apia? diakan yang bara sikbaia apia?“ Ban wattaui makka wan. — Sakunna ai napakan lamara balan, ban aisin: „Aissiki, na propheta diara karna dauksi mai win kaka, man daukama sika! diakan man baha daukm' apia? Baha man aisin: musam sikbaia, bara man yamni

takma.“ Bara Naeman arras wina iwan, aoallara dimmi, ai wina sikban, witin wina kli yamni takan, tukta lupia baku. Bara Naeman kli wattau wan, God waiknara lakula wiaia. Witin diara yaia want, ban aisi: „Yang kaikisni, God woala apu sika; Israel Godka ba yakan God sika. Naha diara bris.“

— Elisa bila: „Dawan raya sa, kasak polli, ai mawanra yang buisni, yang baha brimn' apia. Kupiam lukpara, kli was.“ — Sakunna Gehasi Elisa napakan, ba lalla pini, pauni sin, koalla pain polli brin dauki kan, witin Naeman nina bliki wan, ban aisi: „Yang Dawanki manra wisatta: kais, bisiura tukta umpira woal balan Ephraim wina, lalla pini, koalla sin ba nannira blikram.“ Naeman bila: „Upliki, lalla ainwa bris, koalla uya sin.“ Baha puk napakan bri, kli ai dawanra wan — bara Elisa bila: „Anni wina balram, Gehasi?“ Gehasi bila: „Yang annira waras.“ Elisa wisatta: „Yang mai kaikras, man bukra Naeman ninara wattma? Man lalla, koalla ba sin briras kattma? Bamna Naeman bulpis man musamra balbia, yu bani man rayasma kaka.“ — Bara Gehasi Elisa mawan wina wan, bulpis pini polli brin.

Ba ninkara Israel kingka Syria nanni woal war aiklabi, Elisa propheta kingra diara puk win, dia Syria nanni daukan. Bamna Syria kingka ai sulliar nanni blikan, ba God uplika alkaia. Ba nanni timiara balan, tauan kir bapan. Titanra Elisa tukta buan, bara uttla lamara sulliar uya, arras uya kaikan. Bara napakan inni, winnan: „Allai, Maisterka, dia munnaia?“ Elisa bila: „Sibripara, yang nanni

kanra karna, ba nanni ban apia!“ Bara Elisa ai pura sunnan: „Yawan Dawan, witin nakra ilinkram, bara witin puk kaikbia.“ — Ban God ba tukta nakra ilinkan, witin lattan kaiki, ill ba purara arras uya polli kan; Elisa lamara.

Ankila nanni God napakan sika pura wina blikan, yawanra yabal yamni marikaia.

46. Israel alba takan Assyriara.

King matawoalsip pura woal Israel tronkara iwi kan, sakunna witin piua klutka kan. Kumi woala iki saban, bara king woala takan. Tasba umpira kan. Syria nanni balan, diara puk saukan; sakunna upla nanni ai dara walras. Propheta bani karna smalkan, sakunna upla bangwi ba saura polli takan; ba ninkara Assyria nanni, upla karna ba tasba alki brin, upla wina mana sakan. Bara Salmanasser, Assyria kingka, balan Samaria, tasba yamni puk saukan, upla nanni ba tasba wina kangbi Armeniara briwan. Ba Assyria nanni Israel nanni puk ai tasba wina kangbi sakan, alba baku daukan. Upla kumi kumi man ai tasbara iwi kan.

47. Jona propheta.

Bara God ai propheta Israel wina Assyria nan-nira blikan. Ninive, tauan tara, lalla kira, diara uya pain bri katta. Dawan Jonara bila: „Kaissa, bukra was, ba tauanra Ninive, upla nanni smalkaia, ba nanni saura polli issa.“ Sakunna Jona ba bila wali, ban daukras, witin kabora mapara wan; Dawan mawan wina.

Bara God passa tara blikan, upla puk luki kan, slaup ba baiwaia. Sibrin polli, upla bani ai Godra innan, ai dukia puk kabora lulkan, slaup igni daukaia mata. Jona slaup bilara aitniki, yapi kan. Bara slaup dawanka witinra bila: „Dia lukisma, ya-yapra? bus, man Godkamra puram suns.“ Bara upla pana pana aisi: „Kaissa yawan ba nina kaikpi, ya mata naha saura yawanra balan!“

Ba nanni Jona nina sakan. Witin ban wisatta: „Ai bris, kabora ai lulks, bara lamni takbia.“ Bara ba nanni Jona bri, kabora lulkan, ban kabo lamni takan. Bara inska tara balan, Jona puk ulangkan, sakunna Dawan witin kaikan, yu yumpa, timia



yumpa luan, ba inska witin kli saukara aikaban.

Bara God bila kli Jonara balan, ban aisi: „Kaisa, bukra was, ba tauanra Ninive, upla nanni ban smalks, dia yang mai wimni.“ Jona makka Ninivera impakan, karna winnan yabalra: „Kau yu yawan aiska woal, bara na tauan Ninive ambia; Dawan puk saukbia.“ Upla puk baha bila ai kupiara lukan, dia

propheta smalkan, sibrin polli kan. Ba wina plun piras, koalla taski dimman; king bui baku munnan, ban win: „Waikna, mairin puk, daiwan sin plun pibi' apia, upla bani karna pura sunnaia, upla puk ai kupia saura wina ulakaia, Godra tauaia, ban kra si: Witin yawan saura munbi' apia, wan ikbi' apia.“ God pura wina kaikan, upla puk saura wina ulaki tauan, bamna witin ba upla ikras, tauan ba ankras.

Sakunna Jona laui katta, God kupia pini ba tauanra kaikan, ban aisin: „Yang pruan ai dauki, kau iwaia apia!“ Witin ba tauan makka swin, uttla latara maki, bila kaikaia, naki ba tauan ambia saba. Bara Dawan timiara iwa pawaia yan, titanra ai wo-aya disda Jonara daukan. Jona auyapa kan, disda briaia, sakunna titan woala God liwa kumi blikan, ba iwa sammi pin, bara lapta ull' aula, woaha puk sraui kauan. Bara lapta Jona lallra karna ankan, witin kli pruaia want. Bara God bila: „Man lukisma, man kasak polli lauisma?“ Witin bila: „Ao yang kasak lauisni.“ Bara God bila: „Man kupiam latwan, ba iwa mita, man baha mankras, timia kumira pawan, timia woalara kli srauan; sakunna yang kupi latwan apia, Ninive ba tauan tara mata, ba bilara upla 120000 ba nanni kaikras, dia aikika, dia smikika, daiwan uya polli sin!“ —

48. King nanni Judara.

David tronkara Jerusalemra mani 372 king yawanaiska iwi kan, Juda karnira kau mani 120 ban kan, Israel karnira pot tiwan. Sakunna David mula nanni kanra saura kan, kumi kumi man kupia yamni,

Josaphat, Hiskia, Josia king yamni kan. Ahas altar uya paskan Jerusalemra, Baal mayunaia, God watla door prakan, bamna upla nanni God watla kli dim-ras, God watla Dawanka pruan baku. — Hiskia, Ahas lupia, kupia yamni God watla, tempel door kli sakan, God-baki Jerusalem wina kangbi sakan. Witin Israel nanni paiwan, yu yamni ba yua. ankila laan aikuki daukaia. Bara Sanherib, Assyria king-ka, ai wita, sulliar nanni sin blikan, Juda tauan puk alki brin, Jerusalem sin briaia want. Sakunna witin bui Godra latuban, bara Hiskia ai koalla kal-kan, Israel Godra ai pura sunnan. Bara Dawan ankila makka wan, ispara bri, timia kumira 185000 upla uya polli sabi ikan. Kais titanra tasba bang-wan upla pruan uya kan. Sanherib baha kaiki, kli Ninivera makka wan.

Bara Hiskia pot pruaia katta, Jesaia, propheta



witinra balan, ban aisi: „Man wamtla sut daukram, man pot pruma!“ Hiskia inni, ai pura sunnan, ai piua kau yerri daukaia. Bara Dawan Jesaia kli king watlara blikan, ban bila: „Man kli taui was, ban Hiskiara wis: God Dawan ban bila: Yang walri, dia man makabram, yang kaikri man namkra laya, yang kau mani 15 kulkamni, man piua yerri daukaia.“ Bara Jesaia sika witin yukrira prakan, yu yumpa luan, king kli ainwa takan, tempelra dimmi wan, Godra ai pura sunnaia.

Hiskia lupia, Manasse king takan, witin kupia saura, ai upla nanni yamni smalkras, dia witin aissa yamni daukan, kli saukan. Almuk takan, upla Babylon wina king silakra mankan, ban briwan. Bara ai kupia saura wina ulakan, God ai bila wali, Manasse kli king takan, God-baki saura Jerusalem wina saki lulkan.

Amon, ai lupia, kanra saura katta, sakunna ai piua pot aimakan, mani woal luan, Josia kau tukta king takan. Nanara king yamni trinkara iwi kan. Witin Dawan mawanra diara kasak daukan, ai dama David baku. Witin kau uria, God bila dauki kan, God-baki puk saki lulkan, God watla kli yamni daukan. Kais, bara wonktaya God watlara kaiki sakanbaha „Biblia“; Moses wina ulban; baha patitara tiwan, upla auyatiwan. Priesta baha wonktaya kingra bribalan; witin baha wali, sibrin taiwan, ai koalla kalkan. Sakunna God mairin kumi nina Hulda blikan; ban aisi: „Was ban Israel Godka bila: bamna man kupiam ba God bila wali, swapni takan, man

yamni kupia kumira pruma, man namkra baha saura kaikbi' apia, dia yang na tasbara blikamni.“

Ba wina Josia kupia karna takan, God bila kasak daukaia. Witin upla puk aikuki winnan, God bila, ai laka sin smalkan. Witin ba altar Bethelra kriki saukan, ba upla dussa raiti wina sakan, altar purara baha ankan; propheta God bila ban aisi katta baku.

Sakunna Josia pruan, upla puk kli saura takan. Witin lupia woal, mula woal sin Jerusalemra king takan, sakunna ba nanni pot kangban takwan, upla puk God bila walras, saura man dauki kan.

49. Propheta nanni.

Propheta, baha God wina blikan, smaya kakaira, upla puk smalkaia. Dia ba nanni smalkan, Biblia bilara ulban. Ba waikna nanni upla pukra God laka smalkan, diara yamni munnaia, saura ba swiaia. Jesaia, Daniel king taya wina; Jeremia, Ezekiel priesta taya wina kan. Elias, Elisa, Jona, Mika sin upla umpira, Amos bip papakra katta.

Jeremia bila: „Dawan ba tauan pot saukbia, sakunna upla puk ai kupia saura wina ulakbia kaka, God baha daukbi' apia.“ Witin mani yawanaiska pura yumpa Juda nanni God bila kasak smalkan, sakunna ba nanni walras, kupia saura takan, bara God bila: „Yang Jerusalem saukamni, mani 70 luan, bara upla puk Babylon wina kli balbia.“

Ezekiel propheta bila: „Upla puk Jerusalem wina wabia, alba baku, tasba woalara“ — sakunna upla nanni baha ai kupiara lukras.

Baha propheta nanni kasak karna aisi kan.

Jeremia ban bila: „Dikwa aisawan, naki munnaia? yang ba brimni, wau! makupamni. Kais, Israel nanni, yang baku Jerusalem makupamni.“ Yu woala witin ban smalkan: „Yang kaikattni, waikna kumi sumi dauki kan, sakunna ba sumi yamni takras, bara baha kli ai mita ni sumi woala daukan. Yang sin Israel lupia nanni ban brimni, ban munnaia. Kais ba waikna slaubla bri, sumi daukaia, yang ban Israel ni daukamni.“ Bara witin sumi



atkan, bri tasbara lulkan, wita nanni, upla puk mawanra, ban aisi: „God wan Dawan ban bila: Baha sumi baku, yang upla puk saukamni, kli yamni takbi' apia — ban yang bui naha upla puk, naha tauan Jerusalem saukamni, uttla puk ankamni, man nanni saura Godra daukram bamna.“

50. Juda nanni Babylonra.

Juda nanni tila God bila luki kan, tila lukras, nanara puk kaiki kan, diara puk, dia propheta nanni aisin, ban takan. Kaldaea nanni, upla kupia apu,

uya polli balan; ba nanni Jerusalem tauan yamni ai mita ni saukan. Nebukadnezar, Kaldaea kingka, Juda tasba alki brin, upla nanni tasba mana aibapaia kan; witin ba king, ai wita nanni, ai sulliar nanni puk Babylonra briwan. Witin ba tasbara king woala mankan, bara mani mata woalsip ban luan. Nanara Zedekia Aegypten nanni makaban, Kaldaea nanni kangbi sakaia; sakunna ba sulliar nanni balan, li samra tara baku. Juda nanni ai tauan mata aiklaban mani woal, sakunna ba piua aimakan, plun wauan, yaptika nanni ai lupia bri iki pin. Ba nin-kara lamika tauanra dimman, ba nanni Zedekia alki brin, ban daukan, dia Ezekiel propheta pati tara win: „Man Babelra wama, bara pruma, sakunna ba tasba man sip kaikaia apia.“ Kaldaea nanni ai nakra sabi daikan; sakunna ba yuara kau kaikan, naki ai lupia nanni pruan. Kaldaea nanni ba tauan Jerusalem, ba God watla slingbi ankan, ba sumi, dik-



wa, lalla pini puk God watla wina saki, Babylonra briwan, sakunna God watla tiwan, annira, yawan kaikras. Upla puk Jerusalem wina wan, tasba woa-lara turui takan; kumi kumi bara iwi kan.

Wita Gedalia, waikna kupia yamni, sakunna upla saura witin ikan. Jeremia, propheta ba tasbara iwi kan, Jerusalem aisawan kaikan, witin inni aiwoni, wonktayara ulban: „Umpirasni, allai, tauan yamni puk aisawan.“

51. Daniel.

Juda nanni Babylonra iwi, alba baku kan; sakunna ba king Nebukadnezar kupia pini takan. Witin tukta nanni smalki kan, nina Daniel, Sadrak, Mesak, Abednego; ba nanni naika wita nanni takan; ba nanni upla pukra God bila smalkan. Ba nanni lukan, king plunka piaia apia, baha saura, makaban patta woala piaia, li man diaia. Bamna God ba nanni yamni, karna daukan, pua aimakan, king mawanra buaia, upla sins kira kan. Ba wina king napakan takan.

King Nebukadnezar upla lilka lalla pauni wina daukan, yawan aiska yumpa mita yerri. Upla puk aikuki balan, ba lilka mayunnaia. Waikna kumi winnan: „Wali bas, amman kais! Upla, tukta nanni; man walma kaka, kiptaya tututwan, bra puban, trumpet sin, bara man lulam krikaia, ba lilka tara mayunnaia, baha king Nebukadnezar paskan. Sakunna ba waikna ai lula krikas kaka, witin pau-tara ambia.“

Ba yuara Sadrak, Mesak, Abednego ai lula kri-

kras, ba lilka mayunras. King baha wali, ba nanni ai mawanra winnan, ban aisi: „Nakissa? man dia-kan yang Godki, ba lilka mayunras? Kaissa, an-nira ba Godka, ya mai sakbia yang miti wina?“ Bara ba nanni aisin: „Kais, yawan God, yang nanni witin yakan mayunaia, witin Dawan, yawan mitam, wina sakaia, witin ban daukbi' apia kaka, man ban kaikma, yawan ba lilka, man lalla pauni wina pas-kram, mayunaia apia.“ Bara Nebukadnezar laui polli, kupia baiwan, ban win: „Pauta tara mukram.“ Ban ba waikna yumpa ai koalla, prak, trahat puk bri, pauta laknira lullkram. Ba pauta karna polli, upla woala anmi pruan, sakunna ba waikna yumpa amras kan. Bara king kupia laptiwan ban aisin:



„Yang ba upla yumpa lulkri pautara lilapassra, kais, yang waikna woal woal pautara impaki kaikisni, puk ainwa sa, kumi lika God lupia baku.“ Bara Nebukadnezar pauta bila lamara wan, ban winnan:

„Sadrak, Mesak, Abednego, man nanni God uplika, bal taks, nara bal!“ Bara ba nanni taki wan, ai tawa sip amras, ai koalla sin ankras kan. King baha kaikan, ban bila: „Man Godkam karna polli, witin yakan mayunpi, witin ai ankila blikan, ai uplika nanni sakaia, ya witinra luki kan.“ — Ba waikna yumpa wita polli takan.

Nebukadnezar ba Daniel kau woama uya mayunan, Belsazar king woala sin, sakunna Darius ba Media wina, Daniel alinuk wita tara daukan. Wita woala baha kaiki, Danielra tummi, witin ikaia lukan. Bamna ba lamika nanni kingra aisin, baha la daukaia: „Ba upla kati kumi Godra ai pura sunni kaka, kingra apia, witin prubia, limi witin pibia!“ Daniel yu bani aima yumpa ai Godra ai pura sunnan ai watlara param. Ai lamika ba tanka kingra win. King ba Danielra latwan brin, sakunna ba la pot daukan, ba upla, ban dauki kan, ba limi untara lulkaia. „Man Godkam,“ king Danielra win, „man ai bila yamni daukisma, witin man woal kabia.“ King bui ba door untara ai matdinka ni prakan, witin plun piras, ba timiara yapras. Titan polli untara wan, ban winnan: „Daniel, God raya napakan polli, man Godkam limi bila wina mai sakan?“ Daniel bila: „Ao, yang Godki ai ankila blikan, witin limi bila prakan, ba nanni ai samras!“ Bara king lillia dauki kan, Daniel unta wina sakan, sakunna witin ba lamika nanni untara lulkan. Bara limi nanni ba upla puk makka kalki pin. Sakunna Darius baha la daukan: „Upla puk na tasbara Daniel Godka mayunaia, witin ai napakan limi napa

wina sakan, witin karna polli, witin yakan Dawan kasbrika purara, na tasbara sin.“



52. Jerusalem kli paskan.

Mani 70 luan, Jerusalem aisawan ban kan, bara Kores, Persia wita, Assyria, Media, Babylon king takan. Witin bui Israel lupia nanni puk ai tasbara kli blikan, ai tauan, God watla sin kli paskaia. „Dawan Godkam pura wina, ban bila, yangra win Jerusalemra uttla makaia; ya God uplika, witin wabia, God witin woal kabia.“ Witin unkra 5400 lalla pauni wina, tempel wina Babylonra briwan, puk kli blikan. Ba upla nanni Jerusalem aiauyatiuras, kli bara ai watlara wan. Sakunna Juda uya Babylonra iwi kan, 42000 waikna nanni ai taya kuki Jerusalem yuika kli pliki wan, Josua priesta tara, Serubabel woal wan.

Ba nanni God altar kli paskan, walpa tasbara mankan, God watla kli raya makaia. Wita nanni buan, trumpet bri, God nina mayunaia; sakunna

dama nanni, ba tempel almuk kaikan, uya innan,
ba uttla uria umpira kaikan, bamna dama nanni



inni, kupia latwan, upla woama aiauyapa, yamni
aiwoni kan. —

Haggai, Sacharya propheta kupia karna, upla
yamni smalki, maisanikan. Samarita nanni balan,
walpa sin paskaia, sakunna Juda nanni baha puk
kangbi sakan, bamna ba nanni war aiklabi, ispara
bri, upla bakriki walpa paskan, woala war aiklaban.

Ba taim Kores pot pruan, Darius, Artasasta king
katta.

Darius ba waikna Esra Jerusalemra blikan, witin
diara puk tempel dukia Babel wina briwan, witin
upla puk smalkan, Godra ai pura sunnaia. Arta-
sasta ai uplika, ai napakan Nehemia kli blikan, ba
tauan aisawan kli paskaia.

Ba king Persia wina Juda nanni yamni kaikan.
Xerxes king praud polli, Juda mairin kumi nina

Esther ai maya brin. Mordekai, ai kua, ba tanka kaiki naki upla saura king Xerxes ikaia want, king mayara aisin, ai nina wonktayara ulban. Mani woal



luan, Mordekai, Juda, wita tara Persia tasbara takan.

Esra, Nehemia waikna yamni, kupia pini kan; sakunna Malakia propheta ban bila: „Kais, yang ankili blikamni, yabal param kainira daukaia. Bara Dawan pot balbia ai watlara, ya man plikisma, ankila yamni, ya man sakisma. Kais, witin pot aula, Dawan bila!“

A p p e n d i x.

Mani 483 lubia, Daniel bila, Jerusalem kli paskaia wina, Kristus balaia piua aimakan. Ba taim Juda nanni ainwa, bara umpira kan.

Alexander karna ba tempelka, priesta nanni sin mayunan, upla nannira kupia pini katta. Witin pruan Ptolemaeus, ai wita kumi king takan Aegyptenra, ba tasba Judea aiska alki brin, upla tausin uya Aegyptenra alba baku briwan. Ai lupia kupia pini Juda nannira kan, lalla uya aibapan, God wonktaya bila grikara tauaia. Mani 100 pot luan, bara Antiokus Syria king, upla puk alba daukan. Ba waikna kupia apu, upla uya ikan. Taya kumi, kupia karna, Makkabaei nanni bara iwi kan. Ba nanni tasba saura wina sakan. Sakunna ba nanni kli alba takan, Romani, upla karna tasba alki brikan.

Herodes king takan, sins polli kira, kupia karna, sakunna saura, upla uya ikan.

Ba piua Malakia pruan wina, propheta woala kli balras, upla umpira kli maisanikaia. Bamna upla puk David Lupia, God wina blikan, Messiäs bila kaikan, David tronka kli paskaia, Romani ba tasba wina kangbi sakaia. Sakunna ban apia kan. Jesaia patitara win: „Dia God wan Dawan lukissa, man lukras; upla yabal, God yabal apia, sakunna naki kasbrika tasba purara, ban God yabal kanra purara yawan yabalra; dia God lukissa, kanra purara, dia upla lukissa.“

Testament raya.

1. Gabriel, Zakarias.

Bara Herodes king takan, ba taim waikna yamni nina Zakarias, ai maya Elisabet, Juda illra iwi kan. Ba nanni pot almuk, sakunna lupia sakras, bamna umpira kan. Bara Zakarias, priesta Jerusalemra tempelra wan, pauta altar purara mukaia, bara God ankila witinra balan, ban aisi: „Man lupia kumi brima, ai nina Joannes. Witin Israel lupia nanni smalkbia, witin Messias kainara wabia, Elias baku.“ Zakarias luki kan, ba ankila bila ban kabi' apia. Ankila witinra bila: „Yang nini Gabriel, yang God mawanra buisni, witin ai blikan, manra aisaia. Kais, man bilas takma, ba yuara kat ban kabia, man yang bili kupiamra lukras, bamna ban takan.“ Ba yua wina Zakarias bila kumi sip aisaras, latara wan, upla smalkaia, sakunna sip apia. —

Kati matlalkabi luan, bara ba ankila mairinra balan, nina Maria, witin Nazaretra iwi kan, ban aisi: „Nakisma, mairin kupiam pini, Dawan man woal kabia, man yamni pollisma.“ Maria umpira,



kupia laptiwan, baha wali, sakunna ankila kli ban aisin: „Kupiam lukpara, Maria, God wan Dawan yamni mai kaiki. Kais man lupia kumi sakma, witin nina Jesus kabia. Witin tara, God lupia takbia, wan Dawan witinra David ai aissa tronka yabia, witin king kabia Israelra ban kaia.“

Bara Maria makaban: „Naki kabia?“ Gabriel bila: „God lilka yamni manra balbia, Dawan kar-nira mai kangbia, bamna ba lupia yamni biamra wina aisuban, God lupia maki kabia. God diara puk daukaia, dawan sika.“ Maria baha bila ai kupiara yamni lukan, ankila kli makka wan.

Ba ninkara Maria impaki wan, ai uplika Elisabet, Zakarias maya, kaikaia. Baha witin kaiki, ai kupia lillia polli, Maria, Dawan yapti makan. Sakunna Maria bila: „Sang lilki Dawanki mayuni, yang lilka auyapa polli, yang sasakra kupia pini, witin ai alba umpira yamni kaikan. Kais na wina upla puk yang

mayuni kabia, witin diara tara yangra daukan, witin karna polli, witin nina yamni!“

Kati yumpa luka, Maria kli ai watlara Nazaretra wan. Elisabet ai lupia aisuban, dia ankila Zakarias-ra pot win. Yu 8 luan, bara uplika nanni wisatta: ai nina Zakarias makaia, ai aissa baku. Yapti bila: „Ban apia, ai nina Joannes makaia.“ Bara ba nanni aissikara makaban, witin kau bilas, wonktaya brin, ban ulban, ai twissa langwan, lattan aisin: „Ai nina Joannes kabia!“

Ba wina witin kli aisi katta, upla puk taiwan, pana pana makaban: „Dia lukisma, ba lupia di kau takbia?“

Sakunna Zakarias kupia God lilka bangwan, ban aiwoni kan: „Dawan mayunpi! Israel Godka ai upla latwan brissa, saura wina wan sakan, dia propheta nanni pati tara aisin, witin ai kupiara lukan, dia Abrahamra, wan aissara win. Sakunna lupiki, man Dawan propheta takma; man Dawan kainara wama, yabal param daukaia, upla puk smalkaia.“ — Ba tukta Joannes ban pawan, kupia karna takan, yakan twira iwan, ba ninkara Israel lupia nanni smalkan.

2. Kristus aisuban.

Bara piua aimakan, Augustus Roma wita la daukan, ai upla puk kulkaia, tasba mana aibapaia. Maria, David king masrika wina, sakunna nanara umpira polli, ai maya Joseph waikna umpira Nazaret wina.

Witira ankila balan, ban aisi: „Maria lupia kumi sakaia, ai nina Jesus, sasakra, makaia, witin

ai upla puk saura wina sakbia.“ Bara Josephra bila: „Maria ai maya briaia.“ Witin woal Bethlehemra wan, David masrika bara iwi katta, bamna ban takan, dia Micha, propheta pati tara aisin, Bethlehem tauan uria wina king tara Messias balaia.

Upla uya ai drubi wan, uttla nanni puk bangwan, bamna Maria bip watlara dimman. Nara Maria ai lupia tawakia sakan, koalla sukra bilara srukan, bip patta watlara tnikan; bara ba tukta lupia umpira iwi kan, ya nanara kasbrika purara Dawan, wita polli takan. Joseph, Maria ba man kaikan, upla woala puk ai kupiara lukras.

Sakunna upla kumi kumi pot walan. Ba inslara waikna nanni iwan, ba timiara ai daiura paki, ai waki kan, bara ankila, igni tara bilara, balan, ban aisin: „Kais, yang diara yamni maisampakaia balri,



upla nannira puk ban kabia, naiwa man nannira ba sasakra aisuban, witin Kristus, wan Dawanka, nara Bethlehemra, man God Lupia ba bukra kaikma, koalla sukra srukan, bip watlara tnikan.“ — Ba ankila kau ban aisi, bara ankila puk pura wina ai druban, ban aiwoni kan: „Gloria Godra purara, na

tasbara kupia kumi, upla nannira yamni kaikissa.“ Ankila ban karna aiwoni, kli purara ulli wan.

Ba waiknika nanni kau ba timiara Bethlehemra plappi wan, bara puk sakan, dia ankila win. Upla puk baha tanka wali, taiwan, sakunna Maria baha bila puk ai kupiara luki brin.

Yu yawanaiska woal luan, yaptika ai lupia Jesus tempelra Jerusalemra briwan, Moses laka wali daukan. Bara waikna almuk kumi, nina Simeon kan, witinra God lilka bui win: man nakra ni God lupia, Messias, wan sasakra kaikma, bara pruma. Ba yuara witin tempelra dimman, ai pura sunnaia, bara tukta ba ai klaklara bri, ban aisi: „Dawanki, nanara man napakan pot prubia, yang naikra kaikri man lupiam, wan sasakra!“ Mariara win: „Kais, naha man lupiam ban kabia, upla uya rakaia, upla woala ikaia, bara ispara man kupiamra dimbia, upla puk dia ai kupiara lukissa, lattan daukaia.“ Hanna, propheta mairin, almuk polli ba yuara sin dimman, Dawan nina mayunaia uplara puk Jerusalemra sasakra bila kaiki smalkan.

3. Waikna magi lallma win.

Joseph Maria woal kau Bethlehemra iwi kan, bara waikna sins kira magi lallma wina balan, Jerusalemra makabaia: „Annira ba Israel kingka aisuban? Yang nanni ai slillma lallmara kaikri, yang balri ba kingka mayunaia.“ Upla bila kaiki kan mani tausin woal woal, Messias mata, namika wali kan, witin pot aisuban, sakunna Herodes sibrin, kupia laptiwan, upla puk Jerusalemra sin. Herodes

ai wita nanni aikuki winnan, wonktaya makabaia: annira Messias Kristus aisuban? Ba nanni win: „Bethlehemra Judea, propheta ban ulban.“ Herodes kupia saura ba magi nanni kli winnan, ban makaban: „Akia slillma ba kaikram?“ Bara ba nanni Bethlehemra blikan, ban aisi: „Was, ba tukta mata puk makabaia; man sakram kaka, kli yangra bal, tanka ai wiram, bara yang sin balamni, tukta ba mayunaia.“ — Sakunna ai kupiara aika lukan.

Ba magi nanni tutnira kli impaki wan, ba slillma lai wina kaikan, yabal ba tuklara marikan. Ba nanni ai lula krikan, ai pura sunnaia; bara ai dukia



sakan: lalla pauni, didi, mistruk witinra yan. Sakunna Jerusalemra kli waras, God bila: yabal wolarara wamtlara was. Herodes baha wali, laui polli katta, witin lukan, ba kingka raya aisuban kli ikaia, sakunna annira witin sakaia, kaikras kan. Herodes ai sulliar blikan, tukta puk Bethlehemra, ba lamara ikaia. Man ban lukisma, yapti nanni karna polli

inni kan. Sakunna Herodes ba tukta Jesus sip ikras, God bui ai lupia yamni kaikan. Witin ai ankila Josepkra blikan, ban win: „Aini bus, baha lupiam bris, ai yapti sin, Aegyptenra aini was, bara takaski iwaia, Herodes naha tukta ikaia want bamna.“

Bara Joseph kau ba timiara buan, tukta bri, ai yapti sin Aegyptenra plappi wan. Ba ninkara He-



rodes pruan, ankila kli balan, Josephra bila: „Nanara man kli wamtlara was, ba nanni pot pruan, tukta ikaia pliki kan.“ Ba nanni kli wan, Nazaretra balan, bara iwaia.

4. Jesus kau tukta.

Tukta nanni! ban apia, nanara man Kristus tukta tanka walaia wansma, dia daukan, dia aisin. Ba tukta Jesus, ai lilka karna takan, sins kira polli, God witin yamni kaikan.

Tukta, man ban baku kama kaka, yamni kaia katta. Witin Dawan God lupia, tukta umpira takan, man baku. Witin plun dauki, diran dauki kan, witin yapi kan, yapti witin smalkan, witin yamni aisi, ai yapti bila wali, ban daukan, tukta yamni kan. Witin diara saura daukras, kunnin aisaras, ai kupia yamni bamna. Witin God bila yamni kaikan, baha

wonktaya uya aisin, ai kupiara luki kan, tanka mata. Naha lattan kaikisma, dia Lukas ai wonktayara ulban.

Aissa, yapti woal mani banira Jerusalemra wan, ai pura sunnaia. Ba tukta Jesus mani 12 takan, ai yapti woal ulli wan, yu yamni daukaia mata. Baha yua sut luan, upla woala kli ai watlara wan, sakunna tuktika ba Jesus Jerusalemra takaskan, ai yaptika baha kaikras kan, witin ai kupiara lukan, ai lupia upla woala tilara wan. Yu kumi pot luan, bara ai lupia pliki, sip sakras, kli Jerusalemra tauu wan, ai lupia plikaia. Yu yumpa luka bara ba nanni ai lupia kli sakan, God watlara, tempelra iwi kan, sasmalkra nanni tilara, witin bila walaia, bara sin



makabaia. Ba upla, ai bila baikra walan, puk taiwan, ai kupia wina sins kira polli diara makabi walan. Yapti ai lupia kaikan, bara ai kupia laptiwan, ban aisi: „Lupiki, naki munni man ban yaram? Kais, man aissa wi yang woal mai pliki kan, wan biarrara sari dimman.“ Bara witin bila: „Dia dukiara ai plikattma, man kaikras, yang aissiki dukia

dauki kamni? aissiki aikan, baha yang must dauki kaia.“ Sakunna ba nanni ba bila tanka sip walras. Bara witin ai yapti woal Nazaretra wan, ai yapti bila yamni wali, dauki katta. Maria baha bila puk ai kupiara dinki brin. Bara Jesus yamni pawan, ai kupiara yamni takan, God bui, upla sin witin yamni kaikan.

5. Joannes Jesusra li laiki, Waiwan witin trai kaiki kan.

Ba tuktika Joannes waikna tara suddakan. Witin twira iwi kan, God bui ai bila witinra blikan, Israel nanni smalkaia. Bara witin aoallara nina Jordan balan, ban smalkan: „Kupiam saura wina ulaks, God tasba purara aula, narasa!“ — Joannes koalla kamel taya wina sippan, ai maisawilla bip taya wina, witin patta krukru, nasma woal. Bara witinra upla puk Jerusalem, Judaea wina impaki wan; witin aoalla Jordan wina li bri ba nannira lallra laikan.

Upla uya ban luki kan, witin bui Messias baku kranni, Joannes ban aisin: „Yang li man brisni, manra laikaia, sakunna waikna kumi ninara balbia, yang umpira ai mina awa sakaia, witin yangra kanra tara; witin Kristian mai daukbia, God lilka yamni woal, pauta lakni baku.“

Piua aimakan, Jesus mani 30 takan, witin Galilaea wina Jordanra impaki wan Joannesra. Witin kaikan, ban wisatta: „Yang man wina takaia wansni, sakunna diakan man yangra balram?“

Jesus bila: „Nanara yarka ban kabia, dia wan aissa bila, baha dauks.“ — Bara ban daukan.



Joannes Kristusra li laiki munnan, aoalla wina ulli wan, ai pura sunni, bara kais kasbrika door quawan, Joannes God lilka kaikan, pura wina bal iwan, butku baku, witin purara ullan. Bara bila baikra pura wina balan, ban winni: „Naha waikna, yang lupiki, yang witin yamni kaikisni!“

Ba ninkara Jesus twira impaki wan, Waiwan (Devil) witin trai munni, yu 40 witin daiwan tilara iwi plun piras. Baha piua luan, witin plun dauki kan. Bara ba traikakaikra witinra wan, ban makabi: „Man God lupia kaka, wis, naha walpa plun takbia!“ Sakunna Jesus bila wina: „Ban ulban: Upla ba plun yakan man piras, sakunna bila bani God wina balan, baha wan patta kabia.“ Bara Waiwan witin woal tauanra wan, God watlara tempel ta purara sunnan, ban aisi: „Man God lupia kaka, bara srutwi kaus! Ban ulban: witin ai an-

kila blikbia, mai twilkaia; bara man minam walpara prukm' apia." Bara Jesus witinra: „Ban ma para ulban: man Godkam Dawankam trai munpara."

Ba wina Waiwan witin woal ill lai purara wan, tasba nanni puk witinra mariki, karnira sin, ban aisi: „Naha diara puk yang maikamni, tasba nanni sin, man lulam krikma kaka, yangra mayunnaia, naha yang dukia, yang manra maikamni." Bara Jesus witinra bila: „Tak was, makka Satan! ban ulban: Man Godkam mayunram, man Dawankam, witin yakan Dawan bamna." Bara Waiwan sutta kan, makka wan, kais ankila nanni witinra balan, ai bila wali, ban daukaia, ai dawan mayunaia.

6. Jesus ai uplika nanni pliki winnan.

Joannes Jordan unra buan, ai uplika woal sin; Jesus aula kaiki kan, ban wisatta: „Kais God lupia (lamka)!" Bara ba uplika woal ai nina blikan. Jesus kli wattau, ban aisin: „Dia plikisma?" Ba nanni bila: „Rabbi (Master, sasmalkra) annira man iwisma?" Witin bila: „Bal kais!" Ba nanni witin woal wan, ba yua ban iwi kan. Ba nanni nina Joannes, woala Andreas. Andreas ai moini Simon saki, ban wisatta: „Yang nanni Kristus kaikri;" bara witin Kristusra briwan. Jesus witin kaiki, ban bila: „Man Simon, Jona lupia, man nina Kephas, Petrus, walpa, kabia." Yua woala Jesus Philippus sakan, witinra bila: „Yang nini blikram!" Philippus ba Nathanael sakan, ban aisi: „Yang nanni ba waikna sakri, Moses, propheta nanni pot ulban; Jesus, Joseph lupia, Nazaret wina." Bara Nathanael bila:

„Dia yamni Nazaret wina balbia?“ Philippus witinra: „Nara bal kais!“ Jesus Nathanael aula kaikan, bara ban aisi: „Kais Israel waikna kumi, kasak polli witin kupia saura apia.“ Nathanael bila: „Anni wina ai kaikisma?“ Jesus bila: „Ba taim, Philippus kau mai winras, man sikia duss mununtara iwattma, yang mai kaikri.“ Nathanael bila: „Rabbi, kasak man God lupia, man Israel kingka.“ Jesus bila: „Man ban lukisma, yang mai wisattni, yang mai kaikri duss mununtara; man diara woala kanra tara kaikma.“

Yu yumpa luan, yu yamni Kanara Galilia kan, Maria, Jesus yapti ba sin bara katta. Kristus ai uplika woal ba sin yu yamni daukan. Ba wain pot suddakan. Maria Jesura: „Nanara wain apu.“ Jesus kli witinra bila: „Yang pua kau balras.“ Ai yapti napakanra: „Dia witin bila, baha ban dauks.“

Sakunna sumi tara matlalkabi bara buan. Jesus napakanra bila: „Ba sumi li ni bangks.“ Bara ba nanni puk bangkan. Bara wisatta: „Li laikram, ba waiknara bribal trai kaikbia.“ Sakunna ba li nanara wain yamni takan. Ba waikna wain trai kaiki, li wina daukan, ai dawan winni, ban makabi: „Upla puk wain yamni laiki, bara ai uplika pot din, wain woala laikbia. Man ba wain yamni takaski, kau briram.“ Naha mirakula Jesus param daukan, upla puk kaikan, witin karnira mariki, uria wina karna dauki. Ai uplika baha ai kupiara yamni lukan.

7. Mairin Samaria wina.

Jesus kau Jerusalemra iwi, bara yu yamni daukan; baha luan kli Galilira impaki wan. Witin Samaria bak lilapassra lui wan, tauanra balan, nina Sikar; bara Jakob li unta kan. Witin diran swapni kan, impaki uya bamna walpa purara iwi kan. Ai uplika nanni tauanra dimmi wan, plun'atkaia. Bara mairin kum' aula, Samaria wina, li pankaaia, Jesus



witinra bila: „Li uri' aik, dimni.“ Ba Juda nanni Samaria woal ai uplika apia, bamna ba mairin taiwan, ban makabi: „Dia lukisma, li maikaia, man Juda wina, yang Samaria mairin!“ Jesus kli bila: „Man kaikattma kaka, ba waikna, ya manra li makabi, man li raya witinra makabi kama. Ba upla, ya ba li dibia, yang wina, witin kli diran daukbi' apia.“ Ba mairin tanka sip walras, ba li God lilka pura wina, bamna kli aisi: „Dawan, ba li yangra aik, bara yang kli nara wamn' apia, na li pankaaia.“ Jesus kli bila: „Was man mayam winnaia.“ Ba

mairin aisi: „Yang maya briras.“ Jesus kli bila: „Ao, ban sa sika, waikna matasip man pot briram, sakunna ba waikna, man maya apia.“ Mairin baha wali, Kristus diara puk kaiki, ban lukan, witin propheta, smayakakaira, bamna ban makaban: „Dawan, yang kaikisni, man prophetasma, wan dama nanni patitara wina na ill purara (Garizim) ai pura sunnan, sakunna Juda nanni wisatta, Jerusalem ba tasba yamni, bara man pura sunnaia; ya kasak polli daukan?“ Jesus kli bila: „Kupiamra luki bas, mairin, piua balbia, bara ba upla yamni wan aissa ai lilka ni kasak polli mayunbia. God ba lilka sika, ba nanni witinra ai pura sunni, ai lilka ni kasak polli witinra pura sunnissa!“ Mairin witinra: „Yang kaikisni, ba Messias aula, witin diara puk wan smalkbia.“ Jesus witinra bila: „Yang bui, ya manra aisisni.“ Ba mairin baha wali, ai li sumika makka swin, tauanra aini plappi wan, upla nannira ban win: „Bal, kais, waikna kum' barasa, ya diara puk ai win, dia daukri, witin Kristus, Messias saba?“ Bara ba nanni tauan wina balan, witinra wan. Witin yu woal bara takaski, upla puk smalkan. Bara upla uya ai kupiara ai bila lukan, ban mairinra aisin: „Yang nanni yamni lukamni, man bilam mata apia, sakunna yang nanni walri, bara kaikri, naha waikna Kristus, Messias kasak polli, tasba sasakra!“

8. Petrus inska alkan, bara lalla sakan.

Jesus ba tauanra Kapernaum iwi kan, ba Galilia kabo lamara. Bara yu kumi kabo unra bui, upla puk witinra ai drubi balan, God bila walaia. Bara

witin slaupra aimakan, upla smalki. Ba ninkara witin Petrusra: „Man kabora ulaks, bara man tankam lulks, man inska uya alkma.“ Petrus bila: „Maisterka, yang nanni timia aiska lalauri alkri, sakunna inska kumi sip sakras; sakunna man bilam wali, yang ba tan lullkamni.“ Bara inska uya polli miski bukan, tan pot kalwaia man. Bara ai uplika winnan, slaup woalara ulaki: „nara bal, yang tan raskaia.“ Ba slaup woal puk bangwan, pot kabora dimman.

Simon Petrus baha kaiki, Jesus minara kauan, ban aisi: „Dawan, yang mawan wina takwas, yang umpirasni, kupi saura.“ Ba nanni puk taiwan, baha inska uya kaikan. Jesus ban aisin: „Yang nini blik, yang upla aialkra mai daukamni.“ Bara ai dori saukara raskan, diara puk makka swin, witin nina blikan. — Ba ninkara Jesus ai uplika nanni woal Kapernaumra impaki wan. Bara ba waikna balan, God watla mana makabaia, Petrusra makaban: „Man Masterkam ba God watla mana aibapaia want apia?“ Petrus bila: „Ao.“ Witin kli ai watlara dimman, Jesus makabi: „Dia lukisma Simon? Ya wina wita tasba mana bribia? Ai lupia wina, upla woala wina?“ Petrus bila: „Upla woala wina.“ Jesus kli witinra: „Bamna lupia nanni aibapaia apia. Sakunna ban swis, makka was, kabora kiul ba lulks, ba inska kumi man alkma, bris, ai bila man kwakma kaka, man lalla, stater (makaroni) sakma. Baha lalla bris, witinra yas, yang mita, man mita sin.“ Bara Petrus ban daukan, Kristus ai mana aibapan, witin God lupia, Dawan polli.



9. Kristus upla ill wina smalki.



Upla uya balan, Kristus bila walaia. Witin ill purara iwan, upla yamni smalki, ban aisin: „Yamni polli, ba nanni ai kupiara umpira, ba nanni ai kupiara sari bri, ba nanni kupia pini, ba nanni plun dauki, diran dauki, kupia kumi dadaukra.“ Witin ai uplika nanni „salt“ makan, „tasba ingni“ makan. Witin bila: „Yang God laka saukaia balras, sakunna uplara marikaia, naki God laka daukaia.“ Witin yawan smalkan, naki upla umpirara diara yaia, naki

yawan pura sunnaia, latara upla mawanra apia, sakunna wan aissa mawanra, witin yawan kaiki. Witin' ai uplika nannira smalkan, lalla uya asla kukaia apia, ba bilara wan kupia mankaia apia, upla puk God bila walaia. „Kais, ban wisatta, daiwan tnawira, ba nanni duss ma mankras, patta kukras, sakunna wan aissa ba nanni dakakissa. Man nanni kanra yamni apia?“ „Kais, knu tasbara, luki kaus, duss tangni pini inslara pawissa, sakunna ba nanni sarbras.“ Yang diara mai wimni: „King Salomo lalla uya bri kan, koalla yamni sin, sakunna ban baku apia.“ God wan aissa ba inma yamni daukan, naiwa raya, yauka pautara lulkbia, witin man nannira kanra yamni munbia. Allai, man kupiam ra yamni lukras. — Man nanni God kasakkira pliki saks, bara witin diara woala maikbia.“ — Witin smalkan, naki yawan pura sunnaia, ban aisi: „Man lupiam manra plun makabi kaka, man walpa yama? witin inska makabi kaka, man piuta yama? Man nanni, kupia saura, man lupiamra diara yamni isma ba, man aissikam purara kupia pini waki, diara yamni, ai lilka yabia, ba uplara ya makabi kaka.“ Ba diara man wansma, upla woala manra daukaia, ba sin man ba nannira daukma. — Ba ninkara Jesus yabal bilatara, saura makan, upla bahara waia apia, ba upla puk prubia, sakunna ba yabal bila uria, yamnissa, ba upla purara Godra wabia. Witin yawan smalkan „tukta nanni!“ ai bila walaia, baha sip' apia, sakunna ba bila sin daukaia. Bamna ban aisin: „Ba waikna, yang bili wali kaka, ban dauki, witin sins

polli, ai watla walpa purara maki. Bara li uya balan, passa tara krauan, uttlara prukan, sakunna kauras, walpa purara paskan bamna. Ba waikna naha yang bili wali kaka, sip daukras, witin tanis polli, ai watla auya purara maki. Bara li uya balan, passa tara krauan, uttlara prukan, kauan puk baiwan.“

10. Jesus mirakula dauki.

Jesus Jerusalemra yu yamni daukan. Bara madakura, nina Bethesda, uttla matasip kira, ba bilara upla umpira, nakra aisawan, mina latwan, swapni polli, ba nanni li klabaiia bila kaikan. Ankila pura wina bal iwan, ai piuara, ba li klaban; ba upla makka dimmi, liura aitabi, kli yamni takan, bulpis, uri puk makka swibia. Bara upla kumi mani 38 pot luan, kau siknis bri kan. Jesus witin kaiki, ban wali, patitara makaban: „Man kli ainwa takaia wansma?“ Ba upla umpira aisi: „Dawan, yang upla apu, li klabi kaka, yang liura iki swiaia, yang balamni kaka, upla woala kainira pot dimman.“ Jesus witinra bila: „Bus, man krikrikam bris, ban was!“ — Bara ba upla ainwa takan, ai krikri bri, makka wan.

Ba ninkara Jesus Kapernaumra impaki wan. Bara wita iwi kan, Roma wina, witin napakan kupia pini, pruaia man kan. Ba wita wali, Jesus aula, almuk nanni blikan, ban makabaia: „Aini bal, yang napakan kli yamni daukaia.“ Ba nanni Jesusra balan, witinra makaban, ban aisi: „Ba waikna kupia pini, banna makka bal, witin wan taya yamni kaikan, skul watla

makan!“ — Jesus witin nanni woal wan. Bara ba nanni uttla pot lamara balan, wita ai uplika kli blikan, ban aisi: „Dawanki, kupiam lukpara, yang umpi-rasni, man waitlara dimmaia, bamna yang bui manra balras, sakunna bila kumi aisas, yang naipakan kli yamni takbia. Yang witasni, king bila walisni, yang sulliar uya brisni, yang kumira aisisni kaka: Bara was! witin wabia. Woalara: Nara bal! witin balbia. Ba napakanra: Baha dauks! witin daukbia.“ Bara Jesus baha wali, witin taiwan, upla nannira, ya ai nina blikan, ban aisi: „Yang diara mai wimni, baha yang Israelra kau kaikras.“ Bara ba upla nanni kli ai watlara dimmi, ba napakan ainwa polli sakan.

Bara Jesus slaupra aimakan, ai uplika nanni woal, witin ban aisi: „Kaissa, bukra baila woalara ulakpi.“ Bara kabora ulakan, sakunna Kristus yapi kan.



Kais, bara passa karna kraui bika, ba slaup pot liura dimmi, rib uya prukan, bara uplika nanni ai Masterka tatukbi winnan: „Maisterka, wan saks, yang nanni pot pruaia!“ Bara witin bila: „Kupiam

lukpara, diakan man ban sibrisma?“ Bara witin buan, passara bila: „Sap bas!“ Bara lamni takan. Upla nanni puk taiwan, ban pana pana aisi: „Ba waikna, dia bamuna? passa, kabo sin ai bila kasak wali kan.“ — Bara saukara balan, ba tasbara Gergeseni iwi, upla woal bara kaikan, ulassa saura brikan, Jesus ba ulassa saura ai musa wina kangbi sakan; ba wina kli Kapernaumra wan. — Upla puk walan, Jesus ba uttla bilara kan; bamna upla uya ai drubi balan, witin ba nannira smalkan. Bara waikna woal woal upla umpira twilki briwan, sakunna Kristusra sip waras, upla uya uttla lamara buan bamna, purara ulli wan, uttla bahana sakan, ba upla krikri woal pura wina iki swin, ba upla umpira sip impakras. Bara Jesus baha kaiki, dia ba upla nanni ai kupiara luki kan, ban aisi ba



waiknara: „Lupiki, kupiam lukpara, man diara saura yaram, yang ban swimni. Yang ban aisisni, makka bus, man krikrikam bris, man wamtlara was.“ Bara witin makka buan, ai krikri bri, upla mawanra ai watlara wan, upla puk taiwan God nina mayuni ban aisi: „Yang nanni diara bamuna kau kaikras!“

11. Kau mirakula woala.

Bara Jesus tauanra nina Nain impaki wan, upla uya witin woal. Witin lamara balan, upla uya woal prawan, waikna woama pruan bikaia, ba piarka lupia kumi kan. Yapti ba ai lupia pruan nina blikan, kupiara sari polli. Jesus witin kaiki, latwan bri, ban wisatta: „Innpara!“ — Witin limlimra balan, ai mita ni kangban, ban aisi: „Waikna woama, yang mai wisni, buram!“ Bara witin kli raya taki, makka buan, ai yapti woal aisin. Baha ai lupia latwan kira kli ai watlara briwan.



Bara upla puk kupia laptiwan, ban aisi: „Propheta tara wan tilara buan.“ Bara: „God wan aissa ai uplika nannira wi kaikan.“

Ba ninkara waikna kumi, nina Jairus, skul watla wita Kapernaumra Jesusra balan, witin ai minara kauan, ai pura sunni, ai watlara balaia, ai lupia mairin kumi ai sawi kan. Bara Jesus wan, upla uya lamara tutukwi, bara mairin kumi mani 12 siknis bri ba tilara katta, upla woala sip yamni rakras. Baha mairin nina wina wan koallka tara alkan, ai kupiara luki, witin yamni takbia. Bara witin yamni takan. Jesus bila: „Ya koailkara alkan?“ Ai uplika nanni bila: „Man kaikras, upla ailall man lamara tutukwi; diakan man makabisma, ya ai alkan?“ Sakunna Jesus bila: „Upla kumi ai kangban; yang kaikri, karniki yang musi wina takan.“ Ba mairin baha wali, ai minara kat kauan, tanka puk win. Sakunna Jesus bila: „Kupiam lukpara, lupiki, nana man yamni takram, man kupia kumi kama!“

Witin kau ban aisi, Jairus alba kumi balan, ai dawanra bila: „Man lupiam pot pruan, ba masterka ban swis, kli winpara.“ Jesus baha wali, witinra bila: „Sibripara, yamni luki bas, man lupiam kli ainwa takbia.“ Witin ba uttlara dimmi, upla woala puk kangbi sakan, Petrus, Joannes, Jakobus ba man dimmaia swin, aissa, yapti sin. Upla uya baui innan, sakunna Jesus bila: „Ban innpara, ba lupia kau pruras, sakunna kau yapissa.“ Bara upla nanni lawaska kikan, ban kaiki, ba lupia pot pruan. Witin upla puk kangban, ba lupia mitara alki brin, ban

winnan: „Talita kumi“ „tukta lupia, buram!“ Bara kli raya taki makka buan.

12. Jesus kau mirakula dauki.

Upla uya ai drubi Kristus lamara tutukwi balan, witin ai kupia latwan brissa, ba upla puk umpira, daiwan nanni baku, dawan briras. Witin tanka puk smalkan. Ba yua pot luan, ai uplika nanni witinra wan, ban aisi: „Naha twi tara sika, ba yu pot dimbia, upla nanni ban swis ai watlara waia, plun atkaia mata, diara piaia apu.“ Jesus kli bila, ban aisi: „Man nanni upla nannira plun dakaks!“ Bara ba nanni bila: „Yang wamni, 200 makaroni mana plun atkaia, ba nanni dakakaia.“ Witin bila: „tani an brisma? Bukra was kaikaia.“ Bara kaikan ban kli aisi: „Matasip, inska woal.“ Witin bila, upla puk inmara swirka iwaia. Bara ba nanni 100, 50 ban tasbara iwi kan. Bara Jesus ba tani, inska woal



alki brin, ai pura sunni, tasapan, ba tani krikan, ai uplikara yan, upla puk dakakaia. Bara upla puk ai biarra bangki pin. Jesus ai uplika nannira win: „Plun yuya puk wabi mankram, plun tiuraia, sau-kaia apia!“ Ba nanni wabi pataki 12 bangki brin. Ba upla nanni pi kan, waikna tausin matasip, mai-rin, tukta uya sin.

Bara ai uplika nanni slaupra aimakan, kabo bailara ulakaia, Kristus yakan ill purara ullan, ai pura sunnaia, timia pot takan. Ba slaup kabo lilapassra ulaki, rib uya prukan, passa saura kraui bika. Sakunna titanra Jesus witin nannira balan, kabora impaki. Ai uplika nanni witin kaikan, kabora impaki taiwan, ban inni: „Ulassa bara bika!“ sibrin polli, ban innan. Sakunna Jesus witin nannira ban aisi: „Kupiam lukpara, yang bui narasni, sibri-para!“ Petrus witinra bila, ban aisi: „Dawanki, man kaka, yangra ai wins, manra balaia kabo purara.“ Witin bila: „Nara bal.“ Bara Petrus slaup wina bal iwan, kabora impaki, ai Masterkara waia. Sakunna kabora rib tara kaikan, passa krauan, witin sibri polli kan. Bamna liura dimman, ban aisi: „Dawanki ai saks.“ Bara Jesus ai mita bukan, witin alki bri sakan. Bara Jesus slaupra aimakan, upla puk auyapa kan, witin kaikaia; passa ba lamni takan.

Kristus mirakula uya daukan, upla nakra ilingkan, upla kiama prawan, kli sakan, upla bilas, twissa kli langkan, upla insaukan, kli yamni daukan, upla bulpis bri, ainwa takan, ulassa saura kangbi sakan, upla umpira kli rakan.

13. Mairin kupia saura, mairin woala Tyrus wina.

Pharisea kumi, nina Simon, Jesus paiwan, plun witin woal piaia. Kais, mairin kumi ba tauan wina, saura uya yan. Baha wali, witin Simon watlara kan, alabaster siska bribalan, batana ba bilara, ai minara buan, bara inni, ai mina nakra laya ni sikban, ai tawa ni kli dikan, batana ni sin yukan. Nanara Pharisea baha kaiki, ai kupiara ban luki kan: „Baha



waikna propheta kaka saba, witin kaikan kaia, baha mairin kupia saura polli, ai minara kangbi ba.“ Jesus kli aisin: „Simon yang diara mai wimni!“ „Rabbi ban aisas!“ Kristus ban bila: „Waikna kumi upla woal sakan. Kumi makaroni 500, woala 50, witinra aibapaia kan. Sakunna ba nanni lalla apu, sip aibapras kan, witin ba nanni makka swin. Nanara wis, ya witin kanra yamni kaikbia?“ Simon bila: „Yang lukisni, ba upla, ya witinra kanra bapaia kan.“ Jesus bila: „Ao, kasak polli.“ Bara mairinra wattau, Simonra aisin: „Man kaikisma


naha mairin? Yang balri man wamtlara, man li aikras, mini sikbras, sakunna naha mairin mini ai nakra laya ni sikban, ai tawa ni dikan. Man yang maiwan kia walras, sakunna naha yang mini kia wali kan. Man yang lailara batana dinkras, sakunna naha minira batana laikan. Bamna yang mai wisna: baha mairin saura uya yan, puk sakri, bamna baha yangra yamni ai uliki; ya wina yang uria sakri, witin uria ai uliki.“ Bara mairinra: „Dia man saura yaram, yang puk sakri, nanara kupiam kumi was.“

Bara Jesus yakan tasba woalara wan Tyrus, Sidonra. Mairin kumi, ai lupia ulassa saura ai musara brin walan, Jesus aula, bal minara kauan, ai pura sunni, ai lupia wina ulassa saura ba kangbi sakaia. Sakunna Jesus unkakras. Bara ai uplika nanni witinra balan, ban aisi: „Mairin ba blikri ka wap, ninira innissa.“ Sakunna witin wisatta: „Kasak apia, tukta patta briaia, baha yulra yaia.“ Baha mairin kli aisi: „Ao, Maisterka, sakunna yul nanni ba plun yuya pi, ai Master tebil wina kauan.“ Bara witin bila: „Mairin, man kupiamra karna lukisma, ban kabia, dia man makabattma.“ Ba yua wina ai lupia yamni takan.

14. Joannes Baptista.

Joannes li lalaikra, baptista, ai work sut daukan, ai piua pot baila. Ban katta. Ba king Herodes ai mamika maya Herodias saki brin, bara ai uplika Joannes wisatta: „man diara saura yaram.“ Bamna Herodes laui, witin silak watlara mankan. Ba nin-

kara Herodes yu yamni daukan, ba Herodias lupia ai mawanra dans kauban. Baha Herodes yamni kalkan, ai lupiara ban bila, dia dia makabi kama kaka, yang maikamni. Bara ai yaptira wan, makabaia, baha bila: „Joannes baptista lall ba aik!“ Bara king baha wali, ai kupiara sari brin, sakunna witin ai sulliarka blikan, ba waikna lall klakaia silak watlara. Ba sulliar Joannes lall bri, mairinra brissi yan; baha ai yaptira yan. Bara ai uplika nanni balan, ai wina tara bikaia.



15. Parabola Jesu.

Jesus parabola bila aisin, ba tanka ai uplika nannira marikan. Ban aisin: „Waikna kumi ma mamankra wan, ai ma tasbara mankaia, witin ban manki, ma tila yabalra kauan, upla baha taiban, tnawira balan, baha ma puk pin. Ma tila walpara kauan, baha pawu pot srauan, lawan polli bamna. Ma tila kiayara dimman, ba kiaya pawu, puk ikan. Ma tila tasba yamnira dimman, witin pawu, ma uya polli brin.“ Baha puk smalkan, ban winni: „Ya kيامa bri, walaia, witin wali kabia.“

Bara ai uplika nanni witin makaban, naha dia tanka, dia wirara? Sakunna witin bila: „Baha ma God bila, baha nanni yabal tnayara, ba God bila



wali, bara Waiwan aula, ba bila wan kupia wina saki, yawan kupiara ai bila lukbiara. — Ba nanni walpara, ba wali kaka, God bila auyapa bribia, sakunna wakia apu. Yu kumi ai kupiara luki, yu saurara kli makka swin. Baha ma kiaya tilara kauan, ba nanni God bila wali tasba dukia ba man luki, lalla mata ma taibi, bribi' apia. Sakunna ba nanni tasba yamnira, ai bila wali, ai kupiara yamni luki, ma uya bri, saki maïra kabia.“

Witin parabola woala smalkan, ban aisi: „Tasba purara upla baku, witin ma yamni ai naslara mankan. Upla nanni kau yapi, ai lamika balan, ma saura aya tilara mankan, bara kli makka wan. Aya yamni pawan, ai ma bri, bara inma saura sin pawan. Bara alba nanni ai Masterkara balan, ban aisin: „Man ma yamni mankras kattma? Anni wina ba ma saura?“ Witin bila: „Ai waila naha daukan.“ Alba nanni bila: „Yang nanni wi daiki sakamna?“ Witin bila: „Apia. Yarka asla paubia,

aya pawan krikaia piua aimakan, yang napakanra wimni: „Nanara ba inma saura dai ki kua wilkram, ban ankaia, sakunna ma yamni yang waitlara wabi bribal.“ Bara ai uplika nanni witinra balan, ban aisi: „Naha tanka ai wiram, ba inma saura dukia-ra.“ Witin bila: „Waikna lupia baha ma yamni manki; baha nasla wan tasba. Ma yamni baha Kristus lupia nanni sika, inma ba upla saura sika; ba waila ma manki waiwan sika. Ba klakaia piua tasba pnata. Ba upla nanni klaki, ankila nanni. Nanara ba inma man daiki, pautara ankrika lubia, ban kabia baku tasba pnatar. Waikna lupia, Kristus, ai ankila puk blikbia, ba nanni upla saura puk ai tasba wina sakbia, ba upla saura God bui pautara lulkbia, ba nanni ai napa arkbi baui inni kabia. Bara upla kupia kasak yamni kira ingni bribia, lapta baku, yang aissiki watlara. Ya kiama bri kaka, walaia witin wali kabia!“

16. Parabola woala.

Witin parabola woala smalkan, ban aisi: „Tasba purara duss ma (mustard) sirpi baku, upla bri, ai naslara mankan, ba ma sirpi polli, sakunna pawan kaka, tara polli sika, duss yerri, piawira balbia, ba dussa alni bilara iwaia.“

Parabola woala smalkan:

„Tasba purara waikna baku lillura yamni pliki, bara witin lillura kumi pain polli sakan, makka wan, bara ai dukia puk atkan, baha lillura atkan.“

Parabola woala: „Tasba purara tan baku, kabora lulkan, inska uya alkaia; baha bangwan kaka,

kli saukara raskan, ba uplika nanni iwi, inska yamni bak pliki, sakan saura bak lulkan. Ban kabia tasba pnatar. Ankila balbia, upla saura yamni wina aika sakaia, ba nanni pautara lulkbia. Bara upla inni, ai napa arkbia.“

Parabola woala smalkan:

„Tasba purara, dama baku, uttla aialkra, titanra impaki wan, upla briaia, ai nasla daukaia. Witin bila, yang makaroni kumi maikamni ba mana, ban ai naslara blikan. Ba ninkara kli wan, titan luanra, upla woala srinwi bui kaikan, ban aisi ba nannira: „Man sin wama yang naislara, yang mana mai ba-pamni.“ Bara ba nanni wan. Witin kli wan, yu lall kat, ban baku munnan. Tutnira kli wan, upla woala srinwi bui kaikan, ban aisi: „Diakan man yu aiska srinwi buisma?“ Ba nanni win: „Upla wan briras.“ Witin aisi: „Man nanni sin was naislara, yang mana maikamni.“ Tutni pot aimakan, bara dama ai watla marsinkara bila: „Ba upla work takra paiurika mana aibapaia, upla pukra pnata wina.“ Bara ba nanni balan, witin tutnira, upla bani ai widniska makaroni kumi brin. Sakunna ba nanni titan wina luki kan, kanra mana briaia, sakunna ba nanni ai makaroni man bri yakawan. Bara urangbi aisin damara ban: „Ba upla uria man work dauki kan, yawan baku mana bribia, yang nanni yu aiska saura work daukan.“ Sakunna dama bila: „Upliki, yang tanis munras. Man dukiam bris, bara was. Yang upla banira makaroni kumi aibapamni. Yang duki apia ki, yang dawan, lalla yaia. Man namkra saura lukisma, yang kupia pini

bamna?“ Ban upla plasni, pnata wina taura, upla ta wina pnatara wattaubia. Upla uya paiwan, sakunna kumi kumi balan.“

17. Parabola woala.

Bara ba tasba mana kakukra nanni, upla woala saura dadaukra nanni Jesus lamara balan, ai bila walaia. Pharisei nanni, wonktaya sasmalkra urangbi aisin: „Naha waikna upla saura dauki brissa, witin woal pissa.“ Sakunna witin naha parabola smalkan: „Ya waiknika daiwan 100 brissa, kumi tikan kaka, witin woala 99 twira ban swibia, ba kumi tiwan pliki wabia, kli sakaia kat, witin sakan kaka, auyapa ai papaiara sunbia, kli ai watlara balan kaka, ai uplika nanni winbia, ban aisabia: „Lillia bas yang woal, yang daiwan tiwan ba kli sakri.“ Yang mai wisni, ban tasba purara lillia kabia, upla saura kumi mata, ai kupia saura wina ulakan, kanra 99 woal baku apia, ai kupia saura wina ulakras.“

„Woala, mairin kumi, makaroni mata woal sip brissa, kumi tikan kaka, lamp ankbia, uttla pabi, puk pliki kabia, ba kli sakaia? Kli sakan kaka, ai uplika nanni winbia, ban aisi: „Yang woal lillia bas, yang ba makaroni kli sakri, dia yang tikri.“ Ban baku ankila nanni auyapa kabia, upla kumi mata, ai kupia saura wina ulakan.“

Bara witin bila: „Waikna kumi lupia woal brikan, plasni ba ai aissara bila: „Aissiki, ba diara yang duki' aik.“ Aissika ban daukan. Yu woala ba plasni ai dukia puk aikuki brin, tasba woalara wan laiura, ai dukia tanis munnan. Bara ai dukia

puk tikan, ba tasbara plun apu kan, witin plun wau, waikna woalara wan, witin ai inslara blikan, querko dakakaia. Bara witin ai biarra querko patta ni bangkaia want, sakunna upla witinra yaras. Bara ai kupiara luki ban aisi: „Yang aissiki alba uya brissa, ba nanni patta sipsa bri, sakunna yang plun wau pruisni. Yang buamni aissikira waia witinra aisaia: „Aissa, yang saura daukri manra, yang kli man lupiam baku apia, albikam baku kli ai bris.“ Bara witin makka wan, ai aissara balan. Sakunna kau laiura, ai aissa witin kaikan, kupiara latwan bri, plappi wan, ai nana alki kia walan. Bara lupia bila: „Aissa yang saura daukri, purara, man-



ra sin, yang kli man lupiam baku apia, kli ai bris!“ Sakunna aissika ai albikara bila: „Prak

pain polli bribal, witin dimmaia, matdinka ai mitara dinks, sus ai minara sin, bip lupia batana bribal, baha ikpi, nanara yawan pipi lillia daukaia. Naha yang lupiki pruan, kli raya takan, witin laptiwan kli sakan. Bara ba nanni lillia polli kan.“

18. Waikna lalla kira, Lazarus.

Jesus parabola woala aisin:

„Waikna lalla kira, koalla pauni pain dimmi, yu bani plun yamni, wina auni pin, tapla din; bara upla umpira, nina Lazarus, uttla latara iwi, yukri uya bri, plun yuya balan makabaia, ba waikna lalla kira lulkan, sakunna yul nanni balan, ai yukri dabi kan. Ba ninkara Lazarus umpira pruan, ankila nanni witin Abraham lamara briwan. Waikna lalla kira sin pruan, upla witin bikan. Witin tasba mununtara ai



nakra bukan, pautara anki kan, Abraham lai wina kaikan, Lazarus ai lamara iwi, ban winnan: „Aissa

Abraham, umpira ai kaikram, Lazarus blikram, ai mita ta liura buskaia, twissi kaula daukaia, yang latwan uya brisni na pautara.“ Sakunna Abraham bila: „Amiara bris, lupiki, man diara yamni pot briram, Lazarus saura brin, nanara witin yamni bribia, man saura! Na wina manra laiura polli, bukra sip wabi' apia!“ Bara witin aisi: „Wali bas, aissiki, yang aissa watlara witin blikram, yang moini kau matasip brisni, ba nanni smalkaia, na watla saurara balbiara.“ Abraham witinra bila: „Ba nanni Moses brissa, propheta nanni sin, ba bila baikra walbia.“ Sakunna witin aisi: „Apia, aissiki Abraham, upla pruan raiti wina balbia kaka, ba nanni smalkaia bara ai kupia saura wina ulakbia.“ Witin bila: „Moses, propheta nanni walras kaka, bara sip lukbi' apia, upla pruan raiti wina balbia kaka.“

19. Tukta nanni winnan, waikna nanni sin.




Bara yapti nanni ai lupia nanni Jesusra briba-

lan, ai mita lallra kabi tasapaia. Ai uplika nanni ba yapti nanni kangbi sakan. Sakunna Jesus baha kaiki kupia baiwan, ban aisi: „Tukta nanni swirka yangra balaia, laima wina kangpara, ba nannira sin tasba purara. Kasak polli, yang mai wisni, ya tasba tukta baku briras kaka, sip dimbi' apia!“ Bara witin tukta nanni bri, tasapan, ai mita lallra kaban, yamni smalkan.

Ba ninkara waikna woama lalla kira Jesusra balan, ai lula kriki, witinra makaban: „Dawan yamni! dia munnaia, raya kaia God woal briaia?“ Jesus witinra bila: „Diakan yamni ai makisma? Upla yamni apu, God yakan man yamnissa, witin kumi man. Sakunna laka man kaikisma?“ „Upla woala maya bripara, upla ikpara, diara implikpara, aissikam, yaptikam bila wali dauks.“ Witin Jesusra bila: „Maisterka, naha puk yang uria wina yamni daukri! Dia kausa munnaia?“ Jesus witinra kaiki, latwan bri, ban aisi: „Kau diara kumi! Ban was, man diara puk, brisma, ba atkram; upla umpirara yaia, baha yamni kabia; bal, yang nini blikram, duss prini bri was!“ Witin baha wali, ai kupia sari brin, makka wan, witin diara uya bri kan bamna. Bara Jesus tau, witin kaikan, ai uplika nannira win: „Karna sa, upla lalla kira tasba purara dimmaia!“

Sakunna ba ninkara witin waikna kumi lalla kira woal prawan. Jesus kli Jerusalemra impaki wan, Jericho makka luan. Kais, waikna bara kan ai nina Zachaeus; wita, witin lalla kira. Witin bui Jesus kaikaia want, sakunna lamara balras, upla uya bam-

na, witin pra lupia. Witin aini plappan, duss purara ulli wan, witin kalkaia, witin bara lubia. Bara Jesus ba tasbara balan, ai pura kaikan, witinra ban aisi: „Zachaeus, aini bal! bal iuram, naiwa yang man wamtlara dimmaia wansni.“ Bara witin aini bal iwan; auyapa witin ai watlara brin. Upla puk baha kaiki, urangbi aisi, witin ba waiknara dimmi bamna. Sakunna Zachaeus buan ban aisi: „Kais



Dawan, yang dukia bakriki upla umpirara yaia, yang saura daukri, kli kasak daukamni!“ — Sakunna Jesus witinra: „Naiwa yang naha watla saura wina sakri, witin sin Abraham lupia bamna; waikna lupia, Kristus, balan, upla tiwan plikaia, kli sakaia.“

20. Samarita kupia pini, alba kupia saura.

Bara upla kumi, sasmalkra Jesusra wan, witin trai kaiki, ban aisin: „Maisterka dia munnaia, raya kaia God woal briaia?“ Jesus bila: „Naki aisisma la wonktayara?“ Witin aisin: „Man God Dawan-kam kupia aiska, lilka karnira sin yamni kaikma, man uplikam man woal baku.“ Jesus bila: „Ao,

kasak aisisma, ban dauks, bara man raya kama.“ Sakunna witin ai mayunaia want, Jesusra wisatta: „Ya yang upliki?“ Bara Jesus naha tanka witinra smalkan:

„Waikna kumi Jerusalem wina Jerichora wan, bara aïmplikra tilara dimman, ai koalla puk daiki sakan, witinra sa ban, ba nanni makka wan, witin pruaia man swin. Bara priesta kumi ba yabalra impaki bal wan, sakunna witin kaiki bailara luan. Levita kumi sin ba yabalra impaki, witin kaiki bailara luan. Ba ninkara Samarita kumi balan, ai



uplika apia, sakunna witin ba upla umpira kaiki, latwan bri, witinra wan, baha insaukan sika prakan, batana, wain sin laikan, ai beriko purara sunnan, uttlara witin bribalan, bara kaiki kan. Yu woala witin kau laiura impaki wan, ba waiknara makaroni kum' aibapan, ban aisi: „Ba upla umpira yamni bri kais, dia isma, yang mai bapamni, kli balamni kaka.“ „Ya ba upla yumpa wina ai uplika

kan?“ Sasmalkra bila: „Witin kupiara latwan bri, yamni daukan.“ Bara Jesus witinra bila: „Ban was, baku dauks.“

Sakunna upla* kupiara saura, naki kabia? Jesus parabola woala smalkan: „Tasba purara king baku, ai napakan woal kulki kan. Bara kumi ai mawanra buan, witin tausin, mata woalsip talenta aibapaia kan. Sakunna witin lalla briras, ai dawan witin alba baku atkan, ai maya, ai lupia nanni sin, diara puk ai dukia, mana aibapaia. Bara alba ai lula krikan, kauan ai pura sunni: „Dawan, uria takas, yang puk manra aibapamni!“ Bara dawan witinra kupia latwan brin, makka swin, lalla sin briras. Bara alba makka wan, ai uplika kumi prawan, witiura makaroni hundred aibapaia kan, witin ai mita



priskan, karma ni alki brin; ban inni: „Puk aibaps, dia man yaia.“ Bara ai uplika lula krikan, makaban: „Umpira ai kaikram, uria takas; yang puk

maibapamni.“ Sakunna witin ban daukras, silak watlara mankan, mana puk aibapaia Uplika woala baha kaiki, ai kupia baiwan, dawanra tanka puk win. Dawan ba upla saura winnan, makabi walan: „Man waikna saura polli, naha mana yangra aibapaia kattma, yang makka swiri, man diakan man uplikam latwan briras? yang manra baku daukattma?“ Bara ai dawan laui witin silak watlara blikan, ba yuara witin mana puk aibapan kaia. Ban baku yawan aissa purara manra munbia, man diara saura man uplikamra sip swiras kaka.“

21. Parabola woala.

Jesus upla nannira praud polli, ai kupiara mayuni, baha parabola win: „Upla woal God watlara, tempelra ulli wan, ai pura sunnaia, kumi Pharisea, woala tasba mana sasakra. Pharisea buan, ban ai pura sunnan: „Yang manra God lakula wimni, yang upla woala baku apia, aimplikra, rog kira, na upla saura baku apia. Yang aima woal kati banira plun pimm' apia, diara uya Godra isni, dia brisni.“ Upla woala lai wina buan, ai nakra purara bukras, sakunna ai lamara prukan, ban aisi: „God umpirasni, yamni ai kaikram!“ Yang mai wimni, naha upla kanra kasak kira takan, ai watlara dimmi, woala baku apia.“

Yu woala ai uplika nanni Jesusra balan, ban makabi: „Ya wita polli tasba purara kabia?“ Bara Jesus tukta lupia winnan, lilapassra bukan, ban aisi: „Kasak polli, yang mai wisni, man saura wina ulakras kaka, tukta baku kama, man God watlara dim'“

apia. Ya bui tukta baku kabia kaka, witin wita tasba purara kabia. Ya ba tukta brissa, yang nini mata, ai brissa. Amman kais, tukta lupia ba yamni bri kais, yang mai wisni, ai ankila purara yu bani yang aissiki mawan purara kaikissa.“ Ba ninkara Jesus tempelra Jerusalemra kan, upla smalki kan, ban aisi:

„Amman kais, sasmalkra mata, koalla yerri dimmi, lakula briaia want, taura skulra iwaia, tebilra wita kaia want.“ Witin ban aisi, tempel latara iwi kan, kaikaia naki upla nanni ai lalla mankan. Bara upla lalla kira uya mankan, sakunna piarka umpira kumi balan, lalla uria polli mankan. Bara ai uplika nanni winnan, ban aisi: „Kasak polli, yang mai wisni, naha piarka umpira lalla kanra mankan, woala baku apia. Baha mairin ai dukia puk mankan.“



22. Jesus ingni baku takan.

Ba ninkara Jesus kli Jerusalemra impaki wan, ai uplika yumpa Petrus, Jakobus, Joannes sin aikuki ill purara briwan. Bara witin ingni baku takan, ai mawan lapta baku, ingni polli, ai koallka pini polli, wamuk baku, upla ban pini sip daukbi' apia. Bara Moses, Elias sin ingni bilara bal' iwan, Jesus woal aisi kan, naki pruaia, naki purara ulli waia. Sakunna Petrus, ai uplika nanni sin yapi kan. Bara kli raya buan, ai ingni tara kaikan, ba waikna woal sin. Bara Petrus Jesusra bila: „Dawan, yamnissa, nara kaia, kaissa uttla yumpa daukpi, kumi manra, woala Mosesra, woala Eliasra.“ Sakunna witin tanka kaikras, dia aisi kan, ba nanni kupia laptiwan. Witin kau ban aisi, bara kasbrika ingni balan, purara bikan, bara bila baikra kasbrika wina balan: „Naha yang lupiki latwankira, yang witin yamni kaikissni! witin bila wals.“ Ba bila baikra luan, Jesus yakan man kaikan. Ba nanni mawanra kauan, kupia laptiwan. Jesus ba nanni kangban, ban bila: „Boram, sibripara!“ Ba nanni ill wina balan, Jesus aisi: „Naha tanka, dia man kaikram, aisapara, ba yuara Waikna lupia raiti wina bubia.“

23. Jesus aima yumpa Bethaniara.

Jerusalem lamara, mapara tauan uria nina Bethania, bara moini yumpa iwi kan, Lazarus, ai lakra Martha, woala Maria, Jesus ba nanni yamni kaikan, ba watlara tauki iwi katta. Aima kumi bara dim-

man, upla puk auyapa polli kan, witin kli kai-kaia.

Maria ai minara iwi, ai bila wali kan, Martha diara plun uya daukan, witin dakakaia. Bara Jesus lamara wan, ban makabi: „Dawan, man kupiamra lukrasma, yang laikra diara daukras, yang yakan man? Witinra wis, ba sin plun piakaia.“ Sakunna Jesus witinra bila: „Martha, Martha, man trobbil uya brisma, kumi man kanra yannissa, Maria ba diara yamni sakan, upla woala witin wina sip bribi' apia!“



Jesus kli Jerusalemra impaki wan, bara wali kan Bethania wina: „Dawan, man uplikam pruissa.“ Baha wali, witin ban aisin: „Baha siknis mata prubi' apia, sakunna man God karnira kaikma, God lupia mayunaia.“ Witin ba tauanra kau woal japan, bara ai uplika nannira win: „Kaissa, Judeara kli wapi!“ Ai uplika nanni ban aisin witinra: „Aima woalara

Juda nanni walpa ni mai ikaia want man kli bukra waia wansma?“ Jesus bila: „Ya kaknara impakissa, witin sip parwaia apia.“ Bara witin nannira: „Wan uplika Lazarus yapissa; sakunna yang wamni, witin rakaia.“ Bara ai uplika nanni bila: „Dawan, yapissa kaka pot yamni takbia.“ Jesus pruan dukia aisin, ba nanni lukan, witin yapi kan. Bara witin lattan aisin: „Lazarus pruan, sakunna witinra wapi!“ Bara ban impaki wan. Martha baha walan, Jesus aula, witinra mapara wan, ban aisi: „Dawan man nara kattma kaka, yang laikra pruras kabia kranni.“ Jesus witinra: „Man lamkra kli raiti wina bubia.“ „Ao, yang ban kaikisni,“ Martha bila wina, „witin piua aimakan kaka, ba yuara kli raiti wina bubia.“ Jesus witinra bila: „Yang dawan upla raiti wina bukaia, upla raya daukaia. Ya yangra luki, witin raya kabia, prubia kaka; ya raya sika ban luki yangra, sip prubi' apia. Man ban lukisma?“ Martha bila: „Dawan, ao, yang ban lukisni, man bui Kristus God lupia, man na tasbara balram.“ Ba ninkara ai moini Maria winnan, Juda nanni witinra balan maisanikaia, ai lakra mata. Maria aini plappi balan, Juda nanni luki kan, raitira waia want, ai nina blikan. Maria Jesu minara kauan, ban aisi: „Dawan, man nara kattma kaka, yang laikra pruras kabia kranni!“ Bara Jesus ba nakra laya taki kaikan, Juda nanni sin, ai kupia latwan polli, ai nakra laya takan. Bara Juda nanni bila: „Naki witin latwan polli bri ba, kais!“ Jesus makaban: „Annira witin bikram?“ Ba nanni bila: „Dawan, bal, kais.“ Ba nanni lukan, witin raiti kaikaia want.

Unta tara katta, walpa purara sunnan. Jesus bila: „Walpa ba sakram.“ Martha witinra bila: „Dawan, pot bisbaia takan, yu woal woal pot raitira bikan kan.“ Jesus witinra kli aisi: „Yang mai wīras kattni, man yamni lukma kaka, man God karnika kaikma.“

Bara walpa ba sakan, ba unta wina, annira upla pruan bikan katta. Jesus ai nakra bukan, ban aisin: „Aissiki yang kaikissni, man yang bili walisma yu bani, sakunna ba upla nanni mata, nara buissa, ba nanni ai kupiara lukaia, man bui ai blikram.“ Bara ban aisin, witin karna polli winnan:



„Lazarus, bal taks!“ — Witin pruan, kli raya taki balan, mita mina koalla pini ni wilkan, ai mawan

sin koalla tara ni wilkan. Jesus witinra bila wina: „Baha koalla sakrika wabia.“

Ba ninkara Jesus kati yumpa yukui iwan. Bara kli Bethaniara balan, ba nanni tutnira plun daukan; Simon watlara. Martha plun piaki kan, Lazarus bara iwi katta tebilra, witin woal plun pisatta. Bara Maria paund kumi batana kia pain brin, Jesus minara laikan, witin mina ai tawa ni dikan, ba uttla batana kia ni bangwan. Bara ai uplika kumi, nina Judas Iscariot, ya witin ai waila mitara mankan bila: „Diakan baha batana atkras 300 makaroni mana, upla umpirara yaia?“ Baha witin aisin, upla umpira lukras kan, sakunna witin aimplikra, lalla brikan, dia upla mankan. Bara Jesus bila: „Mairin ba swis, diakan witinra man trobbil munnisma? Witin diara yamni yangra daukan. Man upla umpira yu bani brisma, man yamni daukma kaka, dauks, sakunna ai yu bani brim' apia. Baha mairin puk daukan, witin balan yang musara laikaia, yang bikaia dukia. Kasak polli, yang mai wisni, ba tasbara annira naha gospel bila upla walbia, bara dia ba mairin yangra daukan, upla puk smalki aisabia.“

24. Jesus Jerusalemra dimman.

Yu woala Jesus Bethania wina Jerusalemra ulli wan. Ba yabal Betphage lamara wan. Witin pot baila, ai uplika woal blikan, ban aisi: „Bukra was, ba tauanra, bara man beriko kumi sakma, ai lupia sin, baha lanks, yangra bribal. Upla kumi diara aisi kaka, man wima: „Dawan baha want,“ bara witin maikbia.“ Naha puk ban kan, diara puk sut-

takan, dia propheta aisi katta, ban bila: „Wis man nanni Sion mairin lupiara, kais man kingkam manra aula, kupia pini beriko purara ulli, ai lupiara sin.“



Bara ai uplika nanni wan, ban daukan, dia Jesus wisatta, beriko bribalan, ai lupia sin, ai koallka purara palkan, witin purara sunnan. Bara upla uya ai koalla yabalra palkan, upla woala alni duss wina klakan, yabalra yakaban. Upla puk taura, woala ninara impaki inni, aiwoni kan: „Hosanna (Dawan ai saks) David lupia waiknara (Messias)! Mayunpi witin aula ba, Dawan ninara! Hosanna lai purara!“ Bara Jesus Jerusalem lamara balan, tauan puk kaikan, ill wina nakra laya takan, ban aisi: „Man kaittma kaka, man nanara piuamra, man kupiam saura wina ulakaia, sakunna nanara yukuan namkra wina. Ba yua manra balbia, man wailam unta pakni salkbia, raun kir wabia, tnaya banira mai saukbia, man lupiam ikbia, walpa kumi woala purara swibi’ apia, man piuam saura wina ulakaia sip kaikras bamna.“

Ba wina tempelra dimman, upla atki, aiatkra

kangbi sakan, ban aisi: „Ban ulban, yang waitla wan pura sunnaia watla, sakunna man nanni implikaia watla daukram.“

Bara wita nanni, priesta, sasmalkra nanni walan, tukta nanni aiwonaia tempelra ban aisi: „Hosanna, David lupiara!“ ba nanni laui kan witinra aisin: „Man walisma, dia ba nanni aiwoni?“ Jesus bila witin nannira: „Ao, man wonktayara aisaras: tukta lupia bila wina man mayuni brima?“ Bara witin ba nanni makka swin, tauan Bethaniara wan, bara iwi kan.

Yu woalara witin tauanra dimman, plun dauki kan. Witin sikia duss yabalra kaikan, witinra balan, sakunna ma sakras, woaya ba man, witinra bila: „Na wina ma kli pawaia apia.“ Bara sikia duss ba makka srauan. Naha duss, Juda nanni baku, ma Godra bribalras bamna.

25. Parabola woala.

Ba yuara Jesus Jerusalemra naha parabola smalkan: „Dawan kumi bara kan, witin nasla daukan, kir kutban, uttla warbaia makan, tauar walpa ni paskan, napakanra yan, witin tasba woalara laiura wan. Pua aimakan duss ma dakbaia, ai uplika blikan, duss ma puk dakbaia. Sakunna napakan nanni ai uplika alki brin, kumi prukan, woala ikan, woala walpa ni saban, witin kli woala blikan, bara baku daukan. Sakunna ninara ai lupia kumi blikan, ban luki: „Yang lupiki yamni kaikbia.“ Sakunna ba napakan ba lupia kaikan pana pana aisin: „Naha dawan lupia; kaissa witin ikpi, ai dukia puk alki,

bripi!“ Bara ba nanni witin alkan, nasla wina lulkan, witin ikan. Nasla dawan kli balbia kaka, dia munbia ba napakan nannira? Ba nanni win: „Witin ba napakan kupia saura ikbia, upla woala ai naslara blikbia, ba nanni ma ai piura yabia.“ Jesus witin nannira bila: „Bamna yang mai wisni: God karnira man wina sakbia, upla woalara yabia.“

Witin parabola woala smalkan: „Tasba purara wita baku, ai lupia waiknara yu yamni daukan, ai uplika blikan, ba nanni winnaia, ya paiwi katta, sakunna ba nanni balras. Witin kli upla woala blikan, ban bila: „Baha nannira wis, paiwattna ba: Kais, yang plun piakattni, bip nanni tamattni, diara puk sut daukan, bal yangra yu yamni daukaia.“ Sakunna ba nanni lukras, ai yabal aika wan, kumi inslara, woala diara atkaia, woala ai upla alki, saura pruki ikan. Sakunna king baha wali, witin laui kan, ai sulliar nanni blikan, ba upla aikra pruki ikan, ai tauan puk ankan. Bara ai uplika nannira win: „Plun pot daukri, sakunna upla paiwan saura ba, balaia want apia. Bamna was latara yabalra bila tara, upla puk man kaikma, paiwi bribal.“ Bara ai uplika yabalra wan, upla puk paiwi sakan; upla yamni, tila saura bribalan, bara uttla bangwan, upla uya bamna. Bara wita dimmi balan, ai upla paiwan kaikaia, witin waikna kumi sakan, ba dawan koalla briras, witinra bila: „Upli naki man dimmatna, baha yang koailka man briras?“ Bara witin bilas takan. Bara king ai albara win: „Witin mita, mina sin wilkram, witin alki bris, latara timiara lulkram. Bukra upla inni ai napa arkbi kabia.“ — „Upla

uya paiwan, sakunna kumi kumi man sakan.“ — „Jerusalem, Jerusalem! man propheta nanni ikram, uplika ba puk manra blikri, walpa ni sabram; aima an yang man lupiam aikuki winnatni, kallila ai lupia baku, ai tnawa mununtara, sakunna man balras. Kais man wamtla saukan slingban kabia, yang mai wisni, man nanni na wina ai kaikm' apia, ba yuara man wima: „Mayunpi ba, ya aula, Dawan nina brissa.“

26. Jesus bila diara bal takaia.

Bara Jesus tempel wina wan, ai uplika nanni witinra balan, ba tempel watla tara marikaia, naki yamni paskan, walpa pain daukan. Bara Jesus witin nannira win: „Man naha diara puk kaikisma? Kasak polli, yang mai wisni, walpa kumi walpa woala purara ban swibi' apia, walpa puk slingban kabia. Bara man Jerusalem kaikma kir kutban, bara kais, tauan aiska saukan kaia yua lamara sa. Ba nanni Juda wina ill purara wabia, ba yua saura kabia, diara puk ban ulban, puk takbia.“ Bara witin yassu ill purara iwi kan, Petrus, Jakobus, Joannes, Andreas witin yakan makaban: „Ai wis, akia naha diara ban kabia? dia tukin kabia, ba yuara man aulma, akia tasba piua?“ Bara Jesus kli bila: „Amman kais, upla woala manra tanis wibia. Upla uya balbia, yang nini brissa, ban aisi kabia: „Yang bui Kristus,“ upla uya kunnin munbia. Bara man wali kama, war bin uya. Amman kais, man kupiamra lukpara, naha diara puk taura ban kabia; sakunna baha piua kausa. Upla ai taya

woal unsabi kabia, wita witar, bara plun wau ka-
bia, siknis saura, nikenike tasba banira. Naha saura
taura kabia. Bara naha gospel bila yamni upla puk
tasba banira walbia, ba ninkara piua aimakbia. Bara
upla manra wibia kaka: „Kais, Kristus narasa, ba-
rasa, ban lukpara!“ Imyula baku, lallma wina bal’
iwan, munara ingni takbia, ban baku Waikna lupia
balbia. Annira daiwan pruan, bara ususs aikuki
balbia. — Ba ninkara lapta, timia takbia, kati sin
ingni bribi’ apia, slillma nanni pura wina kaubia,
kasbrika karnira nikwi kabia; bara Waikna lupia
tukin kasbrika purara man kaikma, bara upla puk
tasba bani wina inbia, ba nanni puk kaikbia Waikna
lupia aula, kasbrika tilara, ai karnira bri, ai ingni
tara sin. Witin ai ankila nanni blikbia, trompeta
karna pubaia, ba nanni ai lupia nanni passa woal-
woal wina aikuki saki bribalaia. Sakunna ba yua,
ba piua upla kumi sin kaikras, ankila sin apia, yang
aissiki yakan kaikissa. Bamna ai waki bas, man ba
yua kaikras, akia piua man Dawan balbia.“

27. Jesus bila diara bal takaia.

„Bara tasba purara mairin tiara matawoalsip
baku, ai lampka brissa, impaki waikna maya kaia
woal prawaia. Matasip sinskira, matasip tanis kan.
Ba nanni taniskira kan, ai lampka brin, sakunna
batana laikaia briras; ba woala sinskira kan, batana
ai lampkara laikan. Ba waikna takaskan, upla puk
yapi kan. Timia lilapassra karna innan: „Kais,
waikna maya kaia aula, was witin kaikaia!“ Bara
mairin puk buan, ai lampka makka brin. Tanis

nanni woalara win: „Man batana laikaia, yangra aik! yawan lampka pot daswan.“ Sakunna ba sins-kira nanni bila: „Ban apia, bara yang sipi brinn' apia, man sin apia, sakunna bukra was, atkaia mata, man batana laikaia atkram.“ Ba nanni wan, bara waikna maya kaia balan, ba nanni batana bri kan, witin woal dimman, yu yamni daukaia, bara door prakan. Ba ninkara mairin woala sin balan, ban aisi: „Dawan, dawan ai saks.“ Sakunna witin bila: „Kasak polli, yang mai wisni, yang mai kai-kras.“ Bamna ai waki bas, man kaikras ba yua ba piua, akia Waikna lupia balbia.“

„Tasba purara waikna baku, impaki tasba woalara laiura wan, ai uplika nanni winnan, ai dukia ba nannira yan. Kumira witin talenta matasip yan, woalara woal, woalara kumi; ba wina witin makka wan. Ba upla witin matasip talenta bri kan, ba wan work dauki, kau matasip woala daukan. Ba woal bri kan, ba witin baku daukan. Sakunna baha kumi man brin, wi tasba salki, ai dawan lalla yukukan. Ba ninkara Dawan ai albara kli balan, witin woal kulkaia. Bara witin talenta matasip bri kan, woala matasip bribalan, ban aisi: „Dawan! man talenta matasip aikram, kais, yang talenta woala matasip manra bribalri.“ Ai Dawan witinra bila: „Yamni daukan, man alba yamni, kupia pini! man aitanni kapram, yang wita mai daukamni, diara uya maikamni, yang waitlara dims, lillia daukaia Dawan woal.“ — Bara witin talenta woal bri kan, balan, ban aisi: „Dawan! man talenta woal aikram, kais, yang talenta woala mai bribalri.“ Ai Dawan

witinra bila: „Yamni daukan, man alba yamni, kupia pini! man aitanni kapram, yang wita mai daukamni, diara uya maikamni, yang waitlara dims, lillia daukaia Dawan woal.“ — Bara talenta kumi bri kan ba balan, ban aisi: „Dawan yang kaikri, man waikna kupia saura, man sakisma, annira man ma mankras, bara yang sibri kattni, yang wari, man talenta tasbara yuku kattni, kais nara man dukiam kli brisma.“ Ai Dawan witinra bila: „Man alba, kupia saura, srinwan, man kaikattma, yang baha sakisni, dia yang mankras; man yang duki lalla wicara yaia kattma, bara yang kli balri kaka, yang duki kli ainwa brimni.“ — „Bamna baha talenta witin wina saks, upla woalara yas, witin matawoalsip brissa. Upla banira, ya brissa, yang yamni, witin uya sipsi bribia, sakunna ba wina ya briras, puk sakamni, diara puk witin brissa. Sakunna ba alba saura latara, timiara lulkram, bara upla puk inni, ai napa arkbi kabia.“

„Waikna lupia balbia kaka, ai ingni tara bri, ankila yamni puk witin woal, bara witin iubia ai tronkara, ai mawanra upla puk aikuki bui kabia, bara witin ba nanni aika aika saki ulakbia, waikna daiwan papakra baku, ai daiwan nanni aika saki, bara witin daiwan yamni nanni ai aikikara, sakunna daiwan saura nanni ai smiki mitara mankbia. — Bara king. wibia ba nannira ai aikikara: „Narabal, man lupia yamni, aissiki dukia, ba tasba purara man brima, patitara tain wina paskan manra dukiam, yang plun dauki kattni, man wina aikram, yang diran ai dauki, man laya aikram, yang upla aika, man ai briram, koalla lua, man

koalla ai dinkram, yang prui kattni, man yangra bal ai kaikattma, yang silak watlara, man yangra balattma.“ Bara ba upla nanni kasakkira witinra wibia: „Dawan! akia yang nanni plun dauki mai kaikri? bara dakakri? akia diran dauki, laya mai-kri? Akia upla aika, mai briri? akia koalla lua, yang koalla mai mankri? akia prui, silak watlara manra balri?“ Bara king wibia: „Kasak polli, yang manra wisni, dia diara man yaram yang uplikira, baha puk man ai daukram.“ Bara witin wibia ba nannira, ai smikira: „Tak was, yang wina, man upla saura pauta watlara, ban iwaia, pot daukan Waiwanra ai ankila nannira sin! Yang plun dauki kattni, man wina aikras, yang diran ai dauki, man laya aikras, yang upla aika, man ai briras, koalla lua, man koalla ai dinkras, yang prui kattni, silak watlara, yangra kaikaia man balras.“ Bara ba nanni witinra wibia: „Dawan akia yang man plun dauki mai kaikri? akia man diran dauki, akia upla aika, akia koalla lua, akia prui silak watlara manra yamni daukras?“ Bara witin wibia, ban aisi: „Kasak polli, yang mai wimni, dia man munras ba uplara umpira, baha yangra sin munras.“ Bamna ba nanni wabia pautara, ban ankaia ban kaia, sakunna upla kasakkira raya ban kaia.“

28. Jesus ai uplika nanni mina sikbi.


Ba piuara Jesus kau pruras kan, kaknara smalki kan, timiara Bethaniara iwi kan. Bara tutni kumira Jesus plun pi buan, ai koalla saki, iki swin, koalla dikaia bri willkan. Bara li plaptara laikan, ai uplika

mina sikban, bara koalla ni diki lakan, willkan. Witin Petrusra balan, ban aisi: „Dawan man yang mini sikbi?“ Jesus bila: „Dia yang daukisni, nana man kaikras, sakunna naika man kaikma.“ Petrus bila: „Man yang mini sikpara.“ Jesus bila: „Yang mai sikbras kaka, man yang upliki apia.“ Petrus baha wali, witinra win: „Dawan! yang mini man apia, sakunna yang miti sin, lall sin.“ Jesus witinra: „Ba upla sikban, ai mina kli sikbras, sakunna puk yamni sikban. Man nanni yamni, sakunna puk apia.“ Witin pot kaikan, Waiwan pot Judas Iscariotra kupiara mankan, ai Masterka ai waila mitara mankaia. Bamna wisatta: „Man nanni puk yamni apia!“ Ba ninkara witin ai mina sikban, ai koalla kli dimmi iwi kan, witin bila: „Man kaikisma, dia yang manra daukri? Man yangra Master, Dawan ai winnisma, man kasak aisisma, yang bansni. Yang man Dawankam minam sikbattni kaka, man nanni sin pana pana minam sikbram. Yang mamrikattni, naki daukaia, yang manra daukri. Kasak polli, yang mai wisni, ba alba ai Dawan kanra apia. Man ba diara kaikisma kaka, man amyapa kama, man ban daukma kaka.“

Yu taura tani piaia, ankila luan yua daiwan ikaia, Jesus ai uplika Petrus Joannes woal blikan, ban aisi: „Was, ankila luan yua baha dukia dauks, yawan piaia!“ Ba nanni wisatta: „Annira yang nanni daukaia?“ Witin bila: „Kais man tauanra dimram kaka, bara waikna kumi manra balbia, li twilki, witin nina blik, ba watlara witin dimbia. Bara man dawaura wima: „Maisterka manra win: Annira upla aika

watla, bara yang wina pimni yang uplika nanni woal? Witin uttla tara mamriksia, bara puk yamni dauks.“ Ai uplika nanni tauanra wan, ban sakan, dia witinra wisatta. Bara ba nanni puk daukan.

Tutnira Jesus ai uplika nanni woal Jerusalemra wan. Ba yabalra Jesus wisatta: „Yang kasak waham dussa baku, yang aissiki lika mamankra baku. Alni bani yangra pawu, ba ai ma briras, witin lul-kissa, alni bani ma brissa, witin irbissa, bara witin kanra ma bribia. Nanara man yamnisma, ba bila mata, yang manra aisari. Yangra iwi bas, yang man woal iwi kamni. Alni yakan sip ai ma bribi' apia, witin woaham woal kabia kaka, man sin apia, man yangra kama kaka. Yang woaham, man nanni alni, witin yang woal iwi kaka, yang witin woal, ma uya bribia. Ba upla yang woal apia kaka, la-tara lulkan kabia, sraui, upla ba nanni wabi, pau-tara lulksia, bara amman.“ Bara tebilra iwi kan, plun ba ankila luan yua dukia pi kan, Jesus ai



uplika nannira win: „Kasak polli, yang mai wisni, kumi man nanni wina, yang woal pissa, ai waila mitara mankbia.“ Bara ba nanni ai kupiara sari polli bri kan, pana pana aisi: „Yamna yang?“ wola: „yangsni?“ Jesus bila ban wisatta: „Kumi man nanni wina yang woal ai mita pilalara dinki. Waikna lupia ban prubia, ban ulban, sakunna saura polli ba uplara, ya waikna lupia ai waila mitara mankbia. Yamni katta ba waiknara witin aisubras kaka.“ Bara Judas wisatta: „Maisterka, baha yang bui?“ Witin bila: „Man ban wiram, ao ban sa sika.“

Bara ba nanni plun pi kan, Kristus tani brin, witin aissikara ai pura sunni, baha krikan, ai uplika nannira yan ban aisi: „Bri pis, naha yang wini, man mata kriwan, naha ban dauks, yangra luki kais.“ Bara kopka brin, witin nannira yan, ban aisi: „Man nanni puk na wina dis, naha yang tailia, testament raya, upla uya mata laiwan, diara saura sakaia mata. Sakunna yang manra mai wisni: Yang kli dimn' apia na ma wina ba yuara kat, yang kli dimni raya yang aissiki watlara.“

29. Jesus Gethsemanera.

Ba plun suttakan, ba nanni aiwoni kan, Jesus ai uplika nanni woal yassu illra ulli wan. Ba yabalra Jesus ai uplika nannira win: „Man nanni yangra kupiam baiwi kabia na timiara, ban ulban: Yang ba papakra ikamni, ai daiwan nanni puk turui takan kabia. Sakunna naika yang raiti wina buri kamni, yang man kainamra wamni Galileara.“ — Petrus bila witinra: „Upla puk saura manra kupia

baiwi kaka, yang ban daukamn' apia.“ Jesus witinra aisi: „Kasak polli, yang mai wisni, na timia kallila kau aiwonras, bara aima yumpa man wima: Yang mai kaikras!“ Petrus bila: „Yang pruamni kaka man woal, yang ban wimm' apia: yang mai kaikras.“ Uplika woala puk ban baku aisi kan.

Bara Kristus witin woal tasbara nina Gethsemane, tingni Kidron baila woalara Yassu ill lamara dimmi wan. Bara witin ai uplika nannira win: „Man nanni nara iuram, yang bukra wamni, puri sunnaia.“ Bara witin Petrus, Jakobus, Joannes briwan, witin ai kupiara sari polli dimman, wirra polli. Bara witin bila: „Yang lillki sari polli, pruaiara tauan, nara takaski kama, yang woal ai waki bas!“ Bara witin uria mapara wan, ai mawanra kauan, ai pura sunni, ban aisi: „Yang aissiki ban kabia kaka, naha kopka



yang mawan wina lubia, sakunna yang bili apia, man bilam takbia.“ Bara ai uplika nannira balan, yapi kaikan, Petrusra bila: „Diakan man nanni uria yang woal sip ai wakrasma? Ai waki puram suns,

man diara saura munnaia dim' apia. Wan lillka karna sika, sakunna wina swapni."

Witin kli bukra wan, ai pura sunnaia, ban aisi: „Allai aissiki, naha kopka lubi' apia kaka yang wina, yang ba dimni, man bilam takbia." Witin balan, ai uplika nanni kli yapi sakan, ai nakra wirra kan bamna. Bara witin ba nanni swin, kli makka wan, aima yunpa ai pura sunnan, ba bila baku aisi kan. Bara ankila kumi pura wina bal iwan, witin maisanikaia. Bara ai kupia pruaiara tauan, witin karna polli ai pura sunnan, ai laptika tala baku, tala uya tasbara kauan. Witin ai pura sunnaia suddakan, bara buan, aima yumpara ai uplika nannira balan, kli kau yapi sakan, bara wisatta: „Nanara kau yapisma, sipsa polli, piua aimakan, kais waikna lupia upla saura mitara ikaia mata mankan."

30. Jesus alkan. Petrus saura aisi.

Judas Iskariot ba priesta nannira win, ai Masterka Kristus witin nanni mitara alki mankaia, ba nanni witinra aibapan 30 lalla pini mana. Judas witin kaikan, Jesus aima uya Gethsemanera dimman, bara upla nanni puk katta ba briwan, wita nanni blikan, Jesus alkaia, ispara, duss nanni bri kan. Judas ba nannira tukin yan, ban aisi: „Ya uplika yang kia walamni, baha sika, witin alki bris, yanmi bukra briwas!" Bara witin Jesus sakan, witinra makka wan, ban aisi: „Nakissa, Maisterka!" ban kia walan. Jesus kli bila: „Judas man waikna lupia kia wali, witin ai waila mitara mankma?" Bara ai uplika nanni tanka puk kaikan, witin makaban: „Dawan,

yang ispara bri klakuni?“ Petrus makka ispara saki, priesta tara albika prukan, witin kiama aikika klakan. Ba albika nina Malkus katta. Bara Jesus Petrusra bila: „Man isparkam ai watlara diuks, ba kopka, aissiki wina yang dimn' apia?“ Bara witin kiama kangbi, kli prakan. Kristus uplika nanni, baha kaiki, puk plappan, witin yakan swin. Bara waikna woama (Markus) Jesus ninara blikan, witin koalla pini ai winara prakan, sulliar nanni witin alki brin, sakunna witin ai koallka ba swin, koalla lua ba wina plappan.

Ba upla nanni Jesus alki brin, witin aini Jerusalema priesta nannira briwan, bara wita nanni aiska puk aikuki balan, timia lilapassra. Petrus ai kupiara luki, dia wisatta, ai nina blikan priesta tara watlara. Witin dimmi wan, alba nanni woal iwi kan, witin pautara ai laki, bila kaiki kan, naki kabia. Bara alba mairin kumi balan, priesta tara dukia, witin Petrus lattan kaiki, witinra wisatta: „Man sin Jesus Nazaret wina woal kattma!“ Sakunna Petrus bila: „Apia! Yang kaikras, yang ba walras, dia man aisissima!“ Bara witin uttla wina latara wan, kallila aiwonni kan. Bara mairin witin kli kaikan, ba upla nannira bara bui kan, ban wisatta: „Naha sin kumi ba nanni wina.“ Witin bila: „Apia polli.“ — Tisku kan, ba upla nanni Petrusra bila: „Kasak polli, man sin kumi ba wina, man Galilea wina, man yabal lattan sika.“ Sakunna witin saura aisin, ban wissi: „Yang ba waiknika kaikras, man aisissima ba.“ Bara kallila kli aiwonan. Bara Jesus tau, Petrusra kaiki kan. Petrus baha bila ai ku-



piara luki, dia Jesus witinra wisatta. Bara latara wan, ai biarrara sari bri innan.

31. Jesus Kaiphas woal.

Jesus witin Kaiphas mawanra priesta tara bui kan. Witin makabi kan, ai uplika mata, ai bila smalkan mata. Jesus kli aisi: „Yang diara puk lattan smalkattni upla nannira. Yang yu bani smalkattni skul watlara, God watlara sin, bara Juda nanni impaki wan, yang diara yukui aisaras. Diakan yangra makabisma? Ba nanni makabram, yang bili ai walan ba, dia yang wiri! kais ba nanni kaisa, dia yang wisattni.“

Bara witin ban win, sulliar wita kumi lamara bui, witinra ai mita tanta ni prukan, ban aisi: „Man ban aisisma, priesta tara mawanra?“ Jesus bila: „Yang saura aisari kaka, ban ai wis, sakunna yamni kaka, diakan ai prukisma?“ Bara priesta nanni, kaunsil puk, almuk nanni diara pliki kan Jesus mapara, witin ika'a mata, sakunna sip sakras. Upla uya kunnin polli aisi kan ai mawanra, sa-



kunna ai bila tanis takan. Bara priesta tara buan lilapassra, Jesusra makaban ban aisi: „Man bila kumi sip aisaras? dia sa ba nanni man mawanra saura aisissa?“ Sakunna Kristus ai bila sin quak-ras, diara aisaras. Ai pua kau aimakras bamna.

Bara priesta wita kli makaban, ban wisatta: „Man ba Kristus pollisma, God lupia yamni polli?“ Jesus bila: „Yang sika, man waikna lupia kaikma, iwissa mita aikikara karna polli, kasbrika pura wina bal iwan.“ Bara priesta wita ai koallka kalki, ban wisatta: „Dia bila woala kau wansma? kais nanara man walram, ai bila saura, dia lukisma?“ Bara upla puk witin pruaiara tauan. Ba sulliar nanni witin alki, ai mawanra prukan; ai nakra bikan, kli mawanra prukan, ban makabi: „Nanara wis, man

Kristus kaka, ya mai prukan?“ Bara titan polli priesta nanni, almuk nanni aikuki lukan Jesus mapara, witin pruaiara tau mata. Bara witin priskan, briwan Pontius Pilatus mitara mankan, Roma wita kan.

Bara Judas, ai Masterka waila mitara mankan ba, kaiki witin pruaiara tauan, ai kupiara luki, sari brin, dia daukan mata, witin ba lalla pini 30 kulkan priesta nannira, almuk nannira mitara mankan, ban aisi: „Yang saura daukri, yang ba tala kupia pini waila mitara mankri.“



Ba nanni bila: „Baha dia yang nannira sa? man^s kaikma, dia munnaia.“ Bara witin lalla pini puk God watlara lulkan, makka wan, ai ulanki prnan. Bara priesta nanni lalla pini puk saki, ban aisin: „Yamni apia, baha lalla tempelra mankaia, baha tala mana.“ Ba nanni ai kupiara lukan, dia daukaia tasba kumi atkan, upla aika bara bikaia, bamna baha tasba nina makan: „tala tasba!“

32. Jesus Pilatus, Herodes woal.

Bara Jesus wita, goanar nina Pilatus mawanra buan; sakunna Juda nanni ba la watlara dimras. Bara wita witin makaban: „Man Juda kingkasma?“ Jesus bila: „Yang tasbaia naha tasba wina apia, ban kaka, yang alba nanni puk aiklabi kabia, bara Juda sip ai mankras; sakunna nanara yang tasbaia na wina apia.“ Pilatus bamna kli makaban: „Man ban kingkasma?“ Jesus bila: „Man ban aisisma, yang king pollisni. Ba mita yang na tasbara balri, kasak polli smalkaia. Upla bani ai kupiara kasak luki, yang bili baikra walissa.“ Pilatus bila: „Dia ba kasak sa?“ Bara witin ban aisi kan, kli latara wan, Juda nannira ban wisatta: „Yang diara saura witin kupiara sakras.“

Ba nanni kanra laui takan, aisi: „Witin upla puk tanis munni, smalkissa Judeara, tasbara aiska, Galilea wina na tasbara kat.“ Pilatus Galilea nina walan, makaban, ba waikna Galilea wina balan? Baha ban walan, witin Herodesra blikan, witin Jerusalemra kan bamna. Bara Herodes Kristus kaikan, witin auyapa polli kan, witin patitara wina kaikan dauki kan, diara uya Kristus dukia walan bamna. Bara witin bila uya makaban, sakunna Kristus bila kumi sin aisaras. Wita nanni, sasmalkra nanni buan, bila saura ai mawanra aisi kan. Herodes ai sulliar nanni sin witin umpira daukan, prak pauni witinra dinkan, kli Pilatusra blikan. Ba yua wina Pilatus Herodes woal uplika takan, kau kan lamika polli kan.

Nanara ba yua goanar upla kumi silak watla wina sakaia kan. Bara waikna kumi silak watlara kan, upla aikra, nina Barrabas. Pilatus Juda nannira wisatta: „Ya man wansma, yang manra sakaia? Barrabas, ba apia Jesus, nina Kristus?“ — Witin kaikan, ba nanni witin misbara alki bri, ai mitara mankan. Pilatus la sulattara iwi kan, ai maya baha bila witinra blikan: „Na waikna yamni man ban swis; yang na timiara uya yapri saukan kaikri witin mata.“ Sakunna priesta wita nanni, almuk nanni uplara win, Barrabas makabi sakaia, sakunna Kristus iki saukaia. Pilatus bila: „Dia munnaia Jesusra, ai nina Kristus?“ Bara upla puk witinra: „Witin duss purara sapi.“ Goanar wisatta: „Diakan, dia saura witin yan?“ Sakunna ba nanni kanra karna inni kan: „Witin duss purara sapi!“ Bara Pilatus kaikan, witin Kristus sakras, sakunna ba bin kanra uya takan, li bri, ai mita sikban, upla mawanra ban aisi: „Yang ba waiknika yamni tala laikras, man bui baha kaikma.“ Bara upla puk ban aisi: „Witin tala yawanra, lupia nannira balbia!“

33. Jesus pruaiara tauan.

Bara Pilatus Jesus alki brin, witin wiapan, suliar nanni kraun kiaya ni pitban, ai lallra dinkan, koalla pauni witinra dinkan ban aisi: „Kais Juda kingka!“ bara ai mita ni witin prukan. Pilatus kli wan, ban aisi: „Kais, yang witin manra bribalatni, bara man kaikma, yang diara saura ai kupiara laikras.“ Bara Jesus latara wan, kiaya kraun ai lallra bri, koalla pauni sin. Pilatus bila: „Kais naha

waiknika!“ Priesta nanni, sulliar nanni baha puk kaiki kan, ban karna innan: „Witin duss purara sapi! witin duss purara sapi!“ Pilatus bila: „Man



nanni brima, witin dussra sabaia, yang diara saura witin wina sakras.“ Juda nanni bila: „Yang nanni la kumi brisni, ba la mita witin prubia, witin bui God lupia daukan.“ Pilatus baha bila wali, kanra sibrin takan, kli la watlara wan, ban Jesusra makaban: „Anni wina balattma?“ Sakunna Jesus bila kumi sin aisaras. Bara Pilatus witinra: „Man yang-ra aisaia want apia? Man kaikisma, yang karnira brisni, man dussra sabaia, baha apia kaka, kli pri mai sakaia?“ Jesus bila: „Man karnira briras yang mita, sakunna pura wina baha briram, bamna baha upla nanni, yang mitamra mankan, kanra saura daukan.“

Ba wina Pilatus pliki kan, Kristus sakaia, sa-

kunna Juda nanni karna innan, ban aisi: „Naha waikna man swissi wabia kaka, Kaisar uplika man apia. Ya king kaia want, witin Kaisar lamika takan.“ Pilatus baha bila wali, Kristus ba upla mitara mankan, duss purara sabaia. Ba nanni witin briwan, Kristus duss prini twilki kan.



Bara upla uya ai nina blikan, mairin nanni inni baui kan. Jesus wattaui ba nannira wisatta: „Lupia mairin nanni, Jerusalem wina, yang mata inpara, sakunna man mata, man lupiam mata inram! Baha duss kurara dauki kaka, dia takbia duss lawanra?“

34. Jesus duss prinira.

Bara ba nanni ba tasbara balan, nina Golgatha (lallkamka tasba) wain, diara tapla woal mankan, witinra yan diaia. Sakunna Jesus baha laya diras kan. Ban witin, yawan sasakra, waikna kumi kupia yamni, duss prinira saban, ai mita, ai mina silak ni saban. Yang saura daukri, ba mita, man saura daukram, upla puk na tasbara saura daukan ba mita. Witin woal upla saura woal duss prinira saban kan, kumi aikikara, woala smikara. Ban Jesaias pot ul-

ban: „Witin upla saura woal kulkan.“ Sakunna Jesus ai pura sunnan: „Aissiki, naha ban swis, ba nanni kaikras, dia daukissa.“

Baha bila kumi, Jesus duss wina aisi kan. Sul-liar nanni ai koalla saki brin, ban kalkan, sakunna witin prak tara kalkras, ba nanni pana pana aisi kan: „Baha praka yawan kalkaia apia, sakunna lot lulkaia, ya dukia kabia.“

Pilatus duss purara tanka ulban, Hebraea, Grika, Latina bila, ban katta: „Jesus Nazaret wina, Juda kingka.“

Sakunna upla nanni, priesta nanni, sulliar nanni bila saura aisi kan, yuhki: „Man God lupia kaka, duss prini wina bal iuram!“ Witin bui God lupia, mirakula dauki kan, upla pruan raiti wina bukan. Upla saura daukan kumi, dussra pammi kan, witin-ra pura yuhki ban aisin: „Man Kristus kaka, man taki iws, yawan sin sakaia.“ Sakunna woala witin



smalki, ban wisatta: „Man Godra sia briras, kaikisma, man sin pruaiara tauan? Yawan aitanni kasak, yang nanni brisni, dia yawan saura daukri, ba mana kasak polli, sakuuna naha waikna diara saura daukras polli.“ Bara witin Jesusra: „Dawan, yang-ra luki bas, man wamtlara wama kaka.“ Bara Jesus witinra: „Kasak polli, yang mai wisni, naiwa man yang woal purara paradisara iwi kama.“ — Nanara duss lamara Kristus yapti, yapti diura, Maria Magdalena buan. Jesus ai yapti kaikan, ai uplika witin latwan bri, ba, ai yaptira wisatta: „Mairin kais man lupiam.“ Bara ai uplikara wisatta: „Kais man yaptikam.“ Ba yua wina ba uplika Maria ai watlara brin. — Bara yu lall kat timia tara takan, tasbara aiska tutnira ban katta. Bara tutnira Jesus karna polli innan: „Yang Godki, yang Godki diakan ai lulki swismani?“ Ba ninkara Jesus kaiki, diara puk God bila wina suddakan ban winnan: „Yang diran ai daukissa!“ Bara kuma laya bui kan, knutka ni bangkan, duss bri, ai bilara mankan. Jesus baha kuma laya din ban wisatta: „Puk suddakan!“ Bara witin karna innan, ban aisi: „Aissiki, man mitamra yang lillki maikuni.“ Bara ban winnan, ai lall makupan, bara pruan. Bara kais tempel koalla lilapassra kalwan, ta wina pnatara. Tasba nikban, walpa tar baiwan. Raiti nanni quawan, upla uya bruan yapi kan, kli buan, raiti wina balan, ba ninkara tauanra dimman; upla puk ba nanni kaikan.

Sulliar wita baila bui kan, nike nike kaikan, Kristus ban inni kan, ban pruan kaiki ban aisi

kan: „Kasak polli, naha waikna God lupia katta.“ Upla puk aikuki balan, baha kaiki, dia takan, ai lamara prukan, bara kli wattau wan.

35. Jesus raitira bikan.

Sulliar nanni balan, ba upla nanni dussa krikaia, upla saura daukan, ba dussa krikan, sakunna Jesusra balan, bara kaikan, witin pot pruan, ai dussa krikras, sakunna sulliar kumi lanksar bri, ai tnaya saban, bara tala li woal tawan. Naha ban kan, Biblia bilara ban ulban, puk takan: „Dussa kumi krikbi' apia.“ Bila woala, ban aisi: „Ba nanni kaikbia witinra, saban ba!“ Bara kais tutnira Joseph Arimathia wina balan, waikna lalla kira, sinskira, witin Jesus pruaiara tauaia want apia, ai uplika bamna. Witin ban Pilatusra wan, Jesus wina tara mata makaban. Pilatus taiwan, Jesus pot pruan, ai sulliar wita winnan, makabi, witin pati tara pot pruan saba. Baha wali, witin „ao“ wisatta, „man brima.“ Bara Joseph koalla pain bribalan, Kristus musa duss prini wina sakan. Ba ninkara Nikodemus balan (witin Jesusra timiara balan kan) aloë, myrra woal bribalan, paund hundred wirra. Bara ba nanni Jesus musa bri, koalla ni srukan, aloe woal mankan, ai yabal ban sa, upla bikaia.

Nanara ba tasba lamara witin dussra pruan, nasla katta, ba bilara raiti raya, upla pruan bara kau bikras kan. Ba bilara Kristus musa mankan, raiti ba lamara kan bamna.

Yu woala priesta wita, almuk nanni aikuki balan Pilatusra, ban aisi: „Dawan, yawan amiara brisni,



ba waikna kunnin kira, kau raya ban wisatta: Yu yumpa luka yang kli raiti wina buamni. Bamna bila blikram, raiti ba prakaia yu yumpara; ai upli-ka balaia apia, kli witin impliki sakaia, uplara ban wibia: „Witin raiti wina buan,“ bara tanka kanra saura kabia. Pilatus bila: „Man sulliar brima, ai wakaia; ban was, baku dauks raiti ba prakaia.“ Ba nanni makka wan, raiti praki, sulliar ai waki kan.

36. Jesus raiti wina buan.

Sabbat tara luan (baha Dawan yua) titan polli tasba nikban, Dawan ankila pura wina bal iwan, walpa ba raiti wina karbi sakan, purara iwan. Witin mawan umyula baku, witin koalla pini polli, ba upla ai waki katta, siabrin musa tatatwan, upla pruan baku takan. Mairin woala Jesus ninara bliki Galilea wina balan, timia woala pot aloe, batana, kia pain atkan; ba nanni lukan, Sabbat yua luan,

Jesus wina raitira mankaia. Bara titan polli ba nanni raitira wan. Maria Magdalena taura wan, yabal klutkara, raitira balan, lapta kau ulli baiuras. Witin kaikissa, walpa raiti wina pot sakan, witin kli ai yabalkara plappan, Petrusra, Joannesra ban wisatta: „Ba nanni yawan Dawan raiti wina sakan, yawan kaikras, annira witin tnikan.“

Bara Petrus Joannes woal buan, baha ai nakra ni kaikaia, Maria Magdalena ba nina blikan.

Ba ninkara mairin woala sin raitira balan, bila man kaikan. Ba nanni taiwan, kais ankila woal lippnissa bara kan. Kumi bila: „Diakan man upla raya pruan tilara pliki taukisma ki? Witin nara apusa, sakunna pot buan raiti wina. Man yabalkam was, ai uplika nannira, Petrusra wis, witin man kainamra wabia, Galileara, bara man witin kaikma, witin ban wisatta bamna.“ Bara ba nanni aini wan, raiti wina plappan, ai musa tatatwan.

Ba nanni kli tauanra wan, Petrus Joannes woal raitira balan, koalla pini kaikan, ba bilara Jesus wina srukan kan, sakunna witin bui sip sakras. Bamna luki kan, upla woala witin sakan. Bara ba nanni kli ai watlara wan.

Sakunna Maria Magdalena latara bui inni kan, ban inni ai makupi raitira kaikan, bara ankila woal koalla pini dimmi kaikan, kumi lallra, woala minara iwi kan. Ba nanni makaban: „Mairin! diakan innisma?“ Baha wisatta: „Upla woala yang Dawanki sakan bamna, yang kaikras annira witin bikan.“ Bara witin baha aisi kan, ai nina taui kaikan, Jesus bui kaikan, sakunna witin kaikras, Jesus saba.

Jesus witinra bila: „Mairin, diakan innisma? Ya plikisma?“ Maria luki, witin insla dadaukra, ban wisatta: „Waikna, man witin briwaram kaka, ai wis, annira man witin tnikattma? bara yang witin saki brimni.“ Jesus ai nina maki: „Maria.“ Bara witin kaiki ban innan: „Rabbuni“ baha tanka: „Maisterka“ ai minara kauan. Jesus witinra bila: „Ai kangpara, yang kau purara aissikira ulli waras, sakunna yang moinira was, ba nannira ban wis: „Yang purara wamni aissikira, man aissikamra, yang Godkira



man Godkamra!“ Baha mairin ai watlara plappan, Jesus mairin nanni woal prawan, yabalra Jerusalemra, ba nannira wisatta: „Puk yamnisma?“ Ba nanni balan, witin ai minara alkan, witin mayunaia.

37. Yabal Emmausra.

Ba yuara Jesus Petrusra balan, witin woal aisi kan. Ai uplika woal ba yuara tauanra kumi, nina Emmaus, impaki kan. Ba nanni naha diara puk aikuki aisi kan. Ai yabalkara impaki kan, waikna woala witin nanni woal prawan, ya ban wisatta: „Dia bila man pana aissima, diakan man sari bris-



ma?“ Bara kumi nina Kleophas aisi ban wisatta: „Man yakansma Jerusalemra, baha diara kau kaikras, bissi daukan.“ Bara witin: „Dia tanka?“ Ba nanni bila: „Jesus Nazareth wina dukia, ya propheta, ai bila karna, mirakula dauki, God, upla puk mawanra; naki nanni, almuk nanni pruaiara tauan, naki duss prinira saban. Sakunna yawan lukri, witin bui Israel sakaia katta, naiwa pot yu yumpa luan, naha diara puk takan. Ao, mairin nanni yawan uplika wina titanra raitira wan, ba nanni ai wina tara kaikras kan, kli balan, ban aisi: Yawan yapri saukan, ankila kaikri, ba nanni wisatta, witin pot raya kan. Upla woala raitira wan, baku kaikan, dia mairin nanni wisatta, sakunna witin bui sip kaikras.“ Bara witin bila: „Allai, man nanni

tanis, srinwan baha lukaia, dia propheta nanni pot ulban. Naha diara Kristus daukaia katta apia, bara ai ingnikara (gloria) dimmaia apia?“ Bara Moses wina, propheta nanni puk witin dukia yamni lattan smalkan. Bara ba nanni ba tauan lamara balan, witin kanra laiura waia ikatta. Sakunna ba nanni witin uya makabi, aisin: „Yawan woal iwi kama, timia pot aula, yu puk luan.“ Bara witin dimman, takaskaia. Ba ninkara witin iwi kan, plun piaia, tani brin, tasapi krikan, ba nannira yan. Bara witin nakra ilingwan, witin nanni Jesus bui kaikan, sakunna Jesus ai mawan wina laptiwan. Ba nanni pana pana aisi kan: „Yawan kupia tankrawi apia katta ki, witin yabalra yawan woal aisi kan? bara, baha wonktaya yawan smalkan.“ Ba nanni buan, timia pot, kli Jerusalemra wattauan, ai uplika nanni aikuki sakan, ban aisi: „Wan Dawan kasak polli buan, Simon witin kaikan.“ Ba nanni wisatta, dia witin yabalra munnan, naki witin kaikan, tani krikan. — Ba nanni kau ban aisi, Jesus bui lilapassra bal' buan, ban bila: „Kupia kumi man nannira!“ Sakunna ba nanni taiwan, luki kan, witin ulassa baku. Witin bila: „Diakan man sibrisma? diakan bamuna kupiamra lukisma? Kais miti, mini, yang bui narasni, ai alki kais, ai kaikram, ulassa naha wina, dussa briras, naha yang brisni.“ Witin baha aisin, ai mita, ai mina ba nannira marikan; ba nanni kau lukras kan, witin ban bila: „Man nanni wina uria brisma?“ Ba nanni witinra inska kiskan bri-balan, nasma sin. Witin bri, ai mawanra puk pin.

38. Jesus Thomasra balan, bara kabora Tiberias.

Sakunna Thomas, ai uplika kumi, bara apu kan. Uplika woala witinra bila: „Yawan wan Dawan kai-kri.“ Sakunna witin bila: „Yang ai mitara silak saban kaikamna kaka, yang miti silak untara dinkamna kaka, yang miti ai tnayara dinkamna kaka, bara yang luki kamni.“

Yu matlalkabi pura woal luka ai uplika nanni kli ai druban, Thomas kira, bara Jesus balan, door nanni prakan, lilapassra bal buan, ban aisi: „Kupia kumi man nannira kaia!“ Bara witin Thomasra: „Man mitam nara sakbi, yang miti kais, man mitam kli sakbi, yang tnayara dinks; kupias kapara, sakunna luki bas.“ Bara Thomas bila: „Yang Dawanki, yang Godki!“ Jesus witinra bila: „Thomas, man yangra ai kaikattma, man lukattma, ba upla yamni kabia, ya yangra ai kaikras, sakunna ban lukissa.“

Ba ninkara ai uplika nanni kli tauu wan, inska alkaia, Tiberias kabora, bara ai tan timia aiska lallauan, kabora lulkan, sakunna inska kumi sin alk-ras. Yu lallma kabi kan, Jesus kabo unra bui kan, ai uplika nanni kaikras, Jesus saba. Jesus witin nannira: „Tuktan, man wina brisma ki?“ Ba nanni bila: „Apu.“ Witin kli aisi: „Tan slaup aikikara lulkrum, bara man alkma.“ Bamna makka lulkan, bara tan sip aubi sunnras, inska uya polli bamna. Bara Joannes Petrusra: „Baha Dawan sika!“ Petrus baha walan, kabora dimman, unra yauu ullau. Ba nanni prumnira ullau, pauta kmasku kaikan, inska



purara, tani sin. Jesus bila: „Ba inska wina bri-bal, dia man alkattma!“ Simon Petrus ullan, ba tan inska man bangwan prumnira aubi sunnan, 153, uya polli, sakunna tan ba kriuras. Jesus ba nan-nira: „Balka pipi.“ Ai uplika nanni kumi sin sip: „Yamna man?“ wiras, witin nanni kaiki kan; baha Dawan. Jesus balan, tani bri, inska sin, ba nan-nira yan.

Bara sut pin, Jesus Simon Petrusra wisatta: „Simon, Jona lupia, man yangra kanra latwan ai kaikisma, naha nanni baku?“ Witin bila: „Ao, Dawan, man kaikisma, yang manra latwan ai dau-kissa.“ Jesus witinra bila: „Yang lupiki dakaks.“ Witin kli makabi, aima woala: „Simon, Jona lupia, man yangra latwan ai kaikisma?“ Witin bila: „Ao, Dawan, man kaikisma, yang latwan mai brisni!“ Witinra Jesus bila: „Yang upliki dakaks.“ Witin aima yumpa makabi: „Simon, Jona lupia, man yangra latwan ai brisma?“ Petrus sari bri, ban

wisatta: „Dawan, man diara puk kaikisma, man kaikisma, yang latwan mai brisni.“ Jesus witinra bila: „Yang lupiki dakaks.“ „Kasak polli, yang mai wisni, man kau woama kan, man maisawilla willkattma, man impakattma, annira man yabal kaikattma, sakunna man almuk kama, man mitam sakbi kama, upla woala man maisawilla wilkbia, mai briwabia, annira man waia apia.“ — Aima woala Jesus ba tasbara balan, 500 uplika nanni aikuki kan, ba nanni witin kaikan, witin raiti wina buan.

39. Jesus purara ulli wan.

Jesus ai uplika nanni kau swiras, bara witin ai laka manki yan: „Karnira puk yang dukia, purara, tasbara sin. Bamna man nanni was, tasba banira, upla puk smalkram, li laikram, Kristian dauks, wan aissa nina bri, ai lupia nina, lilka yamni nina bri, ba nanni smalki, diara puk daukaia, dia yang mai wiri. Ba upla ai kupiara baha luki, Kristian takan kaka, witin sakan kabia, sakunna ba upla ai kupiara baha lukras, pautara lulkan kabia. Ba upla ai kupiara luki: Yang nini bri witin ulassa kangbia, twissa raya woal aisabia, ba nanni piuta alki bribia, diara saura di kaka, prubi' apia, ba nanni ai mita uplara sikniskira kangbi kaka, ba upla raubia. Kais, yang man woal kamni, tasba pnatarar.“

Bara Jesus ai uplika nanni kau kumi aikuki winan, witin bila: „Man nanni Jerusalem wina tak wam' apia, sakunna yang bili suddakaia, man lilka yamni pura wina brima, baha bila kaiki bas.“

Bara ba nanni witinra makabi: „Dawan, man

nanara Israel nanni kli karna daukma?“ Bara witin bila: „Manra apia, ba pua sin kaikaia, dia wan aissa yakan kaikissa. Sakunna man karnira



brima, lilka yamni man kupiamra dimman kaka, man nanni yang bili smalkma Jerusalemra, Judeara, Samariara, tasba pnatar sin.“ Witin naha diara puk aisin, ba nanni kaiki, witin purara briwan kan, kasbrika witin ai mawan wina yuku kan. Ba nanni kasak purara kaiki, kais waikna woal, witin nanni lamara buan, koalla pini dimman ban aisi kan: „Waikna nanni, Galilea wina, diakan man purara kaiki buisma? Baha Jesus bui purara briwan kan, ban baku kli balbia, naki man witin kaikram purara waia.“

Bara ba nanni witin mayunan, kli Jerusalemra tau i wan, lillia polli kan, yu bani tempilra iwi impaki, God nina mayuni kan.

40. Ba yua Pentakost.

Kristus purara ulli wan, bara ai uplika nanni Jerusalemra aikuki yukui iwan; yu bani ai pura sunni, Godra ai lilka yamni blikaia. Yu matawoalsip Kristus purara ulli wan, Pentakost yu yamni, ba yua upla puk aikuki kan. Bara makka pura wina passa, bin karna polli kraui balan, ba uttla witin nanni iwi kan bangwan. God lilka yamni twissa baiwan, pauta klaui baku takan, upla bani purara iwi kan. Ba nanni puk God lilka yamni kira bangwi kan, bara twissa woala makka aisi kan, dia lilka yamni ba nannira smalkan.

Ba piuara Jerusalemra Juda nanni iwi kan, kupia yamni Godra, taya bani wina na tasbara. Nana na diara upla puk walan, upla puk aikuki balan, ai sirang iwan, bamna upla bani ba nanni wali kan, ai bila aisin. Bara ba nanni puk taiwan, ai kupia laptiwan, pana pana aisi: „Kais, naha nanni puk aisi, na Galilea wina apia ki? Naki yawan upla bani ai bila walisni, annira yawan aisan?“ Ba nanni puk taiwan, ai kupiara luki, ban aisi: „Naha dia wirara?“ Upla woala nata luki wisatta: „Naha waikna nanni wain raya uya din.“ Sakunna Petrus buan, ai uplika nanni sin, ai bila baikra karna aisin, ba nannira wisatta: „Waikna nanni! Judea wina, man nanni puk Jerusalemra iwisma, naha tanka man kaikma, yang bili wals, naha nanni bla daukras, man lukisma ba, kais kau titan polli. Sakunna naha baha sika, dia propheta nina Joel aisin: „Ban kabia, ba yuara pna-



tara God aisi, yang lilki wina upla pukra laikamni, man lupiam nanni dara wibia, diara kabia, wibia, man waikna woama nanni diara aika kaikbia, man almuk nanni yapri saukan kaikbia, yang napakan waikna nannira, mairin nannira ba yuara yang lilki wina laikamna, ba nanni diara ba kabia wibia.“ Israel waikna nanni, naha bila wals! Jesus Nazaret wina, ba waikna God wina blikan, witin upla pruan, kli rakan, nakra prawan, kli ilinkan, diara woala sin man tilara daukan, man nanni bui ba kaikatt- ma, witin bui man alki briram, man mitam saura witin dussra sabi ban ikram. Naha Kristus, God bui witin raiti wina bukan, yang nanni puk baha kaikri. Bamna nanara God aikikara sunnan, witin ai lilka yamni pura wina blikan, dia man kaikisma, ba sin walisma. Bamna Israel nanni puk yarka kaikuma, God bui naha waikna Jesus wan Dawan Kristus daukan.“

Bara ba nanni baha walan, ba bila ai kupiara

saban, ban Petrusra win: „Waikna, moini nanni, dia munnaia?“ Bara Petrus wisatta: „Man nanni kupiam ulaks, bara Kristian takma, upla bani Kristus ninara, dia man saura yaram witin sakbia, bara ai lilka yamni maikbia. Naha bila man nannira, man lupiam nannira sin, upla puk dukia, laiura iwi, ya God wan Dawan winbia.“ — Ba upla nanni naha bila aiauyapa brin, Kristian takan. Ba yuara tau-sin yumpa upla nanni ai nina mankan. Ba nanni yu bani God uplika, apostola bila ai kupiara luki, ai tani pana pana kriki, ai pura sunni kan. Ba nanni puk aikuki ai kupia kumi, diara puk aikuki mankan brin, ai dukia atkan, upla woalara yan. Upla puk ba nanni yamni kaikan, wan Dawan yu bani upla woala purara prakan.

41. Ananias, Saphira woal.

Waikna kumi, nina Ananias, Saphira ai maya woal ai tasba aiska uplara atkan, sakunna mana bakriki kaiki brin, ai maya sin kaiki kan, mana woala bribalan, apostola minara iki swin. Sakunna Petrus bila: „Ananias, diakan Satan man kupiamra mankan, God lilka yamnira kunnin aisaia? tasba mana bakriki briaia. Man atkras kaka, bara man dukiam apia katta? Naki kan, man kupiamra na diara saura luki kattma? Uplara apia, sakunna Godra kunnin aisattma?“ Ananias baha bila walan, bara tasbara kauan, makka pruan. Upla puk naha wali kan, sibrin polli kan. Bara woama nanni bui, witin briwan, raitira bikan. Tisku kan bara ai maya, naha kau walras, bal dimman.



Petrus witinra bila: „Ai wiram, man nanni ba tasba mana ban atkattma?“ Baha mairin wisatta: „Ao.“ Bara Petrus witinra: „Naki kan, man mayam woal ban Dawan lilka traikaikattma? kais, ba upla mina, man mayam bikan, pot narasi, man sin mai bikaia.“ Bara mairin Petrus minara kaui pruan, woama nanni dimmi pruan kaikan briwan, ai maya lamara bikan. Upla puk, naha tanka wali kan, sibrin polli kan.

42. Stephanus.

Diakon kumi, nina Stephanus, kupia yamni God-ra, witin mirakula uya upla tilara daukan. Witin Kristus laka yu bani smalkan, bamna Juda nanni witin misbara kaikan; ba nanni, dia witin smalkan, sip ulakras kan. Witin nanni laui daukan Stephanusra, upla nanni, almuk nanni, puk aikuki winnan, witin alki kaunsilra briwan. Bara ba nanni witnis kunnin kira mankan, ban aisin: „Naha waikna yu bani bila saura aisi na tempilra, lara sin, yawan

walri witin aisaia, naha Jesus Nazaret wina naha tasba slingbi saukbia, ba laka, Moses pot wonkan, ulakbia.“ Upla puk kaunsilra iwi, witinra lak kaikan, witin mawan, ankila mawanka baku kan.

Bara priesta wita bila: „Naha diara ban sa?“ Bara Stephanus ai bila quakan, diara puk mirakula sin God Israel nannira daukan puk aisin, bara ban wisatta: „Man nanni kiamapara, kupia saura polli, man nanni God lilka bila walras, man dama nanni ban yan, man baku isma. Anni propheta man damikam nanni rau saukras, pruki kangbras? ba nanni ikan, ya waiknika smalkan, Messias ba aula, witin bui man nanni sabi ikram.“ Baha aisi, witin nanni kupia baiwan, napa arkbi kan. Sakunna Stephanus lilka yamni woal bangwan, lak purara kaikan, God ingnika kaikan, Kristus God aikikara bui, ban aisin: „Kais yang kasbrika quawan kaikisni, waikna lupia God aikikara buissa.“ Bara ba nanni karna inni kan, witin kiana nanni prakan, puk aikuki



witinra plappan, tauan wina lulki sakan, walpa ni sabi ikan; witniska nanni ai koalla waikna woama minara, nina Saul, tnikan. Ba nanni Stephanus walpa ni ikan, sakunna witin ai pura sunni: „Dawan Kristus, yang lilki briram.“ Witin ai lula krikkan, karna innan: „Dawan, dia ba nanni saura munnan, kli saks!“ Bara baha aisin, yapi pruan.

43. Eunuka Ethiopia wina.

Saulus aiauyapa kan, Kristian nanni ikaia. Witin uttla nannira dimmi tauki kan, Kristian nanni alkaia, silakra mankaia. — Philippus, diakon kumi, Samaria tauanra wan, bara witin Kristus bila smalkan, mirakula uya daukan, upla nanni ba tauanra lillia polli kan. Ba ninkara Dawan Philippusra win, buaia Waupassa mapara waia, ba yabalra Jerusalem wina Gazara. Bara witin bui wan, kais waikna kumi Ethiopia wina, eunuka, wita ainwa, Kandake kwinka, witin lalla puk bri kaiki kan, witin Jerusalemra balan ai pura sunnaia, kli tau, ai kariotra iwi kan, Jesaias propheta wonktaya aisi kan. Bara



Lilka Philippusra bila: „Lamara was, ba kariotra dimmi iws.“ Philippus aini plappan, witin propheta Jesaias wonktayara aisi kan, walan, ban makaban: „Man tanka aiska walisma, dia man aisisma?“ Witin bila: „Naki walamni, upla ai smalkras kaka?“ Witin Philippusra win: „Bal dims, yang woal iuram; Witin ba wonktayara ban aisi kan: Jes. 53: „Witin lam baku ikan kaia briwan, witin ai bila quakras, diara aisaras.“ Bara eunuka Philippusra makaban: „Yang makabisni, propheta aisina yaura? witinra saba, upla woalara saba.“ Bara Philippus ai bila quakan, wonktaya ba smalkan, Kristus tanka puk aisin. Bara ai yabalra impaki wappi kan, tingni kumira prawan, eunuka wisatta: „Kais li narasi, dia ai takaskbia Kristian takamni?“ Philippus bila: „Man kupiamra lukisma kaka, ban kabia.“ Bara witin kli aisin: „Yang kupira lukisni, Kristus God lupia kumi sika.“ Bara ai kariot takaskan, ba nanni woal liura dimman, Philippus, eunuka sin; witin Kristian takan. Bara ba nanni li wina taki balan, Dawan Lilka Philippus alki briwan, eunuka witin kli kaikras, witin ai yabalka auyapa ai waltara wan.

44. Saulus kupia ulakan.

Saulus Kristian nanni yu bani alki, silakra mankan. Witin priesta wicara wan, wonktaya witin wina makaban, Damaskusra Kristian puk alkaia, priskan Jerusalemra briwaia. Witin impaki kan, Damaskus lamara balan. Bara ingni tara kasbrika pura wina witin kir takan, witin tasbara kauan, bila

baikra walan, witinra aisi kan: „Saul, Saul, diakan yang waila takisma?“ Saulus makaban: „Man



yamna Dawan?“ Dawan bila: „Yang Jesus bui, Nazaret wina, man yang waila takaia isma, karna manra kabia, kiayara mina patta prukaia.“ Bara witin ai musa tatatwi, taiwan wisatta: „Dawan, dia wansma, yang daukaia.“ Dawan witinra bila: „Bus tauanra was, bara mai wibia, dia munnaia.“ Sakunna upla woala, witin woal balan, bilas takan, bila baikra wali, sakunna upla kumi kaikras. Bara Saulus tasba wina buan, ai nakra buki, upla kaikras, ba nanni ai mitara alki Damaskusra briwan. Witin yu yumpa sip kaikras kan, diara piras, diara sin diras. — Bara waikna kumi Damaskusra kan, nina Ananias, witinra Dawan bila, yapri saukanra: „Ananias.“ Witin aisin: „Kais, yang narasni Dawan.“ Bara Dawan witinra: „Bus, ba yabalra impaks, nina „Wapni“, bara Judas watlara waikna kumi, nina Saul, Tarsus wina, makabram, kais witin ai pura sunni, witin ai yapri saukanra waikna Ananias kaikan, dimmi, ai mita witinra kabi, ai nakra ilinkaia.“ Bara Ananias bila: „Dawan, upla uya yangra win,

ba waikna man uplikam nannira rau saukan; Jerusalema, priesta, wita nanni witin blikan, upla puk manra pura sunni priskaia.“ Sakunna Dawan witinra bila: „Kupiam lukpara, ban was, yang bui witin sakri, yang nini upla nannira bri waia, Israel lupia nannira; yang witinra marikamni, dia yang nini mata saura bri kaia.“ Bara Ananias makka wan, ba watlara dimman, ai mita witinra kabi, wisatta: „Moini Saul, Dawan, Kristus bui, ya manra yabalra balan, ai blikan, man namkra ilinkaia, God Lilka yamni man woal kabia.“

Bara ai nakra wina, inska taya baku kauan, witin kli lattan kaikan, buan bara Kristian takan. Bara daiwan wina pi katta, kli karna takan. Ba yua wina Saulus ainwa smalkan, Kristus, God lupia sika, wan sasakra.

45. Kornelius wita.

Waikna kumi Kaesareara, nina Kornelius, Roma wita. Witin kupia yamni Godra, ai taya nanni sin, witin upla umpirara lalla yan, yu bani Godra ai pura sunnan. Witin yapri saukanra ankila tutnira lattan kaikan, aula witinra aisi: „Kornelius.“ Witin ankilara kaikan, sibrin kan, ban makabi: „Dia sa, Dawan?“ Witin bila: „Dia man puram sunram, diara yaram ba, God mawanra balan. Nanara upla nanni Joppera blikram, waikna kumi wins, Simon, nina Petrus, witin Simon woal iwi, ba taya wisbi dadaukra, witin watla kabo unra; witin mai wibia, dia munnaia.“

Kornelius ban daukan, upla yumpa Joppera bli-



kan. Titan woalara ba nanni impaki wan, Petrus uttla bana purara ulli wan, ai pura sunnaia, bara plun polli dauki kan, makka piaia want. Plun piaki kan, witin yapri saukan kaikan, plapta kumi tara bal iwan; koalla yerri ta ni willkan tasbara bal iwan, ba bilara daiwan minira uya, daiwan quassi, piawira. Bara bila baikra walan: „Bus Petrus iki pis.“ Sakunna Petrus bila: „Ban apia, Dawan, yang diara saura kau pi kaikras.“ Bara bila baikra kli winnan: „Dia God yamni daukan, saura makpara.“ Baha aima yumpa takan, bara naha plapta kli purara wan.

Nanara Petrus ai kupiara luki, dia tanka saba, kais ba upla nanni Kornelius wina blikan ba, door latara bui kan, makaban, Petrus narasa. Bara Lilka witinra bila: „Kais, waikna yumpa mai pliki, bamna, bara was ba nanni woal impaks, yang ba nanni blikri.“ Bara Petrus bal iwan waikna nan-nira wisatta: „Kais yang ba waikna, man plikisma; man nanni, dia mata balram?“

Ba nanni tanka puk win, bara yapan. Yu woala

Petrus, ai moinika woala aikuki wan. Yu woalara Kaesareara dimman. Kornelius pot baha nanni bila kaiki kan, witin ai taya nanni puk aikuki winnan. Bara Petrus dimmi, Kornelius ai minara kauan. Sakunna Petrus witin kli buki, ban wisatta: „Bus, yang sin upla, man baku.“ Bara dimman, upla uya ai drubi kaikan. Bara ban bila: „Man kaikisma, yawan la ban apia, yang Juda nanni manra balaia, sakunna God bui ai smalkan, upla woala saura makaia apia. Bamna, yang ban balri, yang nanara makabisni, dia mata man nanni yangra ai winnatma ki?“ Kornelius tanka ba ankila dukia sut win.

Petrus bila: „Kasak polli, yang kaikisni, God mawanra upla bani baku, sakunna taya banira, baha upla witinra siabri, diara kasakkira dauki, witin baha yamni kaiki.“ Bara witin gospel bila smalkan.

Witin kau ban aisi kan, Lilka yamni ba nannira, ai bila walan, pura wina kauan. Bara Petrus wisatta: „Ya upla li bripara wibia? ba nanni Kristian takaia, ya Lilka yamni pot brin, yawan baku?“ Bara witin bila ba nanni Kristian takaia, Dawan ninara. Ba nanni Petrus makaban, kau takaskaia; witin ban daukan, upla nanni yamni smalkaia.

46. Petrus silak watla wina sakan.

Herodes Agrippa king ba apostola Jakobus, Joannes moinika, ispara woal ikan. Witin kaiki, Juda nanni ba mata auyapa kan, Petrus sin alki brin. Bara silak watlara priski mankan, sulliar uya blikan, ai wakaia. Ba timiara, Herodes witin ikaia

katta, Petrus sulliar woal lilapassra yapi kan, silak woal ni priskan, sulliar woala latara ai waki kan. Bara kais, Dawan ankila witinra balan, ingni silak watlara takan, witin Petrus tnayara prukan, witin buki, winnan: „Aini bus!“ Bara silak ai mita wina kauan, ankila witinra bila: „Koallkam dinki dims, sandalkam minara willkram, nini blik.“ Bara la-



tara takwan, ankila nina blikan; ba nanni door yumpa wina takan, silak doorka yakan quawan. Ankila ba wina kau uria witin woal wan, bara kli purara ulli wan. — Bara Petrus kupia tankrawan, witin aisin: „Nanara yang kasak kaikisni, Dawan ai ankila blikan, Herodes mita wina ai sakan.“ Bara Maria watlara balan. Witin doorra kingban, bara mairin tiara nina Roda walaia balan, baha ai bila baikra makka alkan, sakunna door ba sakras, lillia man bamna, sakunna plappi dimman, ban aisi: „Petrus latara buissa.“ Ba upla nanni ba ai kupiara lukras, sakunna witin kau kingbi kan, ba

nanni bal' door sakan, ai kupia laptiwan, witin kaikaia. Sakunna witin ai mitara wau, sap iwi kaia; bara tanka win, naki Dawan silak watla wina witin saki bribalan. Bara Petrus bila: „Naha diara moini nannira wis.“ Ba wina tasba woalara makka wan. — Yu woala Herodes ai sulliar nanni puk ispara ni ikaia win.

47. Paulus Listrara.

Paulus Asia uriara impaki, Listrara balan. Waikna kumi bara kan, yapti biarra wina mina aisawan, witin Paulus bila walan. Paulus witinra lak kaikan, karna aisin: „Minamra wap buram!“ Bara witin srutwi impakan. Upla nanni baha kaikan, Paulus munnan ba, karna winnan (Likaonia bilara): „God-nanni pura wina bal' iwan upla lil-kara!“ Jupiter, God baki priesta, bip nanni woaya tangni woal pitban latara bribalan, Paulus mayunaia katta. Sakunna apostola nanni Barnabas, Paulus woal baha wali, ai praka kalkan, upla tilara plap-plan, karna innan: „Waikna-nanni diakan naha isma? Yawan sin pruamni, man baku, sakunna yang nanni mai smalkamni, God-baki wina Yawan Godra tauaia, witin bui kasbrika tasba, kabo diara puk daukan.“ Baha aisin, upla nanni witin God baku mayunaia kli swin.

Bara Juda nanni balan, Ikonium wina, Paulusra walpa ni saban, tauan wina raski sakan, ai kupiara luki, witin pot pruan. Sakunna ai uplika nanni witin kir balan, Paulus kli buan, tauanra dimman. Yu woalara Barnabas woal Derbera wan, gospel



bila smalkaia ba tauanra. Bi ninkara Paulus kli Listrara balan, tukta kumi woal prawan, nina Timotheus; witin yapti kupia pini, ai kuka sin, ba nanni witin tukta kan biblia wina smalkan. Ba tukta waikna takan, Paulus uplika, apostola sin takan, witin woal tauki kan, gospel bila smalkaia. Paulus witinra wonktaya (epistola) woal ulbi blikan. Ba ninkara Timotheus Ephesusra Kristus mata pruan.

48. Lidia, silak watla kakaikra.

Paulus Troasra kan, bara yapri saukan kaikan, waikna kumi Makedonia wina witinra balan, makaban: „Yawanra lui bal, Makedonia bilara, yawan saks!“ Baha bila wali makka wan, ban Philippira balan. Sabbat yuara witin aoalla unra buan, mairin nanni ai druban smalkan. Mairin kumi, nina Lidia, koalla pauni aiatkra, ai bila walan. Bara Dawan witin kupia quakan, ai kupiara luki, bara sin dauki, dia Paulus smalkan.

Bara Lydia Kristian takan, ai taya nanni kira, apostola paiwan, ai watlara takaskaia. Ba ninkara Paulus ulassa saura mairin tiara wina kangbi sakan; ba masterka laui polli kan, witin lalla brin, ba mairin smaya kaiki kan bamna. Ba nanni Paulus, Silas woal alkan, wita nanni win ba apostola-nanni wiapaia, silak watlara lullkaia, ai mina priskaia. Timia lilapassra Paulus Silas woal ai pura sunnan, aiwanni, Dawan mayuni kan. Upla woala silak watlara baha walan. Bara makka nike nike tara takan, silak watla nikban, tasba plappan, door nanni puk quawan, silak puk langwan. Bara silak watla kakaikra kupia tankrawan door puk quawan kaikan, ai ispara daikan, witin bui ikaia; ban luki, upla nanni puk silak watla wina plappan. Sakunna Paulus karna innan, ban aisi: „Diara saura manra munpara, yawan puk narasni.“ — Witin lamp makaban, plappi dimman, ai musa tatatwan, ai lula kriki tasbara kauan, Paulus minara, ban aisi: „Waikna nanni, dia munnaia, yang sakan kaia.“ Ba nanni bila: „Man kupiamra luki bas, Kristus wan sasakra, witin mai sakbia man taya nanni sin.“ Ba nanni witinra wan Dawan bila smalkan, witin ai watlara briwan, mina sikban. Bara witin Kristian takan, ai taya nanni sin ba yuara. Witin ba nanni plun dakakan, lillia polli kan, Godra ai kupiara luki kan, ai taya nanni sin. Wita nanni titan woala apostola silak watla wina sakan.

49. Paulus Athenra.

Paulus Philippi wina Athenra balan, bara Silas Timotheus woal bila kaikan. Baha tauan kaiki, ai kupia baiwan, ba upla nanni God-baki uya mayunnan bamna. Witin yu bani skulwatlara Kristus tanka, gospel bila smalkan. Bara upla tila sinskira witin woal unsaban, witin ill purara bri wan, ban aisi: „Yang nanni sin ba tanka raya walaia wansni, dia man smalkisma.“ Bara Paulus bila:



„Waikna nanni, Athen wina yang kaikisni, man God-baki uya brisma, ba nanni mayunaia. Yang tauki kattni, yang kaikri, man nanni God-baki mayuni, pura sunnisma. Yang altar kumi sakri, ba purara ulban kan: „Ba Godra yawan kaikras.“ Nanara yang mai smalkamni, ba Godka, wan aissa, witin kasbrika, tasba, diara puk daukan, witin yakan Dawan polli, witin tempel, upla mita ni pas-

kan, bilara iuras, witin yakan diara puk paskan, laiura apia, narasa. Witin mita yang nanni puk iwisni, kau rayasni. — Baha piua yawan God kai-kras, pot luan, sakunna nanara God bila, upla puk tasba banira kupia saura wina ulakaia, diara saura swiaia, witin yu kumi mankan, bara upla puk trai munbia, yawan dara saki wibia, ba waikna Kristus witin wita mankan, witinra yawan kupiara lukaia, witin raiti wina buan.“ Ba nanni baha walán, raiti wina buan, upla tila lawaska kikan, tila aisin: „Yang nanni naika kli walaia wansni.“ Bara Paulus makka wan; sakunna waikna kumi Dionisius, mairin Damaris ai kupiara luki kan, Kristian takan.

50. Paulus silak watlara Kaesareara.

Ba ninkara upla nanni Jerusalemra Paulus alki silak watlara mankan, ba wina Kaesareara bri wan, bara Felix, Roma wita, mawanra la aisaia. Felix witinra kupia pini kan, witin impakaia swin, ao, witin sakaia want, Paulus lalla witinra aibapan kaka. Bamna witin yu bani Paulus winnan, witin woal aisi, luki kan.

Yu kumira Felix, ai maya Drusilla, Herodes lupia woal balan, Paulus winnan, ai bila Kristus dukia walaia. Witin ba nanni smalkan, yawan kasak daukaia, yamni iwaia, ba yua dukia, God yawan trai munnaia, bara Felix musa tatatwan, ai kupia saura bamna, witin Paulusra bila: „Naiwa kli was, naika yu woala yang kli mai winnamni!“ Sakunna ba upla saura, God bila kasak walaia apia. — Mani woal luan, bara Festus wita takan. Witin sin ku-

pia saura, kasak kira apia, Paulus ai kupiara kaiki, Festus Juda nanni woal bila walaia, witin Kaesarra tauan. Festus bila: „Man Kaesarra tauram, witin-ra -wama.“

Ba ninkara king Agrippa balan, Festus ba kaikaia, witin Paulus winnan, ai mawanra Kristus tanka, gospel bila aisaia. Witin ban smalkan: „Wan aissa ai sakan, yang yu banira upla almuk, tukta sin smalkamni, ba tanka dia Moses, propheta nanni sin ulban: Kristus saura latwan bri kaia, pruaia yawan pnata mana, raiti wina buaia, upla nannira ingni kaia, ba upla nanni Kristian kau takras.“ Paulus ban aisin, bara Festus karna innan: „Paulus! man tanis aisisma, ba wonktaya tanis mai daukan.“ Sakunna Paulus kli aisin: „Yang tanis apia, wita Festus! sakunna yang bili kasak polli sika. Man, king, naha diara kaikisma, man mawanra yang naiwa aisisni, naha diara yukuan apia. King Agrippa man kupiamra lukisma, dia propheta nanni ulban? Yang kaikisni, man kupiamra lukisma.“ Bara Agrippa kli Paulusra: „Uria man, bara yang sin Kristian takaia.“ Paulus bila: „Yang wansni polli, man yakan apia, sakunna upla puk, yang baku kaia, naha silak man apia.“

51. Paulus Romra impaki.

Ba ninkara Paulus slaupra aimakan, Romra waia. Roma wita witin alki briwan. Ai uplika woal sin slaupra wan. Ba nanni dakura Kretara takaskaia want, yabra karna bamna, sakunna prari tara ba slaupka awi tasba wina briwan; ba upla nanni

slaupra sibrin polli takan. Ba nanni diara puk ai dukia bri, kabora lulkan, slaup ba ing daukaia, ai patta sin. Dawan ankila Paulusra balan ba timiara, ban witinra aisin: „Sibripara, Paulus, man Kaesar mawanra buma; kais, wan aissa God ba nanni puk man woal ulaki maikan.“ Ba wina tauki ulaki yu uya luan, tasba baila kaikan, sakunna ba nanni kaikras, dia tasba saba. Ba nanni saukara kau ulras, slaup ba walpara kawan. Upla nanni puk yaui suaktakan, tila tat purara, tila slaup yuyara tasbara ullan. Ban upla puk saukara suaktakan. Ba tasba, ullan ba dakura kan, nina Malta. Ba upla nanni kupia pini kan, pauta muki yan, ai musa ai lakaia. Paulus duss uya wabi, pautara mankan, bara piuta lapta wina balan, ai mitara alkan. Bara upla nanni ba piuta saura kaiki, pana



pana aisi kan: „ba waikna upla aïkra, kabo wina suaktakan, sakunna ban prubia.“ Sakunna witin piuta kli pautara lulkan, ban pruras, ainwa kan. Bara upla nanni ban luki kan: „witin God baku.“ Ba yabra kan, dakurara takaskan, Paulus upla umpira sikniskira uya rakan. Kati yumpa luan, kli ulaki kan slaup woalara, bara naika Romra ainwa ullan. Bara Paulus Juda nanni paiwan ai watlara dimmaia; gospel bila witin nannira aisin, biblia wina ba nanni puk smalkan. Upla tila ba diara ai kupiara luki brin, upla tila luki briras. Ban Paulus mani woal ai watlara iwi kan, upla puk witinra balan ba yamni brin, God bila smalkan, Gospel bila, diara puk Kristus dukia, ai kupiara auyapa, upla kumi smalkpara wiras.

52. Gospel bila tasba banira.

Paulus ai wonktayara ban ulban, ai kupiara kau luki kan, kli silak watla wina takaia. Historia ban ulban: witin kli takan Rom wina, bara Asia uria, tasba woalara impaki kan, gospel bila smalki kan, bara kli Romra dimman, upla saura witin alki, ispara ni ikan; gospel bila aisi kan bamna. Witin kau raya, epistola uya ulban ai uplika nannira. Baha epistola yawan puk brisni, Testament raya bilara. Matthaeus, Markus, Lukas, Joannes ba nanni puk gospel bila ulbi kan. Petrus, Jakobus, Joannes, Judas sin epistola nanni ulban. Ba Joannes almuk polli takan, witin wonktaya ulban nina Apokalipsis.

Ba apostola nanni ai Masterka bila kasak dauki

kan, tasba banira wan, upla puk, taya puk smal-
kan, bara mani 25 luan gospel bila tasba banira
smalki kan, upla puk walan. Ba nanni ai bila dauki
kan, witin bui sin, dia wisatta, yu bani daukissa:
„Kais, yang man woal kamni tasba pnatara
kat.“

P n a t a.



Testament almuk.

	Page
1. God diara puk daukan	3
2. Upla saurara dimman	4
3. Kain ai diura ikan	6
4. Li samra tara	8
5. Tauar Babelra	10
6. Abraham winnan	11
7. Abraham ai kupiara luki	12
8. Sodom, Gomorra	14
9. Ismael	15
10. Isaak	16
11. Sara pruan, bikan	17
12. Isaak ai maya brin	18
13. Jakob Esau woal	19
14. Jakob impaki	22
15. Joseph atkan	25
16. Joseph Aegyptenra	27
17. Joseph moini nanni Aegyptenra	30
18. Ba nanni kli Aegyptenra impaki	32
19. Jakob Aegyptenra wan	34
20. Moses	36
21. Moses, Pharao	37
22. Aegypten wina impaki wan	40
23. Israel twira impaki	43
24. God ai laka yan	44
25. Laka woala	47
26. Upla uya twira pruan	49

	Page
27. Upla tasba kaiki	50
28. Israel urangbi aisi	52
29. Bileam	54
30. Moses pruan	56
31. Josua	56
32. Wita nanni	58
33. Ruth	60
34. Eli, Samuel	62
35. Samuel, Saul	65
36. David	66
37. Saul, David	69
38. Saul pruan. David king takan	72
39. David, Uria	73
40. Absalom	75
41. Pestila Israelra	77
42. Salomo	78
43. Israel, Juda	79
44. Elias propheta	81
45. Elisa	86
46. Israel alba takan Assurra	89
47. Jona propheta	89
48. King nanni Judara	91
49. Propheta nanni	94
50. Juda nanni Babylonra	95
51. Daniel	97
52. Jerusalem kli paskan	100

Testament raya.

	Page
1. Gabriel, Zakarias	104
2. Kristus aisuban	106
3. Waikna magi lallma wina	108
4. Jesus kau tukta	110
5. Joannes Jesusra li laiki	112
6. Jesus ai uplika nanni pliki winnan	114
7. Mairin Samaria wina	116
8. Petrus inska alkan, bara lalla sakan	117
9. Kristus upla ill wina smalki	119
10. Jesus mirakula dauki	121
11. Kau mirakula woala	124
12. Jesus kau mirakula dauki	126
13. Mairin kupia saura, mairin woala Tyrus wina	128
14. Joannes Baptista	129
15. Parabola Jesu	130
16. Parabola woala	132
17. Parabola woala	134
18. Waikna lalla kira, Lazarus	136
19. Tukta nanni winnan, waikna sin	137
20. Samarita kupia pini, alba kupia saura	139
21. Parabola woala	142
22. Jesus ingni baku takan	144
23. Jesus aima yumpa Bethaniara	144
24. Jesus Jerusalemra dimman	148
25. Parabola woala	150
26. Jesus bila diara bal takaia	152

	Page
27. Jesus bila diara bal takaia	153
28. Jesus ai uplika nanni mina sikbi	156
29. Jesus Gethsemanera	159
30. Jesus alkan. Petrus saura aisi	161
31. Jesus Kaiphas woal	163
32. Jesus Pilatus, Herodes woal	166
33. Jesus pruaiara tauan	167
34. Jesus duss prinira	169
35. Jesus raitira bikan	172
36. Jesus raiti wina buan	173
37. Yabal Emmausra	175
38. Jesus Thomasra balan, bara kabora Tiberias	178
39. Jesus purara ulli wan	180
40. Ba yua Pentakost	182
41. Ananias, Saphira woal	184
42. Stephanus	185
43. Eunuka, Ethiopia wina	187
44. Saulus kupia ulakan	188
45. Kornelius wita	190
46. Petrus silak watla wina sakan	192
47. Paulus Listrara	194
48. Lidia, silak watla kakaikra	195
49. Paulus Athenra	197
50. Paulus silak watlara Kaesareara	198
51. Paulus Romra impaki	199
52. Gospel bila tasba banira	201

Pulling Library

Ayer

o PM

4039

.B53

1863

S. H. Miller
Hedleyville

Zucker
Can

AYER
Mosquito
-6-

